

**NATIONAL ASSEMBLY OF
SEYCHELLES**

Tuesday 15th July 2025

The Assembly met at 09am

National Anthem

Moment of Reflection

*Mr Deputy Speaker in the
Chair*

MR DEPUTY SPEAKER

Bonzour tou Manm Onorab, tou travayer Sekretarya Nasyonal e piblik ki pe ekout nou nenport landrwa kot zot ete.

Bonzour e byenveni pou travayer Lasanble pou sa Mardi le 15 *juillet*.

Nou travay ozordi i ava prensipalman dominen par kestyon ki enkli *PNQ*, i annan en Prozedlwa e osi i annan Mosyon ki lo nou *Order Paper*.

E mon ava dir en bonzour spesyal pou bann viziter ki dan Galeri ki'n zwenn nou ozordi e mon konpran ki zot sorti dan distrik Glacis.

Donk, mon ava demann Manm Elekte pou distrik Glacis Onorab Regina Esparon pou dir en pti mo lakey pou ou bann *guest* e *guest* Lasanble Nasyonal.

HON REGINA ESPARON

Mersi Mr Speaker. Bonzour tou Manm Onorab. E en bonzour spesyal pou nou bann dimoun sorti dan distrik Glacis, ki la avek nou ozordi. Parmi i annan nou *DA Jade Agathine*, e mon Clerk *Geneviève Paton* ki pe akonpanyy zot.

Welcome to nou Lasanble Nasyonal e mon swete ki zot ava pas en bon sezour avek nou e zot ava annan bokou pou aprann dan dann deba ki pou swiv e bann vizit ki pou vini apre ki zot in fini sesyon bomaten. Mersi e *welcome*.

MR DEPUTY SPEAKER

Mersi Onorab. Aprezan konman parti "*Communications from the Chair*" Speaker Roger Mancienne in demann mwan pou prezant en kominike ki i ti fer sorti le 12 *juillet*, e sa kominike ti osi pas dan *Nouvel*.

Personnelman mwan mon'n tann sa lo televizyon, e pou lentere bann Manm kekfwa ki'n manke, pou piblik, donk, mon pou pas lo sa kominike e en bout ki Speaker in azoute.

Donk, kominike i lir koumsa;

"National Assembly of Seychelles position on news article, referring to pro-Israel Parliamentary Group;

The Speaker of the National Assembly of

Seychelles, Honourable Roger Mancienne, wishes to clarify the Assembly's position in regard to a foreign news article being circulated on social media, which refers to a Parliamentary Group in support of Israel.

The article is wrong in stating that Seychelles is among six countries that has established Parliamentary Groups for the purpose of strengthening ties with Israel.

It is acknowledged that a Member of the National Assembly of Seychelles is pictured with the article and attended a meeting overseas recently.

This was however an individual and personal engagement and in no way involves the National Assembly of Seychelles.

No group of the description conveyed in the article, has been formed in the name of the National Assembly of Seychelles.

The National Assembly of Seychelles position on any issue related to Israel, will reflect the foreign policy of the Government of Seychelles as formulated by the Ministry of Foreign Affairs. This policy supports the efforts to which a lasting ceasefire that will bring the end of hostilities in Gaza and elsewhere in the region, the release of all

hostages and peace and stability in the region.

The Speaker has also added - according to the member concern Honourable Andy Labonte, this meeting took place in November 2024. He has requested absence to attend a meeting connected to a religious movement. Honourable Labonte has made no request to join any Parliamentary Group."

End of statement.

Pou nou kontinyen i annan Onorab Wavel Woodcock, Onorab Leader Lopoziyon mon vwar ou lanmen anler, ou'n al vwar Speaker bomaten lo size matter of privilege of the same issue. In koz avek ou prive-man poudir i pa pe permet sa aköz i zisteman in fini i ti'n adrese avan depi le 12 dan sa kominike.

E la ozordi in demann mon pou repet ankor sa pozisyon. So, this is the end of the matter. Nou pou pas laparol avek Onorab Woodcock ki i annan en rapor lo group Media Youth Culture and Sport Committee.

HON SEBASTIEN PILLAY

(Off-Mic)

HON WAVEL WOODCOCK

Mersi Mr Speaker.

HON SEBASTIEN PILLAY

(Off-Mic)

MR DEPUTY SPEAKER

Silvouple ou ava reste trankil dan prezans bann dimoun ki sorti dan distrik avek ou, gard en pti pe lape. Mersi. Onorab, *please proceed.*

HON WAVEL WOODCOCK

Mersi Mr Speaker. Mr Speaker, bonzour tou dimoun a lekout, tou mon bann koleg Onorab, tou bann reprezantan bann dimoun Glacis ki avek nou ozordi spesyalman Grand Anse Praslin.

Mr Speaker, ozordi lemond pe mark *World Skill Day*. En zour ki'n ganny proklanmen par *United Nation* konman en zour pou met lanfaz lo lenportans *build* kapasite bann zenn pou donn bann zenn *skill*, bagaz e konpetans ki zot bezwen pou zot ganny en lanplwa, pou zot ganny en travay avek tou dinyite e osi pou *empower* zot pou lantreprenarya.

Sa lazournen i osi fer nou rapel rol enportan ki bann zenn i zwe dan batir en lekonomi soutenab e enkliziv.

E konman en nasyon nou annan sa responsabilite pou fer sir ki okenn parmi nou bann zenn pa ganny kit deryer.

Mr Speaker, Sesel konman en pti leta zil nou pa *immune* kont bann defi ki bann zenn I fer fas avek dan lemond. Parey presyon pou

swazir en karyer ouswa rod en louvraz ki zot kontan.

Bann demann ki toultan pe sanze dan lemond travay.

Ouswa bezwen pou ganny gidans ek siport dan zot demars enteprenaryal.

Me an menm tan Sesel i en pei beni avek bokou zenn ki annan sa volonte pou travay pou kontribye dan nou pei, pou aprann pou konstri e osi pou dirize.

Konman *Chairman* Komite Medya, Lazenés, Sport e Kiltir, mon anvi reafirm langazman total nou Komite e nou Lasanble pou kontinyen reste en partner e *advocate* pou donn lanmen siport nou bann zenn pa zis an parol, me atraver aksyon direk e par siport bann linisyativ ki pou kree loportinite pou bann zenn.

Dan sa lespri mon kontan pou anonse ki *Public Division* nou Lasanble an partenarya avek en mwayen CC Komite pour Medya, Lazenés, Spor e Kiltir pe organiz en *Youth Empowerment Session* sa Vandredi 18 Zilyet kot nou Lasanble Nasyonal.

Sa aktivite pou rasanble en group 20 zenn ant 16 a 18an ki pou sorti dan diferan lekol segonder. I pou en apre midi ranpli avek bann mo lankourazman e pou enspir sa bann zenn.

Bann partisipan pou ganny sans ekout e enterakte avek en antreprenen en travayer ki'n perform byen i *Chairman* nou Komite.

Pou bi i senp. Pou donn lespwar nou bann zenn ed zot vwar ki zot annan en lavenir briyan, zot annan valer e ki zot merit investir dan zot fitir.

Nou osi envit reprezantan sorti kot Minister Lanplwa ek Minister pour Lantreprenarya, Lenvestisman e Lendistri pou vin partaz avek bann zenn loportinite, bann resours e konsey pratik ki pou *empower* sa bann zenn.

Mr Speaker, mon krwar ki bann zenn pa zis zot lavenir me zot lo prezan. E nou bezwen zwenn zot la kot zot ete siport zot re e donn zot zouti ki zot bezwen pou zot avans pli devan. Sa linisyativ i en pti pa me i en pa enportan dan sa direksyon.

Annou tou konman en pep tou nou bann dirizan nou menm konman bann reprezantan Lepep Seselwa kontinyen met lanfaz lo devlopman kapasite nou bann zenn par zis ozordi me toulezour. Mersi Mr Speaker.

MR DEPUTY SPEAKER

Mersi Onorab. Donk nou prosen *item* aprezan lo nou *Order Paper* i bann papye i bezwen ganny prezante. Mon ava demann Madanm Clerk

pou pas lo *Presentation of Paper* silvouple. Mersi,

MADAM CLERK

Mersi Mr Speaker. Bonzour Mr Speaker. Bonzour tou bann Manm, tou bann *staff* Lasanble e nou bann envite osi dan Galeri tou dimoun a lekout.

Papye ki pe ganny prezante bomaten i *the Financial Stability Report for the year ended December 31st 2024 Central Bank of Seychelles*. Mersi Mr Speaker.

MR DEPUTY SPEAKER

Mersi Madanm Clerk. Nou prosen *item* i *Private Notice Question* dan nou *Leader of Opposition*. Mon ava demann *Hansard Reporter* pou apel *panel* ki pe zwenn nou bomaten. Mersi.

Mon ava dir bonzour e byenveni dan Lasanble Nasyonal delegasyon ki fek zwenn nou pou reponn *PNQ*. Delegasyon i dirize par Vis-Prezidan Mr Ahmed Afif ki osi pe tenir portfolyo Minister Finans an se moman, e akonpannyen par Sef Egzekitiv *Seychelles Trading Company STC* Mr Ashik Hassan. *Welcome*.

E mon ava envit dirizan Lopozisyon pou prezant son kestyon.

HON SEBASTIEN PILLAY

Bonzour Mr Speaker, e bonzour tou dimoun ki dan Galeri bann dimoun Glacis byenveni dan Lasanble Nasyonal e mon swete ki zot pas en bon lazournen avek Lasanble Nasyonal.

Bonzour tou koleg Onorab e bonzour Vis-Prezidan avek CEO STC Mr Ashik Hassan e tou dimoun ki a lekout.

Mr Speaker, mon kestyon pour Vis-Prezidan i lir koumsa, swivan deklarasyon STC ki zot pa pou kapab donn bonous travayer akòz bann retar ki pa ti'n prevwar an relasyon avek odit kont finansyel STC, eski Lasanble i kapab ganny detay lo kwa egzaktèman sa bann retar e kan eski bann travayer pou finalman ganny peye zot bonous? Mersi Mr Speaker.

MR DEPUTY SPEAKER

Mon ava envit Vis-Prezidan pou laparol.

VICE-PRESIDENT AHMED AFIF

Mersi Mr Speaker. Bonzour Mr Speaker, *Leader* Biznes Gouvernman, *Leader* Lopozisyon, tou bann Manm Lasanble, tou bann dimoun ki dan Galeri e tou Seselwa ki pe swiv nou bomaten, bonzour.

Mr Speaker, premyerman mon oule fer resorti avek Onorab, ki kontrèman ki pe ganny fer

sorti dan sa *PNQ STC* pa'n zanmen dir i pa pey bonous.

Management STC dan son kominike entèrn, ti pe senpleman kit travayer STC azour avek progre lo odit kont finansyel pou 2024 e son peyman bonous. Malgre si inisyalman *management* in prevwar ki prosedir odit in fini e bonous ti'n posibelman ganny peye lafen Zilyet 2025, sa i pa'n posib.

Mr Speaker, odit in en eleman kritik ki nesèser pou sertifye kont finansyel sak lannen. E bonous ki pe ganny peye i baze lo profi ki STC in fer e sa profi i ganny konfirman apre ki'n odit in konplete.

Enn fwa profi in konfirman *Board* i desid lo bonous ki pou ganny peye.

Me malgre zefor tim finans STC ansanm avek *oditer Pool & Patel* nou'n ganny difikilte pou bann founniser aletranze pou konfirm zot balans avek STC.

E i enportan fer resorti konfirmasyon bann balans founniser aletranze i en prosedir normal dan finalizasyon odit.

I annan plizyer sa bann founniser aletranze ki pa ankòr donn zot konfirmasyon balans ki reste pou lafen lannen 2024 malgre bokou swivi kontinyel lo lapar STC.

E an vi sa defi, in fer i odit finansyel 2024 pa ankor kapab ganny finalize.

Me malgre tousala, mon oule dir ki *STC* i rekonnet zefor ki sak son bann travayer in kontribye performans lakonpannyen.

Nou oule reasir tou travayer *STC* ki lakonpannyen i reste angaze pou rekonnet zot zefor atraver peyman bonous ki pou ganny peye, parey ti'n ganny kominike e sa se apre ki odit in konplete e rankont zeneral anyel sa ki nou apel *GM* i ganny fer.

Zis pare y tou travayer *STC* i konnen nou'n gard nou promes pou partaz benefis ki nou fer avek zot pandan lannen presedan.

E pou lannen 2024 e pou lavenir sa pa pou sanze. Nou valoriz zot e nou apresye zot e si tou keksoz i al dapre plan nou espekte bonous pou 2024 pou ganny peye avan lafen Out 2025. Nou remersi zot pou zot konprenezon e zot travay dir.

Vwala alors Mr Speaker, mon lesplikasyon lo sa size e kestyon.

MR DEPUTY SPEAKER

Mersi *VP*. Donk lasal i ouver pou kestyon siplemanter, mon rekonnet inisyalman Onorab Vidot.

HON AUDREY VIDOT

Mersi Mr Speaker. Bonzour Mr Speaker, bonzour Vis-

Prezidan avek ou reprezanter *STC*, bann dimoun dan Galeri sorti Glacis, tou Manm Onorab e en bonzour spesyal pou zabitan Roche Caiman.

Vis-Prezidan, akoz a sak fwa kan nou koz travayer pou zot ganny zot bonous kot *STC*, nou ganny dir kont pa ankor ganny fer? Akoz retar akoz toultan sak fwa letan nou pe koz met larzan dan pos sa bann dimoun ki zot travay ki zot in fer nou ganny dir poudir i annan kont pe ganny i pe ganny retar *STC*?

MR DEPUTY SPEAKER

Mon ava envit *VP* ou larepons.

VICE-PRESIDENT AHMED AFIF

Mersi bokou Mr Speaker. Mr Speaker rezon nou dir zot sa se parske nou koz laverite avek zot.

Nou fer zot konnen egzakteman parey sityasyon i ete, nou pa vin fer krwar tou keksoz i *ok* kan keksoz pa *ok* - pa ankor finalize. E nou swiv prosedir finansyel e fer sir poudir avan ou fer en peyman ou annan bataz pou fer sa peyman.

Ou'n fer sa profi, prosedir finansyel in ganny swiv, odit in ganny fer, tou keksoz i ganny etale devan tou dimoun dan latransparans tou dimoun i konn egzakteman se ganny peye a ler, si i annan en pti retar e si i annan en retar

akoz. Se egzakteman ki nou pe fer parske nou en Gouvernman ki transparan, ki rann kont e ki envit tou dimoun konnen ki pe pase. Mersi bokou.

MR DEPUTY SPEAKER

Prosen entervenans, Onorab Larsen.

HON CECILE LARSEN

Mersi Mr Speaker. Bonzour a tous spesyalman zabitan Au Cap ki a lekout.

Mr Speaker, mon keston i akòz ki toutan i travayè ordiner ki bezwen pey lepokase letan i konsern pou ou pey zot, zot bann *dues*?

Mr Speaker, fransman mon pa konpran zot konman en Gouvernman. Mersi Mr Speaker.

MR DEPUTY SPEAKER

Mon envit VP pou donn son larepons.

VICE-PRESIDENT AHMED AFIF

Mr Speaker, mon krwar tou dimoun in tann mon ki mon'n dir. Mon eksplik egzakteman ki rezon. Mon'n donn komitman poudir STC ki pe fer byen pou pey en bonous e zot tou zot pou ganny peye. E napa okenn normal parfw e nou bezwen transparan ler keksoz i ariv parey i ete. Nou swiv prosedir finansyel sa set en prosedir ki nou bezwen

swiv, e nou fer keksoz drwat. Napa nanryen pou kasyet. Tou dimoun pou ganny peye e tou dimoun pou ganny trete dan en fason zis. Mersi bokou.

MR DEPUTY SPEAKER

Mon ava envit Onorab Gill pou lot keston.

HON CHURCHILL GILL

Mersi Mr Speaker, bonzour tou dimoun dan Galeri, bonzour VP e tou Manm ki pe ekout nou.

VP ou'n eksplike *comme* kwa konfirmasyon pou balans bann *partner* aletranze in ganny serten retar, e an menm tan ou'n dir lafen Out ou espekite ki peyman i kapab ganny fer dan evantyalite ki *still* ou ganny retar serten *partner* pa konfirm zot balans saler, eski STC pou annan lezot lapros ki zot pou servi ki pou kapab pey sa bonous apre Out parey ou pe dir ? Mersi.

MR DEPUTY SPEAKER

Mon ava envit Minis pou larepons.

VICE-PRESIDENT AHMED AFIF

Mersi Mr Speaker. Mr Speaker, nou ava demann *Board* STC pou li evalye sityasyon.

Me selman tou le lannen nou konnen kantite letan normalman i pran e sirtou avek bann founniser aletranze.

Rezon souvandfwa ou ganny retar founniser aletranze se parske zot pa neseserman swiv menm lannen finansyel ek nou zot. Zot annan diferan prosedir pou zot odit. Par egzanp zot osi kekfwal ler ou pe demann zot i osi pa ankor ferm son liv li. Akoz li osi i pe depan lo lezot founniser pou li ferm son liv.

I annan tou kalite rezon akoz parfwal zot pa kapab donn ou en detay konfirman menm zour.

Me selman sa ki nou'n trouve a longer ditan se ki zeneralman dan milye lannen zis apre milye lannen laplipar in nobou konfirman, e nou pa anvizaze annan okenn problem.

Se pou sa rezon ki mwan mon dir nou, nou pe donn en komitman e nou pou fer sir sa i peye e nou krwar boner an Out i ava kapab arive si tou keksoz i al byen.

MR DEPUTY SPEAKER

Mon ava envit Onorab Labrosse pou demann son keston.

HON RICHARD LABROSSE

Mersi Mr Speaker. Mon ava dir bonzour bann zabitan Glacis tou dimoun ki a lekout, VP ek ou delegasyon ek tou bann Manm Lasanble.

Mr Speaker, mon annan zis en senp keston pou VP ler mon'n ekout li. Dabor mon ti

ava kontan felisit bann travayer STC pou sa travay nob ki zot in fer e ozordi zot pe al ganny en bonous, alors kontinyen sa bon travay.

(APPLAUSE)

HON RICHARD LABROSSE

VP, ler mon pe ekout ou la ozordi bomaten mon annan zis en keston akoz mon annan enn de pti enn de zabitan in apros mwan konsernan sa ki nou pe koz lo la ozordi.

Ler nou pe koz bonous ki STC pe al distribye an Out parey ou'n dir, eski ou ti ava kapab zis donn en pti lenformasyon Lasanble pareyman si bann dimoun ki ti pe travay ki'n *resign*, eski zot osi zot pou *entitled* sa bonous ouswa lo ki fason zot pou donn sa bonous li menm ? Mersi Mr Speaker.

MR DEPUTY SPEAKER

Mon envit VP pou larepons.

VICE-PRESIDENT AHMED AFIF

Mersi bokou Mr Speaker. Mr Speaker, mon pa pou kapab donn detay egzakteman lekel e ki fason bonous. Selman bonous i ganny peye konman en pousantaz profi.

E normalman ler en travayer i kite i ganny peye tou son bann *dues* ki nou dir son konpansasyon pou son letan travay si i annan gratwite zot

pou drwa li pou peye. Si i annan zour konze ki pa'n pran in bezwen ale, zot pou rann li sa bann zour an term *cash*. So sa i ganny fer.

Polisi *STC* li menm an se ki konsern bann ki'n fini kite eski zot gannye - mwan mon pa konnen, me selman avek ou permisyon Mr Speaker mon ava demann *CEO* i ava kapab klarifye si i annan sa lenformasyon ki mannyer i marse.

Se normalman koumsa ki sa i marse. E mon profite pou osi remersye tou bann travayer *STC* - mon vwar pandan sa bann lannen ki'n pase zot in fer ase byen konman en lorganizasyon.

Si nou get resaman *STC* in nabou reisi R110 milyon dan en *cold store* ki ozordi en *cold store* modern ki kapab gard manze debaz diri, zonnyon, ponmdeter, lavyann eksetera, gard en stok pou plis ki 6 mwan. En keksoz ki pandan 40an zanmen zot in fer dan zot letan.

E zot ti annan en *warehouse* ti'n vid de lapide zot pa'n zanmen repare, e sa se en keksoz ki nou nou'n trouve e nouvo *Board STC* in trouv sa konman en priyorite e zot in servi zot prop resours pou fer li.

Pa'n demann en sibvansyon ek personn zot. E zot in fer li, si zot in reisi fer sa avek sa kalite ki zot in fer se

akoz tou travayer pe donn son mye dan sa lorganizasyon.

Sa lorganizasyon pe fer byen, i annan bon zesyon e zot in reisi met zoli letablisman pou *STC* pou pep Seselwa. Parski finalman se bann bon prodwir ki zot pou gannye lo letazer e bann bon pri.

Alor mon osi mon felisit zot e mon espere ki tou pou mars byen pou zot. Mersi Mr Speaker.

MR DEPUTY SPEAKER

Mersi *VP*. Mon krwar sa klarifikasyon lo fason ki i pou peye mon ava permet *CEO* reponn.

CEO ASHIK HASSAN

Mersi Mr Speaker. Bonzour a tous. Petet pou konmanse nou bezwen fer kler ki bonous i pa parey trezyenm mwan li. I pa en *requirement* regilatwar. I en *perk* ki en lorganizasyon i met an plas pou rekonpans son bann travayer *over and above* sa saler sa trezyenm mwan ki i donner baze lo performans lorganizasyon e osi *profitabilité* ki sa lorganizasyon in fer dan sa lannen.

An vi sa, i osi la pou ankouraz travayer pou reste avek lorganizasyon pou fer sir ki travayer *loyal*. E pou sa kestyon ki'n ganny demande par Onorab, si i ganny aplikab pou travayer ki'n nepli avek lorganizasyon.

Pou lemoman pou reponn sa kestyon briyevman i pa aplikab pou bann travayer ki 'n fini kit lorganizasyon. E toudmenm nou rekonnet ki petet zot in kontribye pou sa lorganizasyon avan ki zot in ale, savedir sertennman i en keksoz ki nou kapab regarde ansanm avek *Board STC* an alan devan. Mersi.

MR DEPUTY SPEAKER

Mon ava pas laparol aprezan avek Onorab Loze.

Eski zot pa pe tann mon byen ?

HON JOHAN LOZE

Mersi Mr Speaker.

MR DEPUTY SPEAKER

Non enn de fwa menm *CEO* pa'n tann mwan avan. Pa spesifikman pou ou *ok*, Onorab Loze, *proceed*.

HON JOHAN LOZE

Mersi Mr Speaker. Mr Speaker zis pou enform Lasanble an relasyon avek 40an nou pa'n fer *cold store*.

I enportan ki Lasanble i konnen poudir premye *chairperson STC* ti pa lot ki Vis-Prezidan Ahmed Afif ki pa'n fer *cold store*. Mersi Mr Speaker.

Mr Speaker, an relasyon avek bann fournisseur enternasyonal ki pa pe konfirm ouswa pe ganny

difikilte konfirm zot balans avek *STC*.

Mon kestyon Mr Speaker, eski sa i annan a fer avek sa bann tranzaksyon kot bann manm *Board STC* pe fer komers zot menm avek *STC* lokalman e enternasyonalman? Mersi Mr Speaker.

MR DEPUTY SPEAKER

Mon krwar mon bezwen klarifye en keksoz. Nou pa kapab servi *question time* okenn moman dan Lasanble pou nou *mislead*.

Semenn pase ti annan en *right of reply* ki ti dir ki premyerman *CEO* ki la devan napa okenn *business* lakonpannyen, kapab al verifye kot *Registrar*.

E i ti koz lo pozisyon *Chairman Board* poudir ki son drwa konstitisyonnel pou li fer biznes me an menm tan i *recuse* son lekora kan i annan *possible conflict of interest* e i deklara sa.

Be solman sa kestyon in ganny demande, *panel* i la, mon ti ava kontan enn fwa pou tou nou klarifye sa pou ki nou tou sirtou konman bann dirizan dan kominote nou evite fer bann keksoz ki nou zis senm rimer parmi nou popilasyon. Sa i pa byen. *Panel*.

VICE-PRESIDENT AHMED AFIF

Mersi bokou Mr Speaker. Mr Speaker, mon krwar *STC* in deza fer bann *statement* lo sa size.

In fer li tre kler e *STC* in dir kot i annan okenn son manm ouswa manm *staff* oubyen manm *Board* ki annan okenn lentere dan biznes, ki i annan pou fer - ki kapa b ganny vwar konman en konfli avek biznes *STC* li menm, sa bann manm i fer en deklarasyon.

E si i annan okenn desizyon pou pran an relasyon avek *STC* zot deklar zot lentere zis parey tou lezot lorganizasyon i fer, menm dan Lasanble Nasyonal i ariv enn de lokazyon kot en Manm i dir be mwan mon pa pou koz lo tel size aköz mon santi mon annan en lentere ladan, e zot fer li e sa i arive.

Sa i diferan - sa i diferan avek bann lenstans kot en dimoun i konnen i annan en lentere par deklar sa lentere e sa i mars dan lentere sa dimoun ki li, li menm i pou ganny en benefis atraver *STC*.

E petet si zot pe sey fer krwar poudir ozordi *STC* pe fer bann keksoz ki pep Seselwa pe perdi atraver, mon krwar in ler pou mon *remind*, zot e fer *remind* zot si zot in bliye ki ti arive an 2014 - an Me 2014.

Mr Speaker an Me 2014, *STC*, *STC* ti ganny en gro kopo

tire lo li par en dimoun ki apele Parti Lepep en parti ki apel Parti Lepep. Zot konnen ki ti arive ?

Ti annan en bout later zis *STC* zis avan *Island Motors* zis vizavi *Island Construction*, Gouvernman ti lwe sa bout later ki ti annan en langar ki zot ti stok materyo ladan.

Ti lwe sa ek Parti Lepep, pou ekout sa byen, R6 mil par mwan. R6 mil par mwan Gouvernman i lwe ek Parti Lepep. Parti Lepep i pran sanmenm sa later, i lwe ek *STC* pou R823 mil par mwan.

(Interruptions)

VICE-PRESIDENT AHMED AFIF

R823 mil I fer R817 mil profi lo ledò *STC* par mwan, dan en lannen preski R10 milyon zot in fer sa pandan 4an. Zot in pran R40 milyon Parti Lepep lo *STC*.

Ozordi zot fer konmsi zot pe lager pou en bonous. Lannen pase ti pey R3 milyon bonous, zot, zot in pran R40 milyon lo *STC*. Zot annan ase bonous pou pey 13an pa demann *STC* pey nanryen travayer.

Be pa fini la Mr Speaker, pa fini la. Ler 15 lo 10 ti arive, an 2016 sa gro tors avek 15 batri ti kler lo zot e i ti fer en rapor *STC* - mon pa pe evante sa bann keksoz. Mon pe fer en sitasyon rapor *FPAC* Me 2019

sinyen par Onorab Pillay, Onorab De Commarmond e Onorab Gill.

Zot ti dan *FPAC* e dan zot rapor tousala i ganny liste ki mannyer apard pran 40 milyon profi ki zot in fer lo ledò *STC*, ler batri torsi kler lo zot i dir ek zot be get sa be fodre arete sa, prezan Gouvernman i taye, avek *STC* i dir get sa rann sa.

Prezan Parti Lepep i dir nou ava rann selman donn nou R30 milyon ankor.

Prezan zot negosye ek *Board STC*, *Board STC* i dir be annou fer evalyasyon konbyen sa later i vo. Fer *QS* vini *QS* i dir i vo 12 milyon a 13 milyon. Parti Lepep i dir non, non pa bon negosye finalman zot in pey R17 milyon pou sa bout later ki zot in rann. Sa i dan rapor *FPAC* ki Onorab Pillay in sinyen.

Alors si pa asire akòz in sinyen. Selman apard sa, apard sa Mr Speaker ti annan de bout later kot ozordi zot in fer en zoli *cold store* lo la, V108 - V18998 avek V18999 Gouvernman ti lwe Parti Lepep R11 mil par mwan. R11 mil par mwan pou de pti bout later.

Zot re lwe sa avek *STC* - napa nanryen lo la, zot re lwe sa avek *STC* pou R50 mil par mwan. R50 mil par mwan. 15 lo 10 i kler lo zot ankor, zot dir *ok, ok* nou ava rann nou ava rann e zot ti rann apre 4an.

Se sa ki zot in fer. Me selman ler zot in rann in ariv R2 milyon ki zot in fini tire ankor lo *STC*.

So annou konte 40 milyon ki zot in pran, 17 milyon i fer 57, 2 milyon i fer pros R60 milyon. Mon pe koz zis 4an ki batri in kler lo zot. zis 4an.

Be si Gouvernman si Lasanble pa ti sanze an 2016 zot ti pou kontinyen akòz sa Lagreman ti pou 25 an sa.

Ti en Lagreman 25an e dan 25an si nou konte konbyen zot ti pou tire lo *STC* R245 milyon, R245 milyon.

Ozordi zot fer konmsi zot enterese pe lager bonous travayer selman zot in tir 60 zot in al dan en parti politik ki mon pa konnen ki benefis zot in gannyen ek sa parti politik.

Akòz zot in sorti 15 lo 10 zot in vin 10, e la 27 Septanm zot pou vin 0. Be ki zot in fer ek tou sa larzan? Kot pe ale?

Zanmen mon'n deza tandè ki mannyer sa larzan in ganny odite ki mannyer in pase kot zot.

Be annou ennler ler mon ekout zot onnetman, onnetman mon pe sey konpran kote zot pe ale. Swa zot pe lager pou travayer, me selman an kor mon rapel sa ki Onorab Aglae ti dir semenn pase *STC* i devret onte in fer profi lo ledò Seselwa.

Be Onorab si ou pa fer profi ki mannyer ou pou pey

bonous atraver ou Mr Speaker ?

Si ou pa fer profi, ki mannyer ou pou pey bonous ? Olye Mr Speaker, olye felisit *STC* ki'n travay dir in fer profi, in evite pran bann gro larzan pey en parti politik olye in anmas son larzan in fer en *cold store* avek R110 milyon in sov lentere, i pa'n al pret ek labank li, sanmenm sa profi ki in fer in envestir dan en *cold store* pou donn meyer prodwir son pep.

Se sa ki *STC* in fer e ler i fer tousala zot dir li i devret onte.

Ou konnen lekel ki devret onte, sa ki ti pe al fer R245 milyon profi lo ledò *STC*. Zot ki devret onte.

(APPLAUSE)

VICE-PRESIDENT AHMED AFIF

Zot ki devret onte. E pa vin fer krwar ozordi pou zot pe lager R3 milyon R4 milyon bonous dan zis en tranzaksyon zot in pran 40 milyon !

Me mwan mon pa krwar sa i normal, e zot in fer sa an 2014 ziska 2018. Be i tro bokou.

Mr Speaker, mwan mon'n dir sa ki mwan mon konnen, mon konnen i annan bokou plis ankor me selman mon'n eksplik byen lo Bonus ki mannyer i marse zot pou gannyen zot bonous annou pa

sey fer krwar *STC* pa pe fer sa ki i kapab kan zot konn tre byen lekel ki'n tir pli gro kopo.

Annefe mon ava fer en propozisyon Mr Speaker, mon ava fer en propozisyon ek zot konman Parti Lepep fer en komitman avek *STC* pou sa prosen 10an, zot ava pey tou bonous travayer avek sa R60 milyon ki zot in pran.

(APPLAUSE)

VICE-PRESIDENT AHMED AFIF

La i ava montre zot serye. La i ava montre zot enterese. La i av montre pep Seselwa poudir vreman zot av rann sa ki pa pou zot. Mersi bokou Mr Speaker.

(APPLAUSE)

MR DEPUTY SPEAKER

Prosen enterven an lo lalis Onorab Arissol.

HON SANDY ARISSOL

Mersi Mr Speaker. Bonzour VP avek Mr Hassan. Bonzour bann zoli dimoun Glacis ki dan Galeri, *welcome* dan nou Lasanble Nasyonal. nou *welcome* zot dan nou popoyote isi.

Mr Speaker, mon anvi felisit Vis-Prezidan konpare avek letan mon aprann ou ti ganny dir ou ti lo *Board STC*.

Ozordi konman Vis-Prezidan ou'n asire poudir *STC*

avek Mr Hassan ki la poudir *STC* zot rezen i nepli ganny *hijack* depi *highway* konmela.

Zot lavyann i nepli ganny vann dan sed. E sa in permet ki *STC* in kapab fer en profi pou nou kapab annan en zoli *cold store* ozordi pou permet *STC* kontiny sa travay ki pe fer pou Lepey Seselwa.

(APPLAUSE)

HON SANDY ARISSOL

An menm tan Mr Speaker, permet mwan mon ti ava kontan remersye tou bann *LDS* sa gran fanmir *LDS* ki ti la Dimans.

(APPLAUSE)

HON SANDY ARISSOL

Mon ti a kontan, mon ti ava kontan dir zot mersi. Parske ler mon ti anler lo *stage* mon'n vwar zis 4 loto ek 2 dimoun dan laplenn, alor mon ti ava kontan remersi sa de dimoun ki ti vini. Mersi bokou pou zot *être* la.

Mr Speaker, mon ti a kontan demann de kestyon *VP*. Le 19 Zen 2024 lo *Order Paper* Onorab Pillay ti demann Minis Hassan sa menm kestyon, kan ki eski travayer pou ganny zot bonous?

Ozordi sa kestyon i monte lo *Order Paper* Mardi le 15 Zilyet 2025 eski ki kan travayer pou ganny zot bonous?

Mon ti ava kontan demann avek *VP* premye kestyon, eski travayer *STC* zot gannye zot bonous, zot pe gannye zot kontinye gannye, depi kestyon lannen pase ziska la? Oubyen in annan en poz dan bonous e *STC* travayer pa pe gannye? Mon premye kestyon.

Dezyenm kestyon mon'n osi aprann poudir i annan en *email* ki'n sorti kot *STC* pou enform tou bann *heads of* bann departman e osi travayer *STC* poudir i annan sa pti retar dan zot bonous avek tou bann travay ki pe fer sa *email* in sorti.

Eski tou travayer *STC* zot in gannye sa lenformasyon, poudir i annan en retar e *STC* parey i fer tou le z-an pou pey bann travayer Seselwa ki pa pe vol rezen, ki pa pe vol lavyann *STC* ki pe travay byen poudir zot bonous pou gannye me avek sa pti retar zot pou gannye

Eski i annan en *email* kominikasyon in sorti oubyen zis Lopozisyon ki'n ganny sa lenformasyon poudir *STC* pa pe pey bonous? Mersi bokou Mr Speaker.

MR DEPUTY SPEAKER

Mon envit *VP*, pou donn en larepons.

VICE-PRESIDENT AHMED AFIF

Mersi bokou Mr Speaker. Mersi Onorab. Onorab I kler sa ki ou'n dir. So bonous lannen pase ti ganny peye an Zilyet milye lannen, lannen pase e son total ti R3.1 milyon zot ti ganny peye.

Nou espekte si tou i al byen i pou dan apepre sa tape menm e nou espekte si tou i al byen boner an Out zot ava peye. E wi, Onorab tou travayer tou travayer ti ganny enformen boner sa lannen, boner sa lannen e pli tar atraver *email* zot ti ganny dir poudir nou pe annan en pti retar zot pou gannyen zot bonous, e nou pe esper odit konplete. Sa komunikasyon in toultan kler sa.

So travayer i konnen li, travayer i konnen ki pe arive. Nou gard zot okouran, e zot konnen poudir komitman Gouvernman i 100 poursan.

E taler mon'n tann zot mansyonnen mon ti premye *Chairman*, be zot pa demande konbyen letan mon'n *chairman*.

Zot pa demande mon pa'n fer lontan laba mon. Pa ni en lannen. Mon'n sorti e zis detrwa lannen apre mon'n kit sa Gouvernman e zanmen zot in pardonn mwan, mon'n kite.

Be mwan mon'n ale aköz mon ti'n ganny ase avek sa bann mannigans ki zot ti annan.

(APPLAUSE)

VICE-PRESIDENT AHMED AFIF

Se pou sa rezon mon lo sa kote latab ozordi, mon lo sa kote latab mon fyer mon lo sa kote latab. Aköz ozordi nou'n nobou kler tors, kler lo zot e fer pep Seselwa konn laverite lo tou sa ki zot in prezante zot.

E mwan mon fyer, mn pa konnen si zot, zot annan en konsyans ki zot krwar zot devret i devret sarze aköz sa ki'n arive dan lepace.

Me mon'n fer en propozisyon, si zot senser zot pe lager pou travayer Seselwa demann zot parti rann tou sa larzan ki zot in pran avek *STC* pou pey bonous travayer *STC*. Mersi.

MR DEPUTY SPEAKER

Mon ava donn prosen enterven an Onorab Naidu

HON SATHYA NAIDU

Mersi Mr Speaker. Bonzour VP avek *CEO STC*. Zisteman an relasyon avek sa size bonous i pa fer premye fwa sa ziz-e pe vin devan Lasanble parey Onorab Arissol in fek dir nou.

E lo sa pwen sa ki konsern Kontra Lanplwa ant bann travayer *STC* avek *STC* konman sa lorganizasyon, lo laspe bonous, eski i annan en *clause* spesifik ki fer referans avek peyman bonous an se ki konsern dele letan ki sa

peyman i dwatet ganny fer apre ki rapor finansyel parey zot in fer resorti i ganny prezante.?

E ankor enn fwa i en pwen ki ou pe fer resorti VP e enn ki fer en sans zot in vann later Saint Louis, Rivyer Anglez, Beau Vallon partou kote zot pe vann pou kapab fer politik avek pou aste vot.

Me dan plas fer sa la met sa larzan dan kof Leta e nou ava pey sa larzan ki zot pe rod pou bonous travayer STC ozordi pli vit posib parey zot, zot pe sey espekite fer atraver sa kestyon. Mersi.

MR DEPUTY SPEAKER

Mersi. *Panel?*

VICE-PRESIDENT AHMED AFIF

Mersi bokou Mr Speaker. Mr Speaker, normalman dan Kontra ki travayer i annan i napa en *clause* lo bonous li menm.

Bonous i en keksoz ki lakonpannyen i deside pey konman en zes an bonnfwa pou rekonpans zot pou zot zefor.

I en lankourazman ki lakonpannyen i fer. I pa en lobligasyon. Trezyenm mwan i en lobligasyon. Me sa ki nou pe dir nou pe peye i an plis ki Trezyenm Mwan sa.

E alor se sa ki STC i fer, me selman nou, nou rekonnet zefor ki nou travayer i fer. So

menm ki i pa dan Kontra STC i santi li oblize pou fer sa aköz i krwar dan son travayer i krwar dan son bann sa zefor ki zot mete e i anvi montre zot sa lapresyasyon. Mersi bokou Mr Speaker.

MR DEPUTY SPEAKER

Mon ava donn laparol Onorab Gabriel.

HON CONRAD GABRIEL

Mersi Mr Speaker. Mon ava dir bonzour tu dimoun a lekout spesyalman zabitan pointe Larue. *Welcome* bann zabitan Glacis dan nou *Chamber* ozordi.

VP pa tro eksite pa ankoler en. So i annan en bon pe trou partou, partou en ?

VP in konfirman ki avan lafen Out bann travayer STC pou ganny zot peyman in donn zot en komitman ki pou peye.

VP eski ou kapab donn nou en dat egzakt kan nou pe koze sa ?

Akoz lafen Out i annan en dat ki antase avek. Eski ou kapab donn nou en garanti kan sa bann travayer pou ganny peye silvouple ? Mersi.

MR DEPUTY SPEAKER

Panel larepons.

VICE-PRESIDENT AHMED AFIF

Mersi Mr Speaker. Mr Speaker, mon ti ava kontan retourn kestyon kot li. Eski

zot kapab donn nou en garanti Parti Lepep pou rann sa 60 milyon oli vit posib ? Mersi bokou.

(comments off-mic)

MR DEPUTY SPEAKER

Onorab Uranie, *you are next on the list.*

HON ROCKY URANIE

Mersi Mr Speaker. Bonzour *panel.* Bonzour tou bann Manm viziter dan Galeri, byensir bann zabitan zil pros ki a lekout.

VP, STC i annan son *management* e osi i annan son *Board.* E la ler mon'n ekoute klerman i montre i annan enn ki pa ti konnen ki odit pa pou pare.

Eski i annan en mank kominikasyon par sa ki ti pran sa desizyon orizinalman pou donn sa dat ki bonous pou ganny peye ? Mersi.

MR DEPUTY SPEAKER

Larepons *panel.*

VICE-PRESIDENT AHMED AFIF

Non, mersi Mr Speaker. Napa okenn mank kominikasyon. I kler poudir bonous i peye apre ki kot i ganny odite. Tou dimoun i konnen lo *Board* sa.

E tou dimoun dan lakonpannyen i konnen, napa okenn mank kominikasyon pou sa rezon pou sorti *mail,*

pou dir ek zot poudir zot pou ganny peye zot bonous, selman enn fwa ki lodit i fini, so mwan mon'n krwar nou'n kler lo la mon.

Nou napa okenn mank kominikasyon, nou pe swiv tou prosedir, e tou keksoz i kler lo la.

Me mon krwar CEO in edik mon i ti oule dir en keksoz lo la CEO. Avek ou permisyon Mr Speaker.

MR DEPUTY SPEAKER

Please proceed.

CEO ASHIK HASSAN

Mersi Mr Speaker. Mersi Vis-Prezidan. Lo kote kominikasyon, nou ava fer resorti ki an Mars *staff* ti ganny enformen ki prosedir odit i *ongoing.*

E ki nou pe prezimen ki ti pou ganny konplete an Zilyet e bonous ganny peye. Mon oule met lanfaz lo sa mo 'prezimen' ki pou mwan i pa en komitman ki nou ti dir i pou pare. Nou ti pe *presume* baze lo bann lannen presedan.

Me alor ki nou'n vwar nou ganny sa bann retar, nou ti ekrir *staff* menm semenn pase, e mon krwar zot ti gannyen sa kominikasyon zot menm zour ki nou'n gannyen sa retar e nou pou pey sa bonous o sito posib ki nou bann *requirement* in fini ganny *fulfilled* lo kote odit. So mersi.

MR DEPUTY SPEAKER

Mon ava donn laparol Onorab Bistoquet.

HON ANNE BISTOQUET

Mersi Mr Speaker. Bonzour Mr Speaker, envite ki dan Galeri, *panel* e tou dimoun a lekout e tou Manm koleg Onorab.

VP, ou'n mansyonn serten bann labi. Eski ou kapab dir nou ki kantite labi ki Gouvernman *SPPF*, Parti Lepep ek *US* in fer letan ki *STC* ti *SMB* avek proze Coetivy kanmaron Coetivy ek *Orchid Farm*? E dir nou ki mannyer sa bann larzan ti ava kapab ganny servi pou donn *STC* en pli meyer bonous bokou plis ki zot pe gannye la, fer desann pri lavi e ed fanmir Seselwa? Mersi bokou.

MR DEPUTY SPEAKER

Mon envit. Non in dan son larepons VP in koz lo bann labi ki'n annan, so i *arise from answer given*.

(comments off-mic)

VICE-PRESIDENT AHMED AFIF

Mersi. Mersi bokou Mr Speaker. Kestyon i lo *STC* mon pe reponn en kestyon lo *STC* mon tann ronfleman bann ronfle lot kote.

Me selman Mr Speaker, mon ti oule atraver ou reponn Onorab Bistoquet pou dir ek li

mon'n fer kler poudir sa labi ki mwan mon'n koz lo la, i zis 2014 ziska 2018.

Me mon krwar pep Seselwa i kon pou zot menm. Mon pa pou koz lo keksoz ki deza Ankour, e nou konnen ki i baze lo en ka 50 milyon Dolar, mon pa pou fer okenn lakizasyon, i Ankour.

Me 50 milyon Dolar in perdi i reprezant pros R800 milyon ozordi.

So si nou pou azout sa 800 ek sa 60 nou'n ariv, nou pe koz lo 900 milyon la. Sa pa enkli Coetivy, Coetivy ti anviron 25 a 30 milyon Dolar. So la nou pe koz ankor R400 milyon. E napa en rannman ladan aköz zanmen zot in deza fer larzan.

E ozordi i reste ankor bann vye bout zenerater, katerpiller ki ankor laba lo zil. I ti en *write-off* sa 30 milyon. E dan par negosyasyon det tou sa bann det ti bezwen ganny efase. Ti bezwen ganny efase en bout ladan peye.

E malerezman e sanmenm sa mon'n fer kler pou 4an i annan tan ki nou'n perdi atraver en Gouvernman ki ti anba zot *watch* sa letan, zot *watch* 2014 2018 ti zot *watch*., en kantite larzan in perdi.

E se pou sa rezon mon pa konpran aköz lo en kote mon tann zot dir *STC* i devret onte in fer profi.

Selman profi li menm li ki pou donn bonous. Be deside ki zot anvi. Deside ki zot anvi pran zot en desizyon. Mon pa konnen ki desizyon zot pou pran. Mwan mon'n met en sizesyon R60 milyon in disparet anba zot *watch* in al direk kot zot, sa i kler i dan rapor FPAC i dan rapor sa.

Be fer sa ki onnet, rann sa larzan konman zot parti politik, pran en desizyon. Personn pa kapab pran sa pou zot, zot ki devret pran.

Zot parti i devret pe vin devan kekfw met dan zot manifesto. Dir poudir zot pou rann sa larzan e zot ava rann pep Seselwa e se zot ki devret onte. Zot parti i devret onte STC ki pe travay dir pe fer profi i pe re investir sa profi pou pep Seselwa. Mersi bokou.

MR DEPUTY SPEAKER

I annan i 10er mwen 10, mon krwar mon pou donn loter kestyon la ki *order* ki ou pe envoke Onorab ?

HON JOHAN LOZE

Mr Speaker, mon oule koriz en mize apreansyon ki'n leve. Napa case 50 milyon devan Lakour. Napa okenn case R50 milyon STC devan okenn lakour Sesel. Vis-Prezidan pe *mislead* Lasanble. Mersi Mr Speaker.

MR DEPUTY SPEAKER

Be amwen mwan mon latet pa bon akoz sa larzan pa ti sorti deor pou donn STC, kote sa case i ete ?

Be konman *Committee leaders we cannot mislead the public.*

HON JOHAN LOZE

Napa case devan Lakour ase lalang zot tou!

MR DEPUTY SPEAKER

Ler in arive pou nou donn loter kestyon. I annan de Manm malerezman enn kot LDS Onorab Woodcock lot kote US Onorab Aglae akoz *management of time*, dirizan Loperasyon kestyon pou ou.

Me selman mon satisfè 6 Manm US in demann kestyon 4 Manm LDS in demann kestyon *fair and square. LOTO.*

HON SEBASTIEN PILLAY

Mersi bokou Mr Speaker. Mersi pou bann larepons ki nou'n gannyen ziska la lo peyman bonous pour travayer STC.

Mr Speaker, pou reste lo size, dan sa kominike ki STC ti anvoy kot bann travayer, zot ti dir ki peyman bonous 2024 pou fer selman apre ki kont finansyel STC pou 2024 i ganny odite prezante dan *Meeting Zeneral Anyel, Meeting Zeneral Anyel.*

Ok, so premye kestyon ki nou ti ava kontan konnen kan

eski zot *meeting* zeneral anyel pou ganny fe?

Akoz dapre sa ki ou'n dir bann travayer fodre sa bann kont odite i ganny prezante apre ki zot pou kapab pey bous.

So kan sa *meeting* pou ganny fer?

Baze lo lefe ki Vis-Prezidan in donn nou de dat. In dir nou avan lafen Out apre in dir nou boner an Out.

So lo ou *email* si mon kapab kontinyen lo ou *email* ou dir sa. Ou dir "konsekaman aköz ou dan staz final sa prosedir, *staff* pou ganny enformen bann dat tantativ kan sa bonous pou ganny peye,

.."

e sa ou ti anvoy kot Lasanble Nasyonal *as part of right of reply* le 10 Zilyet 2025.

Le 10 Zilyet 2025 ou pa ti konnen si ou pou pey ni lafen Out ni boner an Out.

So si ou kapab klarifye sa premye bout pou nou pou ki bann travayer ki epe ekout nou i ganny sa kler.

Dezyenmman Mr Speaker, an 2024 mon ti anmenn menm kestyon apre ki *STC* ti rankontre swa problemm parey ouswa problemm ki en pe *similar to this one*.

Aprezan aköz ki zot pa'n servi sa lesan 2024 prenon kont ki le 27 Mars ou ti wi ou ti dir ti annan de kondisyon ou

ti dir *STC* ti dir pa ou *STC* ti dir poudir zot pou pey bonous apre ki kont finansyel i ganny prezante e kan lodit konplete.

So i paret poudir sa problemm lodit an se ki konsern bann *supplier* i en problemm ki *recurrent*.

So eski zot pa ti met sa an perspektiv ler zot ti anvoy *staff* sa let ki enform zot poudir sa bann bonous pou ganny peye a sa moman?

Zis en dernyen pwen mon ti ava kontan nou met lo rikord Mr Speaker. Mon'n tann bokou koze lo bann peyman ki *STC* i sipoze.

MR DEPUTY SPEAKER

Onorab, mon krwar ou'n demann ou de kestyon, mon pa pe donn ou okenn sa pou al fer klarifikasyon lo pwen. *Panel* de kestyon in demande. De kestyon in demande. Mersi.

(comments off-mic)

MR DEPUTY SPEAKER

Manm Lasanble i annan drwa demann kestyon e si zot get zot *Standing Order 59* pa permet personn fer *statement*. I kler sa? *Panel please proceed. Thank you.*

(Interruptions)

MR DEPUTY SPEAKER

Onorab Loze, pa pou mwan, me pou sa bann dimoun ki la

anler bokou pli vye ki ou, silvouple montre en pe disiplin e respe dan sa lenstitisyon, akòz ou aksyon i pe anbaras nou tou pou fer krwar poudir koumsa, *ok ?*

(Interruptions)

MR DEPUTY SPEAKER

Silvouple, silvouple, mon pe demann ou pou gard *calm* akòz ler ou pe kriye pa tro krwar poudir sa i en fason montre lentelizans. Silvouple reste trankil. Mersi.

Panel proceed avek larepons.

(Interruptions)

MR DEPUTY SPEAKER

Eski mon kapab demann bann Manm Lasanble silvouple, silvouple nou'n vini nou'n vin travay. Si zot krwar zot pa oule fer sa, i annan de laport, sa ki pa oule travay ale les sa ki oule travay reste pou travay. *Panel proceed* avek larepons.

(comments off-mic)

MR DEPUTY SPEAKER

Onorab Vidot, gard *calm*, silvouple gard *calm*.

Pa pou mwan, me pou bann dimoun ki la anler ki en pe pli vye ki nou. Annou montre respe. Mersi.

Panel, proceed.

VICE-PRESIDENT AHMED AFIF

Mersi bokou Mr speaker. Mr Speaker, avek ou permisyon mon ava demann *CEO* pou adres bann pwensyèl lo kote *Board* e ki bann komunikasyon ki nou'n annan. Mersi.

CEO ASHIK HASSAN

Mersi Mr Speaker. Mersi Vis-Prezidan.

Onorab, pou reponn ou kestyon wi komunikasyon ki ti sorti le 10 Zilyet ti ki dat pou ganny konfirman avek *staff* prezan nou'n fer sa nou pa ti le komet lo en dat egzakt, zis parey ozordi nou pa kapab dir zot i pou pare le 10 Out, le 15 Out.

E nou'n dir i pou pare avan lafen Out. Parey zot konnen odit i en prosesis e i annan bann *back and forth* ki arive avek oditer.

Nou ankor pe esper lenformasyon avek founnir pou konfirm balans e anmezir i antre odit i kapab ganny frenmen.

Se sa rezon ki nou pa'n donn en dat egzakt dan nou komunikasyon avek *staff* e nou pa'n anvi donn zot en *false* lekspektasyon osi.

So nou bezwen *manage* lekspektasyon nou bann *staff* e se sa ki nou'n dir li *tentative* nou pou konfirman. E dan *STC* nou pou kontinyen angaze avek nou *staff*.

I pou annan bann *email* bann kominikasyon bann *notices* ki pou ganny mete an mezir sa prosedir i *come to a close, ok?*

Aprè lo dezyenm kestyon Onorab *regarding to* bann *challenges* 2024.

Wi nou'n nou ti prevwar pou annan sa bann difikilte me selman dan sa kalite lendistri i pa parey ou pe odit en lakonpannyen Onorab mon pe donn en legzanp ki pe *trade* ek zis en *supplier*.

I fasil pou konfirm balans. Be *STC* i annan plizyer *suppliers*. *Ok*, kot *STC* nou fer sir nou diversifye nou portfolyo *suppliers* ki *provide* nou pou nou kapab ganny nou le meyer prodwir a le meyer pri *consistently*.

E sa i annan en lenpak i fer i agrandi ou *basket* ki ou bezwen ganny sa bann konfirman ek *suppliers*. Se sa rezon ki i pran letan. *Any* lakonpannyen ki pe *operate* dan en *FMCG* i pou gannyen sa bann difikilte.

Solman toudmenm nou rekonnet an alan pli devan nou annan bann sistenm elektronik ki nou oule enplimante ki pou ed nou *pick up* en pti pe pli vit lo odit.

E nou prezimen ki *next year* nou ava fer en pi pe pli byen e osi bann lannen ki swiv. Mersi Onorab.

HON SEBASTIEN PILLAY

Meeting Zeneral Anyel kan ki zot pou fer? Sa kestyon ki mon'n demande.

CEO ASHIK HASSAN

Mon leskiz mon'n mank sa bout. *Meeting* Zeneral Anyel i selman kapab konfirman ler odit in konplete.

So nou pa kapab konfirman en dat la. Zis parey nou pa kapab konfirm en dat kan bonous pou peye.

Ler odit i konplete la nou kapab set en dat pou *Meeting* Zeneral Anyel.

Solman si nou'n dir ki odit pou ganny peye avan lafen Out savedir sa *Meeting* Zeneral Anyel i bezwen ganny fer dan sa mwan *or* ou menm dan mwan Zilyet. Mersi.

MR DEPUTY SPEAKER

Mersi *panel*. Donk, mon satisfè ki lesansyel kestyon orizinal nou krwar egzaktaman sa bann retar e kan eski bann travayer pou ganny finalman ganny peye zot bonous in ganny klarifye.

Nou ava remersye *panel* pou zwenn nou. *VP* ou annan en pwen lo pou azoute ?

VICE-PRESIDENT AHMED AFIF

Wi, Mr Speaker. Mon ti oule zis fer sa le pwen ki en *AGM* i en *meeting* propriyeter li - propriyeter *STC* ki Gouvernman byensir e Gouvernman avan i tenir en

meeting AGM; AGM normalman i desid lo bann size tel ki re-apwentman direkter, apwentman oditer, *payment dividends*. Se sa 3 *items* normalman ki ou diskite dan en AGM.

E AGM normalman i fer apre ki kont odit in ganny fer, Gouvernman ki pou kriy sa *meeting* AGM. Se pou li aprouv kont. Se sa bann *checks and balances* i egziste.

Zis pou azoute Mr Speaker, pou konfirman sa ka ki devan lakour i en ka lo disparisyon 50 milyon Dolar. Napa okenn dout lo la. Mersi bokou.

MR DEPUTY SPEAKER

Mersi *panel*.

HON SEBASTIEN PILLAY

Be aköz ou pa ti reponn sa kestyon si *meeting* anyel pou ganny fer?...

(Interruptions)

MR DEPUTY SPEAKER

Silvouple. Onorab Pillay mon pe demann ou pou kit lasal silvouple. Kit lasal silvouple, kite, kit lasal.

(Interruptions)

MR DEPUTY SPEAKER

Onorab, silvouple, silvouple, silvouple, silvouple kan *meeting* anyel pou fer. In dir letan ki rapor finansyel i

konfirman, *staff* pou ganny enformen.

Ou pa zis pran *mic* la anndan ou'n fer li taler, mon'n regard ou, ou pou fer li ankor non, mon pa satisfè.

Silvouple kit lasal ou ava retournen ler nou rebran, pou ou ove konportman pou zis pran *mic* ler ou anvi dan lasal.

(comments off-mic)

MR DEPUTY SPEAKER

Wi, zis pou ou al laba kalmi en pti pe, apre ou ava retournen ller, silvouple.

(comments off-mic)

MR DEPUTY SPEAKER

Onorab Loze, Onorab Loze Onorab Loze sa komanter ki ou'n fer i pa byen pou ou servi sa remark ki ou'n fer menm si i *off-mic*, mwan mon'n tann ou, mon pe demann ou pou ou zwenn ou dirizan zot tou le de al dan zot *Caucus room* zot ava retournen ller. Silvouple mon pe demann ou ave Onorab Pillay pou kit lasal. Mersi.

(comments off-mic)

MR DEPUTY SPEAKER

Silvouple, Serzan mon pe demann ou Onorab Pillay avek Onorab pou kit lasal. Mon pe demann li pou ed mon kit lasal.

Mon panse mon pa ti'n dir mersi *panel* pou zwenn nou

bomaten. Nou eskiz zot, nou konnen zot annan bokou travay pou fer.

Mersi pou zwenn nou e bonn sans e bonn kontinyasyon lazournen ozordi.

Whip US mon vwar ou lanmen anler.

HON SYLVANNE LEMIEL

Onorab Lemiel. Mersi.

MR DEPUTY SPEAKER

Ou pozisyon ofisyel la anndan *is Whip right?*

HON SYLVANNE LEMIEL

Mr Speaker, ou ti pe koz ek mon *off-mic*, mon ti ava kontan konnen ki ou ti pe dir mon, e apre petet ti ava bon nou ganny keler sa de Onorab pe retournen ?

MR DEPUTY SPEAKER

Mon'n dir zot 11er.

HON SYLVANNE LEMIEL

11er, *thank you*.

MR DEPUTY SPEAKER

Koumsa la zot ava kapab zis kalmi en pti pe e lasal i ava tenir en pti pe. Parske depi bomaten zot en pti pe eksite.

Sa ki mon ti pe dir ou *off-mic so I am not repeating it on mic*. Mersi.

Mon ava demann *Hansard Reporter* pou apel lot *panel* ki pe zwenn nou e pou nou kontinyen avek *Question*

for Oral Answer e delegasyon i sorti Minister Lasante.

Mon ava dir bonzour e byenveni *panel* ki fek zwenn nou sorti kot Minister Lasante dirize par Minis Lasante, Mrs Peggy Vidot i akonpanyen par Sekreter Prensipal pour Lasante Dr Bernard Valentin.

E *panel* i annan kestyon 139 ziska 149 pou reponn.

Donk premye kestyon ki lo *Order Paper* dan *Question for Oral Answer* kestyon 139 dan non Manm Elekte pour distrik Anse Royale.

HON SYLVANNE LEMIEL

Mersi Mr Speaker. Bonzour Minis, avek *PS*. Bonzour tou bann dimoun osi ki dan Galeri sorti Glacis, tou mon bann koleg Manm Onorab tou dimoun a lekout. Mon kestyon i al koumsa Mr Speaker,

Eski Minis i kapab dir nou ki zistans zot in arive dan negosyasyon avek okenn lakonpanyen ki pe donn servis dyaliz Sesel? Mersi.

MR DEPUTY SPEAKER

Mon ava envit *panel* donn larepons.

MINISTER PEGGY VIDOT

Bonzour Mr Speaker, bonzour *Leader Zafer* Gouvernman, bonzour bann Manm Lasanble Nasyonal, bann dimoun ki dan Galeri tou dimoun ki pe swiv nou bonzour.

Mr Speaker, mon ava zis demann en pti leskiz mon pe osi ganny konman mon *panel Dr Louange CEO of Health Care Agency* ki'n ganny en pti retar pou li rantre. Mersi.

MR DEPUTY SPEAKER

Welcome Dr Louange. Minis, ou ava kapab proceed.

MINISTER PEGGY VIDOT

Mersi Mr Speaker. Mersi onorab pou ou kestyon.

Mr Speaker, diskisyon e avek negosyasyon lo koman servis dyaliz pou ganny donnen dan fitir e kontinyen nou espekte ki en solisyon final pou ganny arive definir ver konmansman lannen 2026.

Servis dyaliz pe kontinyen ganny delivre par sa fournisseur spesyalize ki pe donn sa servis pandan plizyer lannen.

An se moman nou annan 245 dimoun lo dyaliz. 224 lo Mahe, 16 lo Praslin ek 5 lo La Digue. Sa servis i kout Gouvernman en gran kantite. E apre an mwayenn R100 milyon i ganny servis zis pou nou donn sa servis sa bann dimoun.

Mr Speaker, an paralel avek sa negosyasyon, *Health Care Agency* in osi konmans en analiz konpreansiv pou evalye bann opsyon ki pli adapte pli ekonomik, pli soutenab pou nou isi Sesel.

Sa travay pe ganny fer an kolaborasyon avek *Procurement Oversight Unit* e atraver konsiltasyon avek bann lezot partner kle.

Nou kapab konfirman ki i annan omwen trwa lezot konpannyen ki apros nou pe eksprim zot lentere pou ofer sa servis.

E diskisyon preliminar in fini ganny fer avek fournisseur aktyel pou konsernan en laranzman tanporer, pou asire ki napa okenn enteripsyon dan servis pandan ki nou pe rod sa solisyon lonterm e ki nou bouz lo la.

Konsiltasyon entern ek analiz teknik pe kontinyen pou determinen si en nouvo model par egzanp kot servis i ganny donnen par nou menm nou *Health Care Agency* ki pou anmenn plis valer lo en lonterm, toultan prenon kont ki nou annan kapasite Nasyonal e prensip bon gouvrenans e fer sir ki standar medikal i ganny swiv toultan.

Pou lemoman napa okenn lakor formel ki'n ganny finalize. Bann diskisyon pe kontinyen baze lo konsiderasyon teknik legal e prosedir apropiye ki pe gid nou e ou pou swiv tou prosedir, tou Lalwa *Procurement* dan Sesel letan ki nou deside ki fason nou pou si nou arive donn en kontrakter deor *Health Care Agency* sa Kontra pou donn sa servis.

Mr Speaker, mon oule reasir Lasanble Nasyonal ek pep Seselwa ki prosedir pou ganny swiv avek gran responsabilite avek transparans e dan lespri ki i pou konsern nou pasyan ki depan lo sa servis.

Nou lobzektif i reste kler. Nou bezwen ed nou pep protez zot lasante e kontrol bann maladi kronik pou nou redwir bezwen pou zot al lo dyaliz. Sa i nou premye lobzektif.

Nou bezwen asire ki i annan kontini stabilite dan servis dyaliz ki ganny donnen. Nou bezwen osi fer sir ki nou annan meyer itilizasyon larzan piblik e nou bezwen ranforsi kapasite lokal pou ofer sa servis ki i bezwen dirab e i bezwen toultan rezilyan.

Mr Speaker, servis dyaliz i enn bann servis medikal esansyel dan nou Sistenn Lasante e mon Minister atraver *Health Care Agency* i reste *firm* dan son langazman pou asire ki sa servis i kontinyen donn en servis ki satisfere pasyan e ki reste finansyerman soutenab. Mersi Mr Speaker.

MR DEPUTY SPEAKER

Mersi *Minister*. Onorab Lemiel, ou annan siplemanter lo sa keston ?

HON SYLVANNE LEMIEL

Mersi Mr Speaker. Mersi Minis, pou ou larepons

eksplisit mon kapab dir byen detaye.

Mon ti ava kontan profit sa lokazyon Mr Speaker, letan nou lo sa keston pou nou remersi tou bann ners e dokter ki pe travay kot sant dyaliz, mon papa i enn bann dimoun osi ki lo sa tretman e mon annan bokou zabitan dan mon distrik osi ki lo sa tretman.

E toultan zot pe fer ou demann keston. E si sa keston in arive ozordi se gras sa bann dimoun dan mon distrik ki p dir demande aköz petet zot anvi konnen ki i arive.

Minis, dan sa ka nou dir ou nou remersi tou ou bann travayer ki pe travay ek sa bann dimoun e ki e donn zot sa bon swen.

Minis, ou'n dir nou ki zot in deza an kontak avek 3 lakonpannyen, me napa naryen ki konkret ziska prezan.

Petet nou Sesel vreman nou ti ou vreman pli kontan vwar nou bann dimoun zot menm nou bann profesyonnel ki nou annan pe *run* en sant dyaliz.

Me ou'n fer osi sorti ki ou pe asir kontinite stabilite e oule ranforsi kapasite lokal.

So mon ti ava kontan konnen si nou pe mazin enn parmi sa bann 3 i mazin donn sa servis nou menm enn parmi sa 3 ok ?

Mon ti ava kontan konnen Minis atraver mon kestyon si nou bann *staff*-nou bann dimoun ki dan seksyon dyaliz e zot bann dimoun kekfwa ki nou pe mazine anmennen eski nou konmanse donn sa donn zot sa kapasite sa *training* li menm pou ki nou menm nou, nou kapab *man* nou sant e petet *better* lo sa servis ki deza pe donner an mazinan ki kou i redwir, aköz parey ou'n nonmen R100 milyon par lannen ki i bokou.

Me kekfwa kwa ki ou pe mazin fer an term ou Minister pe fer an term donn kapasite nou bann dimoun lokal e avek lespri ki nou kapab *man* nou prop sant dyaliz. Mersi.

MR DEPUTY SPEAKER

Mon ava envit *panel* pou larepons.

MINISTER PEGGY VIDOT

Mersi Mr Speaker. Mersi Onorab. Onorab, mon remerci ou pou ou lapresyasyon nou *staff* parey ou dir, e i en servis ki i demann en kantite lo nou bann *staff* e mon kontan ki ou'n ganny sa lokazyon pou remersye zot piblikman koumsa. Sa i ede aköz lakantite fwa ki nou ganny bann kritik ki i demoraliz zot parfwa, me mon kontan mersi bokou.

Pou reponn ou kestyon Onorab. Mon'n mansyonn nou'n annan aproz par 3

fourniser. E ed nou menm nou *Health Care Agency* pe fer sa travay pou vwar, wi aköz nou pe rod en keksoz parey mon dir ki pli soutenab ki pli ekonomik e ki pli rezilyan. E si nou, nou pe fer li nou menm i posib i pou kapab nou pou kapab zwenn sa 3 lobzektif ki mon'n mansyonnen.

An term ki nou pe panse, wi, nou bezwen vwar kapasite ki nou annan lokalman. Mon ti ava kontan dir poudir ler ki nou ti donn sa servis en kontrakter en fournisseur etranze, tou *staff* sa lenterval ti *staff* ki ti deza dan Minister Lasante. *Staff* ki Minister Lasante ti'n deza *train*.

E ki sa bann *staff* mazorite zot, zot ankor la.

Nou osi fer pandan sa letan fer omwen de *staff* dan sa *unit* fer letid pli avanse dan en Liniversite *La Reunion* an menm tan avek *La France* pou zot ogmant zot kapasite.

Nou'n vwar par sa fournisseur ki pe fer konmela ki zot annan en lot grad travayer ki osi servi pou ed zot donn sa servis.

Zot apel sa *hemodialysis technician*. Nou'n fer en travay pou nou regarde konman sa *training* i fer ki son *curriculum* ki zot bezwen, ki kapasite ki zot annan e si sak kapasite ki zot bezwen i en keksoz ki isi nou pou kapab donner.

Nou pe deza travay avek *NIHSS*, pou vwar si nou, nou

pou kapab fer sa *training* lokalman, tout an pansan ki menm si avek en lot kontrakter me i ava pe servi nou dimoun Seselwa ki *train*. So si nu ki pran nou ava annan e si lezot dimoun ki pe vini i ava osi annan pou zot pran.

Alor wi nou pe pran tou sa an konsiderasyon akòz nou panse definitivman si nou pe anploy Seselwa i vin bokou pli bonmarse ki si nou pe anploy *expatriate*.

Wi, nou pe pran tou sa e pou sa ki pe pran en pe letan pou nou kapab arive vwar meyer fason ki sa servis i bezwen ganny donnen. Mersi.

MR DEPUTY SPEAKER

I reste nou en pti letan lo sa keston. Mon ava envit Onorab Arissol.

HON SANDY ARISSOL

Mersi Mr Speaker. Bonzour Minis avek ou dokter ki la ek ou devan. Mon ti ava kontan kontiny lo sa ki Onorab Lemiel in dir pou remersi bann *staff* ki travay kot dyaliz.

Parske mon osi mon annan fanmir e zanmi ki mon konnen ki fer dyaliz, i pa en parkour fasil e mon asire bann ners ki travay laba bann dokter bann teknisyen zot donn tou zot lenerzi.

E zis en pti klarifikasyon mon ti ava kontan demande minis mon aprann poudir

AMSA an relasyon avek manze ki i ti pe donn bann *staff* in arete. Mon pa konnen ki kantite korek i korek sa.

Zis pou nou asire ki nou bann *staff* ki pe deservi nou bann pasyan zot osi zot *ok* zot for, zot annan ase lenerzi pou donn *full* sipor nou bann pasyan ki vin dyaliz depi en zournen parfwa gran, maten ziska en pe lo tar.

Mon annan de pti keston ; mon ti ava kontan Minis avek ou bann dokter, mersi. Mon kontan pou La Digue osi omwen i annan en fasilite ki pli pre pou sa bann dimoun lo nou zil laba.

De pti keston mon ti ava kontan demann ou Minis, se premyerman dir nou kefwa letan nou epe koze konbyen pasyan ki nou annan ozordi ki pe ganny en servis dyaliz dan Sesel ? Si ou annan sa sif avek ou.

Dezyenmman, mon ti ava kontan demann ou avek bann dokter ki la kefwa pou eksplik nou konman Manm Lasanble bann dimoun dan Galeri, tou bann dimoun ki ou pe eksplike - ki staz en dimoun i bezwen al fer dyaliz ? Akòz en dimoun i bezwen pas atraver sa proses dyaliz ?

Zis pou nou lenformasyon pou bann dimoun ki pe ekout nou. Mersi bokou Minis, mersi Mr Speaker.

MR DEPUTY SPEAKER

Mon ava envit *panel* pou donn en larepons.

MINISTER PEGGY VIDOT

Mersi Mr Speaker. Mersi Onorab. Ankor mersi pou ou lapresyasyon ki ou'n eksprimen pou nou *staff*. Mon plis ki sir zot pe ekout nou e zot pe santi zot valorize.

Ou'n demann nou en kestyon si *staff* in aret ganny manze avek AMSA ? Mon pou les Dr Louange konman CEO reponn sa kestyon.

Nou annan 245 dimoun ki pe fer dializ an se moman, parey mon dir 224 isi Mahe, 16 Praslin e 5 lo La Digue.

E menm si nou annan zis 5 La Digue, nou'n vwar li neser pou nou fer pasyan pli konfortab nou'n konmans sa servis laba.

E ki staz kan ou'n ariv dan en maladi ronnyon ki ou bezwen dializ, an vi ki sa kestyon i teknik Mr Speaker se mon kapab demann Dr Louange pou eksplike silvouple.

MR DEPUTY SPEAKER

Please proceed Dr Louange.

CEO DR DANNY LOUANGE

Mersi Mr Speaker. Mersi Onorab pou ou kestyon. Bonzour Mr Speaker, bonzour tou bann, Manm Onorab e bonzour bann dimoun ki a lekout.

Wi, pou premye kestyon lo kote manze pou *staff*; wi, AMSA i furni bann snak pou *staff* e aköz ou'n demann sa kestyon mon krwar i annan en nesite pou mon revwar ankor egzakteman ki zot pe furni, pou nou fer sir ki nou *staff* e konfortab.

Lo kote dializ aköz en pasyan i bezwen dializ? An bref en pasyan i bezwen dializ pou li kapab aköz son ronnyon in afekte, son ronnyon pa pe fonksyonnen, son ronnyon pa pe fonksyonn *to* en nivo kapab tir tou sa bann *toxin* dan son lekor.

Alor letan in ariv sa, i bezwen al lo en masin ki fer en pe parey ronnyon i fer. Selman dializ - masin dializ pa fer tou fonksyon ki ronnyon i fer.

So i zis tir bann *toxin*. I annan bann lezot medikaman ki ou bezwen donner aköz letan ronnyon in *fail*, i annan bann sibstans ki sorti dan ronnyon ki ede pou fer lekor marse, parey bann *hormones* sa ou bezwen ranplase.

So alor me masin dializ i pe zis tir sa bann *toxin* ek delo ki ronnyon i fer normalman sa an bref. Mersi Mr Speaker.

MR DEPUTY SPEAKER

Mersi Dr Louange. Nou pou zis demann bann Manm pou *bear with me* lo *time management* aköz nou annan 10 kestyon. Be prezan si nou

pou mon e mazine pou nou kapab donn apeare 15 minit *per question* larepons siplemanter.

So parey la sa enn nou ti konmans 6 so 15 minit i tonm 22, *so we have to move on next* kestryon kot nou kapab fer lekonomi nou ava donn en pti pe plis kestryon siplemanter parey *next* kestryon i pou zis lo Port Glaud pa pe espekte gran longer lo la, donk Onorab Aglae *you are next* pou kestryon 140.

HON EGBERT AGLAE

Mersi Mr Speaker. Bonzour bann envite ki dan Galeri e tou Manm Onorab. Kestyon *comme* swivan;

Eski Minis i kapab dir ek sa Lasanble ki bann travay ki'n ganny fer e ki reste pou fer kot sa de Sant Lasante dan distrik Port Glaud ? Mersi.

MR DEPUTY SPEAKER

Mon ava envit *panel* pou donn en larepons.

MINISTER PEGGY VIDOT

Mersi Mr Speaker. Mersi Onorab pou ou kestryon.

Onorab, parey ou konnen sa de Sant Lasante dan distrik Port Glaud zot parmi bann enfrastruktir pli vye dan *Health Care Agency*.

I pa'n annan bokou travay ki'n ganny fer lo sa de sant pou en bon pe letan.

Nou'n konmans avek Sant Lasante Port Glaud kot nou'n fini repenn sa sant anndan ek deor nou'n sanz bann lafnet ek bann laport ki ti bezwen ganny ranplase.

Nou'n aranz fasilite pou *staff* parey en pti lakwizin ek en pti landrwa kot zot kapab asiz pou zot fer zot manze. Nou'n aranz lasal kot nou'n donn tretman.

E nou'n osi refer diferan travay anndan parey bann *cabinet* parey bann keksoz koumsa.

So lo Port Glaud nou'n fer n bon pe travay e nou'n krwar ki nou'n anmenn li en nivo kot nou kapab donn swen esansyel dan sa kominote.

Pou Sant Lasante Béolière, nou'n sanz twa sa ti ganny ranplase lannen pase. Travay ki reste pou fer i enkli ranplas sistenm elektrik ek sistenm plonbaz aköz zot vremen vye, ranplas tou bann laport ek bann lafnet ki andomaze, repenn antye, konstri en miray kot lanbilans i park, amelyor landrwa kot pasyan pe espere dan nou *waiting area*.

E avek lasistans *Seychelles Infrastructure Agency* nou'n devlop lanpler travay ki nou panse i bezwen ganny fer lo sa sant.

E ler nou'n fer sa legzersis nou'n vwar ki i ankor annan keksoz ki nou'n bezwen azoute. Nou bezwen refer

bann krepisaz aköz diferan landrwa sa in ganny degrade.

Nou bezwen ranplas tou bann *tiles* ater ek kot plafon ankor i ankor andomaze, nou bezwen refer en bon pe lezot keksoz ki oparavan i pa ti vizib ziske ler en enzenyer in fer vremen sa bann travay.

E sa se vremen letan zot pe dir nou, poudir aköz i annan en kantite defi avek sa *building* ki i en batiman ki'n ganny fer avek laso, e sa i fer li difisil pou serten travay ganny fer.

Nou pe esper plis gidans teknik avan nou konmans okenn travay aköz nou'n ganny dir ziska prezan sak fwa ki nou pe vwar bann lezot keksoz ki bezwen ganny fer nou vwar ki Bidze pou sa louvraz in ogmant.

E alor avan ki en desizyon lo kan nou pou konmanse fer sa bann keksoz ki i bezwen ganny fer nou bezwen vwar son kou an antye. Me i annan kantmenm travay ki nou pou fer ki byen bezwen ganny fer zis pou amelyor sityasyon e sa nou ava ganny gidans avek *SIA or Seychelles Infrastructure Agency*. E sa i an gro mon repons Mr Speaker, mersi.

MR DEPUTY SPEAKER

Mon ava envit loter Mosyon pou siplemanter. Onorab Aglae.

HON EGBERT AGLAE

Minis, mon ava dir ou mersi pou ou larepons. Minis, premyerman lo kot sa fasilite Port Glaud santral mon pou apel li, i annan serten travay ki'n ganny fer ki letan nou regarde, i pa a laoter pou en fasilite lasante.

Eski petet mon ava rekomande osi, ki i bezwen annan mon pa konnen si kontrakter in fini ganny peye, me selman ki en *oversight visit* i bezwen ganny fer regard sa kalite travay ki'n ganny fer. Wi, batiman i vye mon'n pas dan serten klinik ki batiman i vye me selman ou vwar *maintenance* in ganny fer byen.

Eski nou kapab petet vwar ansanm ki mannyer nou kapab amelyor sa kalite travay ki'n ganny fer, aköz i annan en kantite defo mon pou dir, mon pa pe blanmen, me selman mon pa pe blanmen selman mon pe vwar defo.

Dezyenmman Minis kot i konsern klinik Béolière an vi ki pa sir kan eski nou kapab vwar en travay en pti pe pli mazer fer. Eski dan la tandan vi ki i annan sa bann *minor* ki kapab ganny *deal* avek *ok*, parey i annan serten landrwa kot *waiting area* ki i annan serten *issues*, nou pe vwar serten landrwa ki merit tous en pti gin pou annan la prop lizyenn en pti pe pli byen mon kapab dir.

E bann lasanm kot bann *staff* pe ganny servi pou fer zot bann travay li menm, ki demann serten pti latansyon, eski sa pa kapab ganny konsidere an menm tan ki ou pe mazin en pli gran plan kot nou kapab vin en lo en *major repair* kapab ganny fer pou lannen prosen, mon pa konnen ki Minister i ava kapab *at least now* sey soulaz en pti gin sa landrwa li menm. Mersi.

MR DEPUTY SPEAKER

Panel larepons?

MINISTER PEGGY VIDOT

Mersi Mr Speaker. Mersi Onorab. Onorab, bann ki'n ganny fer i ganny sipervize *SIA* e zot ki annan sa manda pou verifye e regard bann travay ki pe ganny fer dan bann batiman ki dan ki dan batiman Gouvernman.

E in annan serten – wi, keksoz ki'n ganny eksprimen lo kalite travay e ki'n ganny fer par sa kontrakter. Wi, e *SIA* i sa lazans ki pou regard sa.

Lo kote wi, eski i annan travay ki nou pe kapab ganny fer pou le moman. Nou annan en Bidze ki nou ti'n deza mete pou Sant Lasante Béolière, e parey mon'n dir *SIA* pe regarde ki sa ki pou kapab ganny fer avek sa ki nou annan.

Me tout an prenon kont ki i annan travay gro travay

mazer ki bezwen osi ganny antreprann.

E ler zot ava donn nou sa i tre probab ki sa lannen en pe sa bann keksoz i ava gannyen aranze. Mersi.

MR DEPUTY SPEAKER

Nou ava annan letan pou en lot siplemanter, Onorab Esparon.

HON REGINA ESPARON

Mersi Mr Speaker. Bonzour Minis, avek ou delegasyon.

Mr Speaker, avan mon demann mon kestyon, mon anvi demann mon bann dimoun dan Galeri eskiz pou sa bann malelve ki zot in trouve, ki'n arive pli boner ki pa ti neser, *ok?*

Mon kestyon se Minis, eski ou Minister pe mazin anbark lo en program renovasyon kontinyel lo lezot klinik ki pli vye parey klinik Port Glaud e la mon pe mazin klinik Glacis pou fer ki zot reste an bonn fonksyonman pou benefis bann zabitan? Mersi.

MR DEPUTY SPEAKER

Mon ava envit *panel* pou en larepons.

MINISTER PEGGY VIDOT

Mersi Mr Speaker. Onorab, nou annan en kestyon pli tar pou pe ganny demande lo bann travay ki nou'n fer dan

bann diferan Sant Lasante ek lopital.

Wi, i nou lentansyon, pou fer sir ki tou bann sant ki nou annan i dan en meyer leta posib ki pou nou donn swen ki nou ti ava dezire donnen.

E an menm tan donn konfor nou bann pasyan e nou bann kliyan ki vin dan sa bann swen, e an te-nan kont toultan ki nou annan en resours ki pa neseserman permet nou fer tou keksoz a la fwa.

Me a pli tar mon krwar mon pou ganny lokazyon poudir lakantite keksoz ki nou'n kapab fer ziska prezan.

Me pou klinik Glacis wi, i annan keksoz ki nou'n fer deza e nou ava regarde an mezir ki nou ale parey tou lezot sant ki mannyer nou kapab aranze. Mersi.

MR DEPUTY SPEAKER

Mersi pou sa larepons Minis. In anmenn nou ler pou nou pran en *adjournment* aprezan. Nou rezwenn 11er bomaten pou nou kontinyen avek *Questions for Oral Answer*.

(BREAK)

MR DEPUTY SPEAKER

Welcome back tou dimoun. Nou ankor annan delegasyon sorti kot Minister Lasante, dirize par Minis Peggy Vidot avek nou e akonpannyen par Sekreter Prensipal, Dr

Bernard Valentin, avek Sef Egzekitiv Lazans Swen Lasante, Dr Jude Louange.

Nou kontinyen avek bann kestyon. Kestyon 141 i dan non Manm Elekte pou distrik Au Cap.

HON KELLY SAMYNADIN

Mersi, Mr Speaker. Bonzour Minis avek ou delegasyon ensi ki tou dimoun ki a lekout.

Kestyon 141 i lir koumsa, eski eski Minis i kapab donn Lasanble detay lo bann fasilite ki pou ganny ofer dan Sant Lasante Rezyonal Anse Aux Pins la ki sa sant i an dan konstriksyon? Mersi.

MR DEPUTY SPEAKER

Mon ava envit *panel* pou larepons.

MINISTER PEGGY VIDOT

Mersi. Mr Speaker, mersi Onorab pou ou kestyon. Onorab, apre en bon pe letan ki diskisyon, in ganny fer lo sa nouvo Sant Lasante pour distrik Anse Aux Pins e pou rezyon les dan lepase, e ki in annan en kantite ale vini lo kote ki nou met sa nouvo sant, Gouvernman in pran desizyon pou met Bidze dan sa pou nou fer sa sant, lannen pase e sa lannen.

Nou ti met premye pyer le 26 Fevriye sa lannen e parey i leka avek sa Gouvernman, kan nou met premye pyer en premye pyer i ganny mete

konstriksyon sa batiman i konmanse, ou si non i fini.

Mon kontan pou dir ki zot kontrakter ek mobilize lo sant Ile Soleil kot sa sant pe pou ganny fer e in konmans travay.

Ou keston, ki kalite aktivite pour annan, ki servis nou donnen dan sa sant, i montre ki nou fer bann servis ki pou zwenn ki pou reponn lobzektif pour amelyor sa sant.

Nou pou fer sir ki kalite lasante, ki pour popilasyon les Mahe i ganny donnen dan en landrwa ki konvenab, ki modern, e kapab anmenn en leksperyans meyer pou bann pasyan ki vin vizit li.

Tou bann servis an se moman ki nou pe donnen dan Sant Lasante Anse Aux Pins, nou pou kontinyen avek. Me an vi ki sant i pou oli modern pou donn nou plis plas, nou pe annan nouvo servis ki konmela nou pa pe fer.

I en servis ki nou pou pe donnen, par egzantp, se fizyoterapi. Kot nou annan pa mal dimoun dan sa rezyon ki bezwen sa servis, e ki zot bezwen deplase pou zot al gannnen, sa i pou annan.

Nou pou annan en laboratwar, kot pou bann test ase senp ki dokter i pou bezwen pou fer en desizyon ase vit i ava kapab ganny fer.

Nou pou annan nou lasal konsiltasyon ki pou pli byen ekipe. Par egzantp nou pou

annan *ultrasound* e nou bann dokter i ava kapab fer serten egzaminasyon ki pou ed zot ariv a en dyagnostik. E en fason ki mannyer pou *manage* sa case pli byen.

Nou pou annan konsiltasyon par bann spesyalis ki pou vizit sa sant. Nou pou annan lekipman pou nou fer egzaminasyon lizye, ki an moman nou napa.

E nou pou pe fer bokou plis servis prevansyon ki *layout* sa batiman, avek tou sa bann keksoz ki nou pe fer pou permet nou fer.

E konman en Sant Lasante i parey sa - nou sant Lasante nou pou pe fer sir ki tou sa ki nou pe fer ladan i pe promouvwar lasante.

Alor en gran lanfaz pou lo servis prevansyon.

Nou espekte ki konstriksyon pou konplet avan lafen lannen 2026 e ki sa sant i ava kapab operasyonnel e ki bann sitwayen dan rezyon les i ava kapab annan en meyer fasilite kan zot bezwen swen lasante. Mersi Mr Speaker.

MR DEPUTY SPEAKER

Mon ava envit loter keston pou siplemanter.

HON KELLY SAMYNADIN

Mersi Minis, pou ou larepons lo sa keston.

Mon premye keston siplemanter ki mon ti ava

kontan demande se, prenon kont bann nouvo servis ki pou pe ganny donnen dan sa sant, so mon ti ava kontan konnen si pou annan sanzman dan ler loperasyon sa sant rezyonal dan bann fasilite pre nan kont bann fasilite ki pe ganny ofer ?

E dezyenmman mon ti ava kontan konnen, an vi ki lokasyon pe al sanze i pou lo Ile Soleil aprezan, so mon ti a kontan konnen si i annan laranzman ki Minister Lasante pe fer avek SPTC prenon kont bann dimoun ki pou pe vin servi sa sant ; bann dimoun aze, bann zanfan, bann dimoun petet ki i annan serten dezabilite si i annan laranzman ki pe ganny fer pou servis bis pou ariv kot Sant Lasante i ete avek bi pou zot kapab akse sa sant pli fasilman ? Mersi.

MR DEPUTY SPEAKER

Nou ava envit *panel* pou en larepons.

MINISTER PEGGY VIDOT

Mersi Mr Speaker. Onorab, letan nou pou pe konmanse pou an 2026, nou panse ki nou pou gard ler louvertir konman i ete, ziska ler nou al fer serten analiz pli profon dan sa letan pou vwar si annan en bezwen pou ogmante - pou sanz ler servis.

An sa ki konsern transportasyon, wi, i pe annan en diskisyon kot larout bis, e i

ava kapab petet sanze pou fer sir ki dimoun aksesibilite avek Sant Lasante i ava pli bon pou bann dimoun ki i bezwen vin vizite. Mersi.

MR DEPUTY SPEAKER

Nou annan letan pou en siplemanter lo sa kestyon. Onorab Arissol, ou ti'n lev lanmen lo la.

HON SANDY ARISSOL

Wi, mersi Mr Speaker. Mersi Mini,s pou bann larepons ki ou pe donnen.

Mr Speaker, mon kontan sa repons ki Minis in donnen an relasyon avek bann servis zot pou donnen dan sa nouvo sant modern ki ou'n koz lo la Anse Aux Pins.

Be pli boner ti annan sa kestyon ki Onorab Lemiel ti demande an relasyon avek dyaliz AMSA.

Mon pe mazin en kekfw a lavenir - an ki an mazorite bann pasyan ki vin santral se bann pasyan ki sorti en pe dan sid pou dyaliz - kekfw a lavenir avek resours ki nou ava kapab gannyen, avek plis teknolozi en pe plis lekipman, eski Minister Lasante zot pe mazin osi desantraliz en pe sa servis dyaliz pou nou bann pasyan sirtou ki reste dan sid ?

Parski i annan osi sa konponan letan zot in ariv dyaliz, apre i annan sa konponan retourn dan lakour,

ki parfwa zot ki reste en pe pli dan sid, zot ganny en pe plis difikilte. Kekfwa bann en pti pe pli an retar.

Zis kekfwa dan letan zot konman en Minister zot pe fer zot travay, pou zot gete ki mannyer nou anmenn sa servis sirtou dyaliz en pe dan sid pou desantraliz en pti gin swa Anse Royale swa menm Anse Aux Pins la ki al avek sa nouvo servis, pou zot mazin sa dan zot bann desizyon ki zot fer ? Mersi Mr Speaker.

MR DEPUTY SPEAKER

Mon ava envit *panel* pou larepons.

MINISTER PEGGY VIDOT

Mersi, Mr Speaker. Mersi, Onorab, pou ou sizesyon. E i toultan dan plan Minister Lasante pou nou kapab regard desantralizasyon nou bann servis. O firanmezir ki resours i permet nou.

E konman ou'n demann nou servis dyaliz, wi, nou'n fer en travay pou nou vwar konbyen dimoun dan rezyon sid ek les ki pe servi servis dyaliz pou nou vwar si i annan sa neseseite.

Mon panse parey ou pe dir i en pe lwen, bann dimoun par egzanp ki sorti Takamaka ki pe desann, Baie Lazare i lwen pou zot pase pou pran sa servis.

Me selman pou lemoman, par egzanp ti annan

ki ti pe sorti la Digue ti bezwen travers lanmer e sa ti pli menm si norm ti mwens sa ti pli nesaser. E alor pou konmanse nou'n desantraliz li laba.

Me i toultan part nou plan. Pou lemoman nou pa kapab dir ou nou pou fer li tel dat tel lannen. Me i par plan pou nou desantralize. Mersi.

MR DEPUTY SPEAKER

Mon ava envit *Leader* Lopozisyon pou siplemanter lo sa kestyon.

HON SEBASTIEN PILLAY

Mersi. Minis ou'n dir avek nou ki travay in fini konmanse lo sa *Health Centre*.

E eski ou kapab dir Lasanble lekel kontrakter ki pe antreprann sa louvraz e ki egzakteman ler ou dir nou travay ki'n fini konmanse ki ou pe dir nou bann travay ki'n fini konmanse lo sa *Health Centre* ? Mersi.

MR DEPUTY SPEAKER

Mon ava envit Minis pou larepons.

MINISTER PEGGY VIDOT

Mersi bokou, Mr Speaker. Mersi, Onorab, pour ou kestyon. Onorab, wi, nou kapab dir ou lekel sa kontrakter e kan zot ti mobilize e pou konmans travay.

Me, Mr Speaker, si ou permet mwan, mon ava demann Dr Louange, konman CEO, ki annan en repons pou sa pou donner silvouple.

MR DEPUTY SPEAKER
CEO?

CEO DR DANNY LOUANGE

Mersi Mr Speaker, mersi Onorab pou ou kestyon. Wi, pou sa sant rezyonal, nou'n fini siny en Kontra avek sa kontrakter. Nou'n siny kontra lo konmansman sa mwan, Zilyet.

E sa kontrakter i *Dubai Civil Engineering Limited*. E ti ganny ti ganny *awarded* baze lo prosedir ki annan an plas *POU Tender Board*.

E osi nou'n travay pre avek *SIA - Seychelles Infrastructure Agency* pou dan sa *tender process* dan son *scope of work* - dan bann *BOQ and so on*. So nou'n travay tre pre avek zot.

Apré ki nou'n siny sa Kontra, nou'n - *SIA* in donn permisyon sa lakonpannyen pou nou *move lo site*. E letan Minis in dir travay in konmanse vedir ki nou'n donn permisyon pou konmans mobilize, konmans *set up* zot lenfrastruktir e konmans prepar teren pou zot fer zot bann keksoz ki zot fer.

Mon pa en spesyalis ladan, me mannyer mon konpran zot bezwen fer sir i i

ganny bare ki bezwen annan *storage*.

So an bref kontrakter Kontra in ganny sinyen kontrakter in ganny permisyon pou *move lo site* pou konmans travay. Mersi Mr Speaker.

MR DEPUTY SPEAKER

Mon ava aprezan pas lo lot kestyon sa i, kestyon i nimero 142. E i dan non Manm Elekte pour distrik Mont Fleuri.

HON MICHEL ROUCOU

Mersi Mr Speaker. Bonzour Minis avek ou lekip bonzour tou zabitan Mont Fleuri tou mon bann koleg Onorab.

Mr Speaker, si ou kapab permet mon pou mon remerisi sa gran fanmir *LDS* Mont Fleuri ki nou ti *flood* sou distrik Corgate Estate.

Mr Speaker, mon kestyon i koumsa: Eski Minis i kapab dir Lasanble ki zistans bann travay in arive lo *maintenance* kot Lopital Sesel? E ki reste pou fer? Mersi.

MR DEPUTY SPEAKER

Mon ava envit *panel* pou larepons.

MINISTER PEGGY VIDOT

Mersi, Mr Speaker. Mersi, Onorab, pour ou kestyon. Onorab, letan nou regard Lopital Sesel nou konnen ki i'n ganny konstrir depi bokou letan pase.

E son konstriksyon in ganny fer an plizyer faz. I annan bout ki bokou pli nouvo me i annan bout ki kantmenm in ganny fer ase lontan.

E zot in ganny fer sipoze al lenterval avek bann materyo konstriksyon ki ti disponib dan sa lenterval.

Alor i annan bout batiman ki vye e demann en kantite travay *maintenance* ki nou vwar nou pe fer. Mon vwar ou souvan pe pase Onorab kot lopital e alor mon plis ki sir ou'n vwar pou ou menm serten keksoz ki nou'n deza konmans fer

Nou'n fer bokou zefor pou nou amelyor laparans nou lopital afen ki i nou kapab kontinyen ofer en lanvironnman ki prop ki apropiye e pou nou donn sa swen medikal ki nou bezwen fer.

Travay *maintenance* lo Lopital Sesel parey mon dir pe ganny fer an faz akòz nou annan diferan bout e sakenn i annan diferan nesesite e pou fer diferan kalite louvraz.

En gran porsyon sa bann travay in fini. Par egzamp, letan nou regarde en lenterval Onorab ou ti ava konnen e kekfwà ou menm ou ou'n deza dir nou poudir nou annan konplent lo kantite, lo la kalite lasanser ouswa *lift* ki nou annan.

E si ou'n pase ou'n vwar, nou'n sanz tou sa bann *lift*.

Nou annan 4 *lift* e menm bann ki pa ti pe marse pou en bon pe letan sa in ganny tire e in ganny aranze.

Nou'n fer renovasyon lo plizyer landrwa. Nou ti annan *Labour Room* kot ankor nou ti annan en kantite konplent e ti annan en kantite travay ki'n ganny fer, nou'n bezwen frenmen bouz *Labour Room* en lot landrwa pou nou kapab aranz sa landrwa pou fer li konvenab e sa in fini ganny fer.

Nou'n bezwen sanz en *ward* re aranz li re met bann diferan lekipman e menm bann keksoz parey *medical gases*, akòz nou ti vwar poudir *ICU* ki nou ti annan pou 6 lili ti tro pti pou kalite *occupancy rate* ki nou ti annan.

Nou'n bezwen sanz sa *ward* pou nou fer li vin en 14 *bed* - 14 lili pou *ICU*.

Nou'n re aranz klinik kot maternite. Nou'n repenn nou'n remet *aircondition* nou refer aranz en pe son bann landrwa kot dimoun i atann.

Nou'n vwar *ward pharmacy* kot ti bezwen en kantite travay repenn re aranze pou fer sir nou gard nou latizann dan meyer fason posib e ki lanvironnman i pli agreab pou bann dimoun travay.

Si ou'n pas anler kot nou fe bann nou steriliz bann keksoz pou swa lasal loperasyon swa pansman ki

nou, nou apel CSSD - *Central Sterile Supply Department* ou vwar poudir en kantite travay in ganny fer pou reorganiz son *flow*, pou fer sir ki i annan pli bon fason travay kot bann keksoz ki sal pa antre dan serten landrwa kot i bezwen ganny garde prop. E en kantite travay in ganny fer la pou nou kapab osi enstal bann masin pli modern pou nou fer sir ki nu sterilizasyon i pli a la oter.

Nou'n bezwen re-aranz en lasal operasyon nimeron enn pou fer sir ki i an bon leta pou opere. E pou sa i ankor i en gran travay nou'n bezwen sanz son *flooring* an antye. Nou'n bezwen re-aranz bann *aircondition* e tou keksoz dan lasal.

Nou'n re-aranz sistenm atimizasyon pou lasal loperasyon ki santralize e sa osi sa sistenm i donn nou delo so pou lopital.

Ankor en lot konplent kot nou ti napa delo so, tousala in ganny rezourd.

Nou ti annan en zenerater kot nou ti bril bann *waste* sorti lopital ki ti don nou pa mal problem. E sa nou'n bezwen refer, re-aranze e remet en masin nouvo.

Nou'n repenn. Si ou rantre dan lopital ou vwar lamazorite landrwa in repenn i paret bokou pli prop e menm bokou pli nef ki oparavan.

E pa zis dan bann *ward*. Menm si ou regard sa vye

bilding twa rouz, ki twa zonn ou si non twa ver, tousala in ganny penn e travay pe kontinyelman ganny fer lo sa bann landrwa.

Nou kapab dir poudir i annan en kantite travay ki nou'n pe kontinyelman fer, ki nou'n fini fer, e sa ki pe ganny fer aktyelman, ki i an renovasyon lo sa *mortuary* ki lakaz mor ki nou annan.

Nou annan renovasyon, lo bann lasal sa de lezot lasal loperasyon. Nou annan travay ki nou pe fer lo *ICU* pour bann pti baba ki nou dir *neonates*. Nou pe aranz servis danter ek *maxillofacial* - en lasal pou zot kapab donn plis travay.

Nou'n ganny kantmenm pa mal problemm avek *casualty* aköz *casualty* son bilding li i enn ki'n fer ki'n antase avek sa gran sa *block surgical* e souvan nou vwar ki nou ganny problemm aköz *tiles* i pete e ler sa i arive nou bezwen ferm en bout e refer *flooring* remet *tiles* partou. Nou'n aranz en bout nou *casualty* i annan en bout ankor ki bezwen kontinyen fer.

Nou'n pe aranz laboratwar pou nou fer sir ki i annan plas i pou tou bann lekiman modern ki nou annan.

Nou'n bezwen aranz en landrwa pou nou annan en *server room*, aköz parey ou konnen nou'n entrodwir en *health information system* e

nou bezwen *servers* ki nou bezwen gard nou bann lenformasyon ladan.

Nou'n realize ki avek mannyer lopital in ganny fer e nou bezwen annan *aircondition* en pe partou olye ki en *central aircon*.

E sa in don nou en pa mal problem, kot nou vwar lo diferan miray i annan bokou kondansasyon e sa i fer ki in anmenn en pe avek *fungus*. Me enn nou bann keksoz ki nou fer an term *maintenance* se toultan fe sir an se moman ki nou pe konman i konmanse ki nou pe atak li.

Tou sa bann travay pe ganny fer, avek sa bi pou nou moderniz nou sistenm, pou nou moderniz nu fasilite pou nou amelyor kondisyon kot nou donn swen lasante e an menm tan amelyor kondisyon kot nou bann travayer pe travay.

E pou asire ki pasyan ki servis ki zot gannnen i efikas e i dan en lanvironnman ki prop ki konfortab e sekirize.

I reste ankor travay pou kontinyen e sa ki mon ava dir poudir travay *maintenance* lo lopital i pa fini aköz i kontinyel. Aköz a sak fwa ki i annan en bout ki kase nou ale pou nou aranze.

So me selman i bokou aköz nou bann lenfrastruktir i kantmenm ase aze e nou fer nou mye e pou se sa rezon ki nou'n vwar poudir nou bezwen

mazin en nouvo lopital. E parey zot konnen nou pe fer deza en pe letid pou nou vwar annan en nouvo lopital e en plan pou nou fer en bon plan ki pou konmsi reponn a nou lobzektif. Mersi.

MR DEPUTY SPEAKER

Mon tenir kont ki sa kestyon *panel* ti'n demande pou zot reponn li ansanm ek kestyon 144.

Me selman apre letan mon'n regete mon'n vwar aköz 42 - 142 i koz plito lo Lopital Sesel e 44 i *extend* lo bann lezot klinik ki Minister pe zere. Donk, mon swete ki zot kapab donn en larepons pli tar lo la.

E sa kestyon i ouver e mon konpran lentere bann Manm me selman *let's be mindful of time management*, loter kestyon ou annan siplemanter.

HON MICHEL ROUCOU

Mersi Mr Speaker. Minis, mersi pou ou larepons. Mon vremen zwaye ki lo bann lo bann plizyer bann pwen ki ou'n tous lo la mon annan ki mon ti anmenn kestyon dan lepase parey kot zot *incinerator* ki'n kapab ganny repare ki sa i ava ed zabitan Hermitage.

Minis, mon kontan sa travay ki ou pe fer ek ou lekip mon dir ou mersi aköz Lopital sesel i tonm dan mon distrik Mont Fleuri tanzantan mon fer

en pti vizit laba mon vizit zot bann pasyan.

Minis, si ou kapab dir nou konbyen in kout ou Minister pou bann renovasyon ki zot pe fer e ler mon fer vizit mon vwar sa transformasyon mon vwar sa ki mannyer ou bann pasyan i konfortab, aköz ou vwar poudir lo nivo lizyenn li menm li in aranze.

E si ou kapab dir avek nou li menm li e ki plan Minister i annan pou zot apre sa gran renovasyon ki zot pe fer pou zot kapab kontinyen *maintain* lopital ki i pa retourn dan bann leta ki i ti ete oparavan ? Mersi.

MR DEPUTY SPEAKER

Mon ava envit *panel* pou en larepons?

MINISTER PEGGY VIDOT

Mersi Mr Speaker. Mersi Onorab, pou ou kestyon, Mr Speaker, si I posib mon ti ava demann Dr Louange pou donn en detay lo bann diferan kou ki bann diferan keksoz in kout nou.

E mon ti ava kontan osi asir Onorab poudir ki nou'n pran nou determinen pou nou pa les keksoz avarye e pou apre kout nou en gran kantite.

Alor nou annan kontrakter sirplas, ki fer sa bann *maintenance* firanmezir i bezwen ganny fer. Mersi Mr Speaker, si mon ava demann Dr Louange.

MR DEPUTY SPEAKER

Please proceed, CEO.

CEO DR DANNY LOUANGE

Mersi Mr Speaker. Mersi Onorab pou donn nou sa lokazyon poudir konbyen nou'n depanse lo sa bann proze. Selman mon pou *focus* lo bann gro travay ki nou'n fer.

Pou Lopital Sesel nou'n annan en Kontra avek en lakonpannyen pou *maintain* sa lopital li menm *Red Roof, Yellow Roof, Blue Roof, Green Roof* avek tou bann lezot fasilite ki nou annan lo *campus*.

E sa in kout nou pou *maintain* in kout nou apepre 660 mil par mwan. So in en valer apepre 7 milyon pou par an.

E pou penn nou'n osi annan en Kontra avek lakonpannyen in pran nou 5. 5 milyon ki nou'n servi dan nou Bidze pou fer penn. I ankor annan travay pe kontinyen sirtou lo kote pou penn.

Apre i annan osi bann lezot travay. Letan zot pe fer *maintenance* zot vwar ki i annan bann lezot travay ki zot bezwen fer. Parey Minis in I'n *list out* parey *labour room*, la nou pe fer *NICU - Neonatal ICU*. I annan *casualty*, tousala i annan bann lezot kou ki i vin avek. E sa bann *estimate* i apepre plis ki 4 milyon letan

ou pe met tou sa bann travay ansanm.

Aprè osi nou'n fer *lift* ki Minis in koz lo la in kout nou letan nou'n fer en *estimate* ki apepre 4 milyon letan ti enkli bann *civil works* osi ki nou ti bezwen fer pou nou kapab adapte sa bann *shaft* pou nou kapab met sa bann nouvo *lift*.

So an gro Mr Speaker, si ou permet i annan plis ki 12milyon ki nou'n depanse lo *maintenance* avek sa bann lezot travay ki nou'n fer lo Lopital Sesel.

I ankor annan pou fer e nou pe fer li an faz akòz *again* resours e pli enportan osi nou oule fer osi ki nou pa deranz servis ki in nou priyorite osi. Mersi.

MR DEPUTY SPEAKER

Mersi *CEO*. Mon vwar ki sa i en topik enteresan ki lo li menm ti kapab zis en *statement*, me kestyon letan nou pou bezwen bouze lo sa lot kestyon 143 ki dan non ankor Manm Elekte distrik Mont Fleuri.

HON MICHEL ROUCOU

Mersi ankor enn fwa Mr Speaker.

Mr Speaker, mon kestyon i al koumsa;

Eski Minis i kapab dir Lasanble konbyen dantis i annan ki pe travay avek son Minister e ki travay ki pe ganny fer pou ankouraz plis

zenn pou zwenn sa profesyon? Mersi bokou.

MR DEPUTY SPEAKER

Mon ava envit *panel* pou en larepons.

MINISTER PEGGY VIDOT

Mersi Mr Speaker. Onorab, aktyelman Minister Lasante i annan 26 dantis ki pe travay dan nou servis Lazans Swen Lasante sa i enkli 16 dantis zeneralis apre 10 dantis ki spesyalize. Dan sa 26, nou annan 15 dantis ki Seselwa, nou annan 11 dantis ki etranze.

Mr Speaker, pou nou ankouraz plis zenn Seselwa pou zwenn sa profesyon Minister Lasante i fer plizyer demars e diferan aktivite poudir enn de sa bann keksoz ki nou fer nou partisipe dan tou sa bann tre regilyerman dan tou sa bann *Careers Week* ki ganny organize pou promouvwar profesyon dantis. Nou demann bann dantis zot menm pou fer en pe sa bann kozri avek bann diferan dimoun.

Nou'n organiz en en aktivite *Hygienist On The Move* pou promouvwar lenportans lizyenn labous ankor pou fer sir ki dimoun i pli konnen pe lo sa karyer.

Nou pe eksplor en program leksperyans travay, kot bann etidyan i ava kapab pas letan dan Obann klinik

dantis, pou donn zot en pli bon konprenezon e en pli bon apersi lo sa profesyon.

NIHSS in planifye en program lantrennman pour 25 *dental surgery technicians* e ki prevwar pou konmanse 2026. Se sa, se akòz nou konnen, plis nou ogmant kapasite, nou bann teknisyen dan sa servis, nou osi nou pe ankouraz zot pou zot fer letid pli avanse e nou ankouraz zot pou bann ki kapab pou zot kontinyen ziska ler zot kapab fer en program dan *dentistry* li menm.

Nou pe kontinyen ouver labours letid pou bann zenn Seselwa, e dantis i enn bann priyorite, konman en profesyon ki nou bezwen.

An se moman, nou annan nou trwa etidyan ki pe fer letid dan sa domenn aletranze. E parey nou konnen, letid pour vin en dantis i osi long, parey en letid pou vin en dokter, akòz vremen en dantis osi i en dokter la fason ki nou apel zot. So letid i long.

E finalman, letan nou annan bann *school dental therapist* zot osi zot zwe en rol. Anmezir ki zot al dan lekòl zot pe entrodwir, manrmay avek sa profesyon e i ankouraz manrmay pour pran en karyer e donn zot en serten lentere dan sa travay ki zot pe fer.

Nou reste angaze pour asire ki nou pei i annan en

servis danter solid e soutenab pou lavenir, e nou ava fer nou *mieux à chaque instant* kan i annan dimoun ki enterese dan sa karyer pou nou ankouraz li nou pou regarde ki mannyer nou kapab fer sa arive. Mersi bokou Mr Speaker.

MR DEPUTY SPEAKER

Mon ava envit Onorab Roucou pou son siplemanter.

HON MICHEL ROUCOU

Minis, mersi, pou ou larepons. Mon oule osi remersye tou bann profesyonnel, bann travayer ki dan sa profesyon li menm li pou sa zot pe donn nou lo kote lasante labours.

Minis, eski bann dantis zot annan en *scheme* ki zot lo la, oubyen zot annan en Komite ki mannyer zot sa, parey bann ners ouswa bann dokter ? Mersi.

MR DEPUTY SPEAKER

Mon a envit *panel* pou larepons?

MINISTER PEGGY VIDOT

Mersi Mr Speaker. Dan Minister Lasante nou vwar bann dantis parey bann dokter. Alor *scheme* ki dantis i lo la I *scheme* ki i en *scheme* ki nou dir pou dokter ek dantis. Akòz zot ganny konsidere parey en dokter.

So pou zot osi zot bezwen pas dan diferan kalite *training* pou zot vin en dantis zeneralis

zot bezwen diferan letid spesyalize pou zot vin en spesyalis e zot swiv menm *scheme*, menm *scheme* ki dokter ; *Doctors and Dentist Scheme of Service*.

MR DEPUTY SPEAKER

Nou ava pas lot kestyon ki dan non siplemanner Onorab Vidot.

HON AUDREY VIDOT

Mersi Mr Speaker. Bonzour Minis ek ou de dokter ki a kote ou.

Mon kestyon pou Minis, Minis, mon apresye lefe ki ou'n met lanfaz lo lenportans akòz bann lezot kad travayer dan servis danter i enportan akòz loportinite i la pou zot avanse pou zot osi vin dantis.

E ou'n koz o *scheme*. Alors dir nou eski i annan en revizyon ki Minister in fini fer avek lo size bann travayer servis danter, pou ki parey mon'n dir in donn zot sa motivasyon pou zot kapab servi bann loportinite pou avanse pou vin dantis eski zot in fini prevwar ?

E dezyenmman ki resaman zot in eski resaman ot in zwenn sa bann diferan departman, bann diferan *heads* dan sa bann dan servis swen danter pou asire ki zot pe valoriz bann pwennvi konsern pou ede amelyor nouvo travay kondisyon bann travayer dan servis danter ? Mersi.

MR DEPUTY SPEAKER

Mon ava envit *panel* pou en larepons.

MINISTER PEGGY VIDOT

Mersi Mr Speaker. Mersi Onorab, pou ou kestyon. Onorab si nou'n annan en *scheme* pou sa bann lezot travayer dantis dan servis danter, en revizyon en *scheme*.

Me nou'n annan diferan keksoz ki nou'n fer parey bann *training*, bann keksoz ki pou par egzanp nou'n annan en servis en *training* pou elev bann *therapist* pou anmenn zot lo nivo degre, e sa li menm li i ed zot pou zot avanse an term reminerasyon.

Parey mon'n mansyonnen nou pe annan enn nou pe al fer pou *hygienist* ankor, pou anmenn zot en nivo pli o pou zot kapab arive fer ganny en degre dan sa domenn.

E tou sa se ankor ogmant kapasite pou zot delivre servis li pli o nivo isi, me an menm tan pou ed zot pou bann ki anvi kontinyen pou zot kapab pe al pli o devan.

An term si resaman in annan serten rankont? Sa Mr speaker, si ou pa *mind* mon ava demann Dr Louange konman *CEO* sa servis pou li kapab reponn. Mersi.

MR DEPUTY SPEAKER

Please CEO, proceed.

CEO DR DANNY LOUANGE

Mersi Mr Speaker. Mersi Onorab, pou ou kestyon. Wi, lo kote si nou'n zwenn sa bann diferan *heads* dan servis danter? Ki mannyer nou'n striktir nou lazans, nou lorganizasyon nou fer ki en fason ki tou bann lenformasyon ki ganny pase dan en fason sistematik e i ganny raporte to nou *management team*

So pou nou konpran ki pe arive dan bann diferan seksyon nou lazans, nou annan sa an plas. E pou danter mon krwar i enn bann model ki kekfw a i pli devlope ki lezot landrwa. Akoz danter in tou kou annan tou kou for konman en servis e zot annan zot prop striktir.

Zot annan en direkter, e zot annan bann *heads* pou ki pe *manage* bann diferan seksyon e menm zot annan en keksoz ki en ki zot apel en *meeting* zot apel *Annual General Meeting for Oral Health* ki zot *bring* tou dimoun ansanm pou diskite.

Mon'n ganny sans pou partisip dan detrwa e mon krwar zot annan en striktir ki pli avanse ki lezot seksyon dan *Health Care Agency* e ki mwan mon menm mon, mon pe zwenn avek sa direkter dan nou *meeting* *monthly management* - *meeting* *monthly* e la i *bing up* bann

issues ki son seksyon pe raporte.

E menm bann proze bann lezot keksoz ki pe ganny devlope. Menm i pa esper sa *meeting on a monthly basis* nou zwenn li detanzantan letan i vwar i nesaser. Mersi Mr Speaker, mersi Onorab.

MR DEPUTY SPEAKER

Mon ava pas laparol avek Onorab Esparon pou siplemanter.

HON REGINA ESPARON

Mersi Mr Speaker. Mr speaker, mon ti ava kontan dir Minis mersi pou sa servis danter ki zot in met kot lopital North East point, mon krwar i en keksoz ki ti merite i pe byen ganny apresye. *Chapeaux*.

Mon kestyon Minis, en kategori travayer kot danter ki souvan santi ki zot lavwa pa pe ganny ekoute e zot problem pa pe ariv devan se bann *dental surgery assistant*.

Mon anvi demann ou Minis, eski dan sa parkour pou amelyor zot sityasyon, eski Minister in deza konsidere pou demann bann *surgery assistant* pou zot form en lasosyasyon oubyen en *Council* kot konmans i ava annan en *body* ki pe koz lo zot problem pou kapab anmenn en pe pli devan e pou fer sir ki zot problem i ganny ekoute. Mersi

MR DEPUTY SPEAKER

Panel en larepons.

MINISTER PEGGY VIDOT

Mersi, Mr Speaker. Mersi Onorab. Onorab, nou note ki ou dir zot pe dir zot lavwa pa ganny ekoute. E parey dokter in eksplike zot annan en *head* ki zwenn avek sa direkter ase regilyerman, e ki i kapab anmenn zot bann pwen ki zot annan devan e ki *management Health Care Agency* i kapab atann.

An term bezwen, wi, nou'n regarde bann ki bezwen sirtou lo laspe *training* e ki sa i ganny kordinen lo nivo Sant Lazans Lasante. Me i osi ganny kordinen lo nivo Minister dan biro kot PS ki tou *training* nou bezwen ki nou kapab vwar.

E pou tou sa bann group nou fer sir nou donn *training* ase regilyerman. Me si nou'n ankouraz zot pou annan en lasosyasyon. En lasosyasyon parey ou konnen i en groupman ki bann profesyonnel e bann travayer zot santi zot bezwen zot vin ansanm e zot form li konman en NGO.

Me an term en konsey nou annan sa ki nou dir konsey pou bann travayer pou ki mannyer nou apel sa, *Council for Health Professional - Allied Health Professional*.

E alor sa bann ki pa pe tonm par egzanp dan Konsey

Ners Dokter, Dantis zot, zot tonm dan *Allied Health*. E pou sa rezon alor wi zot bezwen i ganny vwar.

Mr Speaker si mon vwar PS ti ava kontan dir en pti mo, si ou permet li silvouple.

MR DEPUTY SPEAKER

Please proceed PS.

PS DR BERNARD VALENTIN

Mersi Minis. Mersi Mr Speaker. Selman *in the largest scheme of things, dental surgery assistants* i en pti pe ekivalan avek sa ki nou apel *Health Care Assistants*.

E zot *training* i pa neseserman pou lemoman a nivo NIHSS. Napa en *training NIHSS* pou *dental surgery assistants*.

Me selman i nou lentansyon tou dimoun ki nou annan enkli bann *Health Care Assistants* enkli bann *Dental Surgery Assistants* pou nou elev sa nivo e fer li en *certificated level profession*, nou pe travay lo la.

MR DEPUTY SPEAKER

Mon vwar lentere bann Manm me malerezman kontrent letan nou pe sey *press on* aköz i reste nou ankor 5 kestyon ziska midi edmi i en pe difisil. Ou annan en *point of order* dir mon anba ki *order* ki ou pe.

HON SEBASTIEN PILLAY

Yes, Mr Speaker, mon oule *raise en point of order* anba *Order 8 and then in relation to a question answered* ki nou pa kapab *insist for an answer*, anba nou *Standing Orders*.

Pou mwan demann ou permisyon pou regarde si nou kapab klarifye sa. Onorab, in demann en *kestyon pertinent* mon pa pe al dan en *deba*, me in *koz lo en dental surgery assistant*.

Now anba *HPC* son *register* i annan *zis 1*. E larestan - lamazorite i *dental therapist, dental hygienist and dental technician*. I annan *zis en dental surgery assistant*.

So mon ti ava kontan ganny en konpran Mr Speaker, se eski *panel* i ofe ek tou lenformasyon ki zot pe donn nou an relasyon ek sa group dimoun, akòz lesansyel ki Lasanble pe rode se ki Minis i ganny en *meeting* avek sa group dimoun ki apepre 46 zot an tou, *46 of them* ki'n *registered up to 2026* anba *Health Professional Council*.

Mon ti oule met sa devan ou pou ki *panel* i konsider sa. Mersi.

MR DEPUTY SPEAKER

Sertennman, mon krwar *panel* in note. Nou *move lo 144* *kestyon* i dan non Onorab Bistoquet.

HON ANNE BISTOQUET

Mersi Mr Speaker. Bonzour Minis, bonzour *panel*.

Kestyon 144 i lir koumsa; Eski Minis i kapab enform Lasanble ki kantite travay renovasyon mazer dan nou lopital e klinik ki son Minister in antreprann dan sa dernyen 4an e ki zot stati? Mersi.

MR DEPUTY SPEAKER

Mon ava envit *panel* pou larepons.

MINISTER PEGGY VIDOT

Mersi Mr Speaker. Onorab, mersi pou sa *kestyon*.

Mr Speaker, mon lalis i long akòz dan sa 4an nou'n fer en kantite travay lo nou bann lenfrastruktir. Mon'n fek mansyonn en kantite pou Lopital Sesel me ler nou pran met tou ansanm mon pa pou renonmen.

Me ler nou pe regard tou lezot lenfrastruktir wi, 4an in annan en kantite keksoz ki nou'n fer.

E dan sa bann lannen atraver *Health Care Agency* e avek an kolaborasyon avek SIA, nou'n antreprann diferan travay renovasyon mazer e an menm tan antreprann konstriksyon nouvo fasilite Lasante ki lo Mahe, Praslin La Digue.

E sa bann proze in form parti nou langazman konman en - nou langazman ferm pou nou moderniz lenfrastruktir Lasante pou ogmant lapse

servis Lasante e amelyor la kalite Servis ki nou, nou donn nou pep.

Tou sa in ganny fer akòz sa Gouvènmàn in fer sa langazman pou donn en meyer Servis Lasante tou nou popilasyon.

Proze ki'n ganny realize e si mon konmans avèk La Digue, Lopital Logan letan nou ti regarde ti vye e i pa ti posib pou nou fer amelyorasyon lo la pou diferan rezon.

Malgre ki i ti annan serten mekontantman lo sanz landrwa kot sa sant pou ganny fer, nou ti pran desizyon pou nou ale e fer en nouvo sant.

Ozordi servis parey dyaliz ki nou pa ti pou kapab fer dan sa sant pe ganny fer lo nivo Lopital La Digue.

E konman en nouvo sant, nou'n osi kapab entrodwè diferan servis ki nou pa ti pe kapab fer oparavan tel parey servis *X-ray* ki nou ti napa avan e prezan nou annan servis dyaliz ki i ki fer ki prezan nou annan sa e menm en bon landrwa pou nou fer en pe reabilitasyon.

Lo Mahe lo Lopital Sesel Mr Speaker, mon'n mansyonn en kantite keksoz ki nou'n fer me zis mon ti ava kontan dir ki apard tou sa bann gran renovasyon ki nou'n fer lo lopital li menm, dan diferan bout lopital, nou'n vwar ki

nou'n bezwen fer serten nouvo fasilite.

Ler nou ti vin dan ladministrasyon an 2020 nou ti dan letan *COVID-19*. Nou ti vwar li nesese pou nou kapab ogmant nou kapasite pou nou kapab donn swen ki ti nesese e ki ti bezwen dan sa letan. Nou ti napa sifizaman lili e nou ti napa en bon sant izolasyon.

E alor nou ti pran desizyon pou nou fer en sant 40 lili pou nou sonny bann dimoun ki ti pe bezwen ganny ospitalize avèk *COVID*. E lefe ki nou ti vwar poudir *COVID* ti pe ravaz lemonn antye e ki serten sityasyon dan diferan pei ti donn nou lenpresyon ki nou ti kapab ganny en pli gran tape avèk plis pasyan, nou ti osi ganny en lopital pou izolasyon ti annan 60 lili.

Sa ti ed nou en kantite akòz nou ti kapab zer sa pandemi, donn en bon repoz avèk lafason ki nou ti izole dimoun sonny zot e fer sir ki nou'n sorti avèk en servis ki ti apropriye e efikas dan sa letan.

E dan sa letan osi nou ti bezwen fer sir ki nou ti annan sifizaman loksizenn dan pei, akòz demann loksizenn ti'n mont plis ki 100 pousan. Nou ti bezwen aran sa bilding en pe kot nou pou met en nouvo ede nouvo loksizenn plant, pou fer si ki nou ti reponn nou bezwen.

Nou ti annan en lekòl pou *NIHSS* Anse Norde me nou ti vwar poudir sa lenfrastriktir pa ti vreman bon sirkilasyon ti move, konsantrasyon loksizenn dan serten lasal ti en pe ba dan lapremidi sirtou.

E alor ti neser ki nou refer. Nou'n refer en nouvo bilding konman nou lekòl pou bann travayer Lasante travayer Servis Sosyal. Kot etidyan i pli konfortab e osi i pli pre avek lopital kot zot ganny zot bann sesyon pratik.

Letan nou regard bann lenfrastriktir dan bann distrik nou vwar ki in annan en kantite keksoz en kantite bout ki nou'n fe.

Nou'n aranz en lasanm Anse Aux Pins - dan Sant Lasante Anse Aux Pins pou nou kapab fer nou donn servis *maternal and child health*.

Nou'n koz lo klinik lo Sant Lasante Port Glaud pli boner bomaten kot nou'n fer diferan kalite travay.

Nou'n travay lo sa lakaz kot dokter i reste kot distrik Anse Boileau ek Béolière nou'n fer diferan keksoz. Nou'n vwar ki lopital lafanmir kot ti annan diferan travay pou fer resanz bann *plumbing* pou bann gas medikal, repenn, resanz bann bout ki ti'n avarye akòz i ganny bokou en pe salen laba. E nou'n bezwen refer en gran penn.

Nou'n bezwen aranz en landrwa pou nou bouz servis

dan Baie Lazare, letan ki nou ti pe al konmans bati nouvo klinik laba. E alor, sa osi in en travay ki nou'n fer.

Nou'n travay lo Sant Lasante Les Mamelles. Nou'n azout en lasanm kot zot kapab fer bann pansman ek lezot keksoz.

E nou'n fer sir ki sa sant in ganny penn an antye. Lo North East Point *Hospital* nou'n fer renovasyon lo bout kot i annan lopital li menm.

Nou'n fer renovasyon lo bout kot nou dir nou *Mental Home*, e i ankor annan travay ki nou pe fer osi lo tou bann kote *regional* kot nou met bann vye dimoun.

Nou'n repenn Klinik La Larivier Anglez an antye, e nou'n fer bann lakaz pou, pou nou met bann zenerater dan 3 landrwa lo Mahe.

Lo Grand Anse Praslin, nou'n sanz twatir, nou'n re-aranz plafon, nou'n repenn, e donn li en nouvo *look*.

Baie Sainte Anne nou ankor pe fer travay lo la me dan lopital li menm, i annan bokou travay ki'n ganny fer pou mentenir sa landrwa.

Me nou pe osi azout en nouvo morso kot i annan lot fasilite ki nou pou pe fer.

Nou pe fer en laboratwar. Nou pe aranz en lasal pour nou kapab met en *oxygen plant* Praslin. Nou pe aranz en landrwa kot nou ava

i ava pli konvenab pour nou fer nou *laundry* pou Praslin.

E landrwa osi kot nou pou donn en servis pou maladi lizye kan nou dokter i ava mont laba, ki nou annan tou bann lekipman neseser pou nou fer donn en servis, ki an se moman nou pa kapab donner aköz nou napa sa bann lekipman *sur* plas.

E nou pe osi regard nouvo *incinerator* pour fer sir ki keksoz i pe marse Nou annan ankore *sewage treatment plant* ki nou'n mete."

Nou pe kontinyen, Mr Speaker, anmezir nou ale vwar tou sa bann keksoz ki nou bezwen pe fer.

Nou pe re-aranz a *ex NIHSS North East Point*, aköz pou nou kapab annan en landrwa kot nou met pasyan ki bezwen reabilitasyon, sirtou en pe pli lonterm e sa i ava sa landrwa kot nou pe mete. Travay pe ganny fer e nou espere ki i ava fini avan lafen lannen.

Nou'n konstri en nouvo Sant Lasante Baie Lazare. E avan lafen sa mwan, nou pou annan sa plezir pou nou dir avek Onorab Adelaide Sant Lasante Baie Lazare in fini e nou pe ouver.

(APPLAUSE)

MINISTER PEGGY VIDOT

Nou'n mansyonnen bomaten pour dir travay, kontrakter in mobilize pou konmans travay lo Île-Soleil', sant pou Anse Aux Pins. Nou pe fer travay lo *Wellness Center*. Nou Sant Lasante Béolière parey nou dir i annan serten travay pour fer.

E Mr Speaker, mon panse tousala i montre poudir dan sa 4 an, sirtou ler nou ti 2an ki nou ti dan *COVID* e keksoz pa ti kapab bouz a la vites ki nou ti ava'n kontan, nou'n fer bokou proze ansanm avek *SIA*.

E nou pe enn nou bann gran travay ki nou pe fer an se moman - se vreman parey nou'n dir la kantite *maintenance* ki annan pou fer lo nou lopital e lafason kantite keksoz ki nou bezwen, nou'n vwar ki nou bezwen plis en lopital ki pli modern, ki pli adapte, e ki pou kapab donn en meyer swen. E la enn bann gran travay ki nou pe fer s revwar bezwen ki nou pou annan dan sa nouvo lopital.

E sa semenn sa mwan or pli mwan prosen pli tar nou ava ganny rapor letid ki nou'n fini donner pou fer lo *feasibility study* pou sa nouvo lopital ki i nou plan pou nou fer.

Onorab parey ou'n antann avek sa long lalis ki mon'n lir ou kapab war ki sa Gouvernman in vreman met en kantite resours pou amelyor nou bann fasilite dan

Servis Lasante pandan sa dernyen 4an.

Parey ou konnen sa plan ki nou annan pou nouvo lopital i ava ed nou plis ankor pour nou delivre lo nou promes pou nou donn en meyer swen lasante pour nou popilasyon an antye. Mersi Mr Speaker.

MR DEPUTY SPEAKER

Mon ava donn loter kestyon Onorab Bistoquet *right of supplementary*.

HON ANNE BISTOQUET

Mersi Mr Speaker. Mersi Minis pou ou repos byen detaye. E mon kontan pou aprann ki nouvo lopital pe konmans bouze, e mon swete ki byento nou ava vwar nou premye pyer ki pou ganny mete dan distrik Roche Caiman mon swete.

Mon kestyon siplemanter i lir koumsa ;

Minis, eski ou krwar poudir sa bann proze renovasyon i vreman neser a sa moman ki nou'n ladan ?

E i ou kapab dir nou konbyen in kout pei an total pou fer tou sa bann renovasyon? Mersi.

MR DEPUTY SPEAKER

Nou envit *panel* pou en larepons.

MINISTER PEGGY VIDOT

Mersi Onorab. Onorab, wi, nou bezwen fer a bann renovasyon nou dan lopital nou ti ava kontan annan en nivo lizyenn e ki neser pou nou donn swen.

E nou osi nou bezwen annan en lanvironnman kot pasyan i ete ki izyenik, ki bon e pou travayer lasante osi pou fer pou *facilite* travay en kantite sa renovasyon i bezwen.

Pou konbyen i koute Mr Speaker, si ou pa si ou ti ava permet Dr Louange konman CEO Swen Lasante dir nou silvouple.

MR DEPUTY SPEAKER

Sertennman, *proceed CEO*.

CEO DR DANNY LOUANGE

Mersi Mr Speaker. Mersi Minis, pou pa laparol. Mersi Onorab pou ou kestyon.

Pou konmanse mon ava donn ou en total - depi 2021 ziska la nou'n depans plis ki R137 milyon lo bann proze.

I pa zis *maintenance* parey nou pe dir i annan *maintenance* apre i annan bann nouvo konstriksyon ki'n ganny fer.

Pou 2021 nou'n depans 21 milyon ; pou 2022 i ti 81 milyon pou 2023 in 4 milyon, pou 2024 i 31 milyon e pou 2025 i ankor annan bann travay ki'n ki nou *invoice* in arive nou pa ankor fini peye,

me an se moman nou'n fini pey plis ki R3 milyon.

So an total parey mon'n dir i 137 milyon pandan sa 4an ki nou'n pandan sa dernyen 4an.

I ankor annan travay ki'n ki nou'n *commit* parey sa nouvo Sant Lasante rezyonal pou Anse Aux Pins sa i apepre 30 milyon. I annan Baie Lazare nou pa ankor fini peye, i annan *ex NIHSS* ki nou pe parey Minis in dir nou pe *convert* li dan en lopital reabilitasyon parey i ti ete avan sa osi pa ankor fini peye. Nou osi annan Praslin - Baie Sainte Anne sa nouvo seksyon ki nou pe konstri pa ankor fini peye.

Me zis pou *summarize* li total i 137 milyon pandan sa 4an. Mersi Mr Speaker, mersi Onorab.

MR DEPUTY SPEAKER

Mersi CEO. Ankor en lot kestryon ki mon krwar i ti kapab vin parey en *statement* aköz i telman ouver i telman lentere. Me nou

Bezwen zer letan parey nou merit. So mon pou bouz lo 145 i dan non Manm Elekte pou distrik Glacis.

HON REGINA ESPARON

Mersi, Mr Speaker. Eski Minis i kapab donn detay Lasanble lo sinerzi ki i ant Minister Lasante ek Minister Ledikasyon an sa ki konsern

administrasyon sant otizm North East Point sirtou kot Occupational Therapists ki i en eleman kle ki sa bann zanfan i bezwen dan zot adaptasyon? Mersi.

MR DEPUTY SPEAKER

Mon ava envit *panel* pour en larepons.

MINISTER PEGGY VIDOT

Mersi, Mr Speaker. Mersi, Onorab, pou sa kestryon.

Mr Speaker, Sant Otizm kot North East Point i tonm anba responsabilite Minister Ledikasyon.

Ziska prezan, i annan kominikasyon ant bann teknisyen dan servis swen dan Seksyon Swen Ledikasyon Spesyal e Dezabilite avek dan Minister Ledikasyon avek bann zofisye dan servis reabilitasyon dan Lazans Swen Lasante, konsernan bann servis ki neser pou sa bann zanfan parey ou'n mansyonnen Onorab *occupational therapy* ki bann zanfan i bezwen.

Pou le moman, nou napa okenn servis ki nou konman Minister nou pe ofer laba dan sa sant.

I annan bann diskisyon aköz prensipalman bann swen ki zot ti bezwen, bezwen, zot ti pe ganny li kot nou, e i pa ankor komanse laba dan sa sant.

Me bann lezot servis parey *speech therapy* e lezot keksoz koumsa, sa pe ganny ofer par Minister Ledikasyon li menm.

I ankor reste konmsi plito an diskisyon ki sa ki nou, nou pou donn zot, ki sa ki zot, zot pou kapab fer zot menm avek resours ek kapasite ki zot annan.

E apre sa, nou ava vwar ki mannyer nou pou kapab travay ansanm.

Akoz nou travay tre pre avek Minister Ledikasyon lo en kantite keksoz e mon plis ki sir lo sa nivo osi, nou pou annan serten sinerzi ki nou pou devlope an mezir ki nou ale.

Me pou le moman sa sinerzi i egziste atraver bann referans ki zot, zot fer pou sa bann zanfan, ler zot bezwen pe vin kot nou pou serten terapi ki an se moman pa pe ganny ofer dan sa sant.

E sa i enkli dan bann sant parey dan Lopital Sesel li menm kot bann sant reabilitasyon, kot North East Point e menm dan Beau Vallon, e bann diferan lopital ki Praslin e osi non La Digue

Alor se sa, sa kot nou ete an se moman nou, nou menm, nou, nou pa ankor antre avek sa terapi, *Occupational Therapy* dan sant. Me i diskisyon ki i pe ale. Mersi Mr Speaker.

MR DEPUTY SPEAKER

Mon ava envit loter kestyon pou siplemanter ?

HON REGINA ESPARON

Mersi Minis, pou ou larepons. Minis an vi ki pou lemoman zot ankor o kour diskisyon pou sa servis.

Eski petet mon pa konnen si kekfwa i ti kapab konmsi annan en program konmsi i ti pe parey *remedial*, pou ki sa bann zanfan, zot menm zot ki bezwen sa servis, zot pa ganny kit deryer pou lemoman ki sa diskisyon, pe ganny fer me ki i annan sa kontinite dan sa bann terapi ki zot gannnen ? Mersi.

MR DEPUTY SPEAKER

Panel ?

MINISTER PEGGY VIDOT

Mr Speaker, mon kapab asir Onorab, ki menm si sa servis pa pe donn sirplas dan sa bann zanfan, ki bezwen sa servis, pe akse sa servis dan bann diferan sant, swa dan Lopital Sesel, swa dan Praslin, osi non La Digue e ler *Occupational Therapist*, i monte, osinon Lopital Anse Royale, partou kot nou bann *therapist* i ale pou fer sa bann servis, sa bann zanfan osi i ganny refere pou zot al laba. Mersi.

MR DEPUTY SPEAKER

Mon pa'n not okenn lezot kestyon siplemanter lo sa enn kestyon.

Donk, nou bouz lo 146, ki dan non Onorab Porice e kestyon spesifikman pou Praslin.

HON DOYACE PORICE

Mersi Mr Speaker. Bonzour Mr Speaker, Minis ek ou delegasyon e tou bann koleg MNAs. Kestyon numero 146 i lir koumsa,

Eski Minis i kapab enform Lasanble lo sa bann nouvo lekipman ki son Minister in resevwar tou resaman? Eski i annan pou Lopital Praslin? Si wi, ki kantite e kan eski nou pou resevwar? Mersi.

MR DEPUTY SPEAKER

Mon ava envit *panel* pou en larepons.

MINISTER PEGGY VIDOT

Mersi bokou, Mr Speaker. Mersi Onorab, pour sa kestyon.

Onorab Minister Lasante i dan Swen Lazans Swen Lasante i ganny serten lekipman e i *order* en kantite lekipman ki zot pe servi.

Mon kapab konfirman avek Lasanble ki an 2025, Lopital Baie Sainte Anne in benefisye avek en nouvo seri lekipman medikal, avek lobzektif toultan pou nou amelyor kapasite avek kalite

swen ki pe ganny ofer lo Praslin.

Sa i enkli par egzantp nou konnen nou'n aste en kantite lili sa lannen, nou'n anvoy 10 nouvo lili elektrik pou pasyan nouvo *hospital bed* Praslin.

Nou'n annan osi lili ki nou servi dan lasal dirzans ki i annan ekiye pou nou donn swen dirzans e Praslin Baie Sainte in ganny 2.

Nou'n anvoy nouvo masin dan ki pou fer *physiotherapy*, sa ki nou apel *Shockwave Therapy Unit*, e sa i ava permet ki nou donn en meyer tretman e meyer reabilitasyon pou nou bann pasyan.

Nou'n annan osi lekipman pou laboratwar ki nou'n anvoye deza, ki pou ogmant efikasite avek presizyon bann test ki ganny fer Praslin pou nou ariv en nivo dyagnostik en pe pli vit.

E nou konnen ki nou ankor annan lekipman laboratwar ki pe vini ki pou ganny anvoy Praslin sirtou letan nouvo laboratwar sa bout kot nou pe konstri i fini.

Ankor avek bi pou nou amelyor servis ki nou pe donner.

Lekipman neseler pou servi tou nouvo program elektronik sirtou ki nou annan nou *health information system* ankor sa nou'n annan diferan keksoz ki'n anvoye Praslin pou

fer sir ki zot osi zot azour e ki menm servis i kapab donnen.

E, mon ti ava kontan konfirman, Onorab ki nou'n, reste toultan angaze pou kontinyelman moderniz bann fasilite lo Praslin e asire ki bann pasyan i ganny en servis ki alafwa eksesif efikas, adapte a zot bezwen.

E sa i nou langazman akòz nou santi poudir tou swen i merit ariv a laporte tou pasyan. Mersi.

MR DEPUTY SPEAKER

Onorab Porice, ou annan siplemanter lo sa keston?

HON DOYACE PORICE

Mersi Minis, pou repons byen detaye. Minis, mon pou remersi ou avek ou lekip pou lo bann devlopman e travay renovasyon nou Lopital Baie Sainte Anne, Baie Sainte Anne Praslin. Lopital Praslin, *sorry*.

E mon vremen apresye, e ki byento, zabitan lo zil i ava ganny en lasante pli modern. Mersi.

MR DEPUTY SPEAKER

Onorab, mon krwar *panel* in note. Onorab Woodcock ?

HON WAVEL WOODCOCK

Mersi, Mr Speaker. Bonzour Minis ek ou delegasyon.

Minis, premyerman mon bezwen remersi ou Dr Louange pou *setup* sa *Health Council* Praslin ki tou bann Manm

Lasanble e lo tou le de kote latab in form parti Osa enkli ban *DAs*.

So nou annan plizyer diskisyon. E mon vwar poudir i annan serten nouvo fasilite ki pe ganny *setup*, sirtou avek sa proze ki pou byento konplete.

Mon keston konman mon pe *follow up* i sirtou kot i konsern sa *Health Information System*.

Si zis ou kapab donn nou en pe detay kan ki sa pou vin an fors Praslin akòz nou ankòr pe fer keksoz *manually*?

Eski i annan en *timeframe* pou zot konplet sa lenstalasyon sa sistenm lo kote Praslin e osi mon mazin lo la Digue osi ? Mersi.

MR DEPUTY SPEAKER

Mersi. *Panel*.

MINISTER PEGGY VIDOT

Mersi Mr Speaker. Mr Speaker, mon ava demann Dr Louange si ou permet pou eksplike lekel bout sa sistenm ki an plas lo Praslin e kan lezot pou ariv laba. Mersi.

MR DEPUTY SPEAKER

CEO?

CEO DR DANNY LOUANGE

Mersi Mr Speaker. Mersi Onorab, pou ou keston. Mersi Minis, pou pas laparol.

Parey ou konnen Onorab sa *Health Information System*,

sa *system* i annan bann diferan konponan. I annan konponan ki deza konmans enplimante Praslin.

E sa konponan i *Electronic Medical Records*. Savedir i tou dokter ek e bann pe servi sa *system* pour *electronic medical record*. I ankor annan bann lezot pti bout pou nou kapab *improve* lo la e nou kontinyen *improve nation*.

Si en pasyan i bezwen en rezilta ki'n ganny fer l o Mahe dan sa *system electronic medical record* i pou reflekte.

Me pou le moman la, aköz nou ankor nou pe bouz laboratwar, i annan bann *issue* teknikal ki nou pe espere ziska ler tou nou bann lekipman in arive pou laboratwar pou nou kapab met laboratwar Baie Sainte Anne Praslin lo sa *system*.

Aküz i annan en enteregasyon... I annan en fason pou bezwen entegre sa bann masin avek sa *system*. Sa enn.

Lot *system* ki nou pa ankor met an plas lo Praslin i *system X-ray*.

Sa osi nou okouran nou pe rod fason ki mannyer nou kapab fer li, nou kapab enplimante.

Me osi, i annan bann lezot sistenm osi ki nou pou enplimante me i osi i pou form parti sa enplimantasyon ki nou pou fer lo Mahe.

Parey *procurement, procurement, human resource*, mon pe dir li an Angle aköz mon pa tro konpran konn sa mo Kreol.

Me tou sa bann lezot *module* ki nou annan lo *Health Information System* pou osi ganny enplimante lo Praslin pareyman. Mersi Mr Speaker.

MR DEPUTY SPEAKER

Mon ava envit Onorab Gill, pou siplemanter lo sa kestyon.

HON CHURCHILL GILL

Mersi Mr Speaker. Bonzour Minis, ek delegasyon. Minis, ou'n eksplike bann travay renovasyon ki'n ganny fer, bann nouvo lekipman ki sipoze vini pour al dan Lopital Baie Sainte Anne.

Me mwan mon kestyon se an relasyon avek *staffing*, ler ou'n fini met tou sa bann lekipman. Eski i annan travay ki pe fer pou Lopital Praslin kapab ganny ase *staff*, pou kapab fer marse tou sa bann lekipman parey ki i devret? Mersi.

MR DEPUTY SPEAKER

Mon ava envit *panel* pou larepons.

MINISTER PEGGY VIDOT

Mersi, Mr Speaker. Mersi Onorab pou ou kestyon.

Onorab wi, resours imen dan Lasante dan nou pei i en topik ki preokip nou bokou.

Nou realize poudir konman en pti pei zil, nou napa sa gran kantite dimoun, par egzanp, ki pran karyer travay dan Minister Lasante a *chaque instant*.

E nou'n fer diferan travay avek lo *MS* pou nou vwar par egzanp Nou kapab vwar, par egzanp, ki kalite *staffing level* ki nou bezwen dan bann diferan landrwa, ki kalite kapasite, ki kalite konpetans ki nou bezwen partou.

E lefe ki nou annan sa, prezan nou pe travay avek sa konman nou bann target pou nou arive ganny li.

Wi, nou realize poudir avek plis fasilite dan serten Sant Lasante, nou bezwen plis travayer.

E pou sa rezon ki nou'n dir par egzanp avek *NIHSS*, anmezir ki nou pe fer tousala, nou pe planifye lenfrastruktir, nou bezwen osi regard kantite etidyan ki nou pe pran dan sa bann diferan kours.

E nou konnen pou tou nou bann program, i *minimum* 3 an avan ler nou ganny spesyalis dan sa dimoun *trained* dan sa *area*.

Pou Praslin osi i enn bann fasilite ki nou pou regarde pou nou fer sir.

Me toultan, parey ou konnen, ler ou sey fer dimoun transfer dan en landrwa, i fer kanmenm ase gran problem pou zot. Me nou esey *overcome* sa dan diferan fason. Me wi,

nou pe regarde ki kantite resours imen nou bezwen pou Praslin e pou fer sir ki ler nou fer travay nou napa sa mankman ki pou afekte kalite servis. Mersi.

MR DEPUTY SPEAKER

Sa ti bann siplemanter lo sa enn kestyon. Donk nou ava bouz lo 147 ki dan non Manm Elekte pour distrik Anse Boileau.

HON PHILIP ARISSOL

Mersi Mr Speaker. Bonn apre midi tou dimoun. Kestyon nimerò 146 i lir koumsa:

Eski Minis i kapab donn detay lo sa Bidze R2.6 milyon pou renovasyon Sant Lasante Anse Boileau?

E osi, les nou konnen kan eski travay i sipoze pou konmans e konplete? Mersi.

MR DEPUTY SPEAKER

Mon ava envit *panel* pou zot larepons.

MINISTER PEGGY VIDOT

Mersi Mr Speaker. Mersi, Onorab. Onorab proze renovasyon pou Sant Anse Boileau i form parti nou zefor kontinyel pou nou amelyor nou bann lenfrastruktir lasante dan bann distrik.

An se moman, *SIA* pe finaliz *scope* travay pour sa proze e sa pou kouper plizyer laspe kle, ki enkli renovasyon *meeting room* ek *staff* fasilite,

lagrandisman farmasi ek lasal dirzans. Travay lo sistenm elektrik ek *plumbing*, ranplasman plafon, e repenn klinik an antye anndan deor.

Nou pe osi prevwar fer re lokasyon sa landrwa lanbilans, ek met bann fasilite pou bann *staff*, pou permet en pli bon fonksyonman e meyer leksperyans pou bann pasyan.

Nou'n osi fer nou lasal kot nou bezwen pe met sa zenerater. Menm si nou pa ankor arive fini fer li, me i annan serten pti keksoz ki'n retard nou, e nou kapab eksplike aköz.

Nou pe espekte finaliz tou sa bann *scope* travay la sa mwan, e *tender* dan lans *tender* pli tar *SIA* in dir mwan pli tar mwan prosen. Si tou keksoz i al dapre plan, travay pou konmanse ver lafen Septanm.

Nou anvi met lanfaz lo lefe ki travay pou ganny fer par faz. Sa ki nou fer sa *Health Centre* pou asir kontinite servis.

Sa i vedir alor ki travay i riske pa al osi vit aköz sa kontrent ki letan ki i pou annan pasyan serten louveraz pa pou kapab ganny fer.

Me alor nou pou demann ou pou vreman annan e pti pe konpran nou letan nou pe fer bout par bout *as opposed* pou fer en sel san ki nou ferm sa fasilite, aköz sa ti pou donn nou tro bokou problem pou

bouz tou sa servis en lot landrwa. Mersi, Mr Speaker.

MR DEPUTY SPEAKER

Loter kestyon i annan siplemanter.

HON PHILIP ARISSOL

Mersi Mr Speaker. Mon siplemanter avek renovasyon Sant Lasante Anse Boileau, eski i annan plan pou entegre bann nouvo servis medikal, tel konman bann klinik spesyalize?

E parey ou'n dir an plis ki sa mon ti ava kontan konnen si sa zenerater pou vin an mars apre ki renovasyon in fini ganny fer? E ki bann mezir sekirite pou pasyan e osi bann travayer Minister Lasante? Mersi.

MR DEPUTY SPEAKER

Mon ava envit *panel* pou larepons.

MINISTER PEGGY VIDOT

Mersi, Onorab. Onorab nou espekte zenerater de ki nou mon krwar nou ankor pe esper serten *cab* pou nou kapab met li an plas.

So nou espekte ki de ki sa i arive, sa zenerater i kapab ganny *commissioned* e konmans kapab nou kapab servi li. Nou pa pou esper tou travay fini avan ler li i vin an plas.

So de ki nou ganny sa bann *cab* ki nou pe espere

zenerater pou marse. Nou pe nou pa pe anvizaz gran si oule plis servis dan sa sant, akòz i deza ase kwense pou nou kapab donn plis servis. Me nou pou donn bann servis ki nou pe fer an se moman.

E keksoz ki nou pe anvizaze se kekfw met serten masin dyagnostik plis dan sa bann landrwa, koumsa tel ki *ultrasound*, ki koumsa nou kapab donn meyer servis lo nivo sa bann rezyon sirtou.

E wi, nou pe osi regarde ki ler nou fer renovasyon ki fasilite pou bann travayer i osi amelyore. Mersi Mr Speaker.

MR DEPUTY SPEAKER

Mersi *Minister*. Mon pa'n not okenn lezot siplemanter lo sa kestyon. Kestyon 148, ki dan mon non anba *order 37 (7) pw withdraw* sa kestyon e *panel* ti'n ganny averti sa kestyon pou ganny *withdraw*.

Donk nou pou bouz lo dernyen kestyon ki dan non Manm Elekte pour distrik Port Glaud kestyon nimero 149.

HON EGBERT AGLAE

Mersi Mr Speaker. Kestyon i lir *comme* swivan avek en pti lamannman ;

Eski Minis, i kapab dir avek sa Lasanble si son Minister pe mazin revwar laz konsantman fas a laz akse ek bann metod kontraseptiv ? Mersi.

MR DEPUTY SPEAKER

Mon ava envit *panel* pou en larepons.

MINISTER PEGGY VIDOT

Mersi Mr Speaker. Mersi, Onorab pou ou kestyon.

Onorab, konman larepons mon kapab dir ki mon Minister i toultan pe pran par dan bann deba e bann diskisyon ki pe pase dan lasosyete e ki pe toultan vwar si nou bann Polisi i adapte avek letan ki nou pe viv ladan, avek bezwen nou popilasyon, sirtou bezwen lasante, avek sa ki nou resours i permet nou donner.

Mr Speaker, Minister Lasante in pran *note* sa Mosyon ki Lasanble in pase ki ti demann ki Gouvernman, atraver Minister Lasante i revwar son Polisi e met an plas en kad legal an ver akse ek bon kontraseptiv e lezot servis lasante reproduktiv pou bann zenn anba 18 an ki aktiv seksyelman, avek bi parey zot Mosyon in dir pou redwir lansentman anba laz e osi pou redwir bann risk lenfeksyon e lezot maladi asosye avek sistenm reproduktiv.

Minister Lasante i osi okouran ki menm Lasanble Lazenés in osi deza deba lo sa size e fer serten rekomandasyon.

Konman nou Minister nou toultan reste parey, mon'n

dir, atantiv lo sa bann rezilta, bann deba e bann diskisyon.

E nou'n pran byen note e nou pe viz ou trouv en konsansis nesese ki pou osi enkli lopinyon sosyete.

Sosyete sivil ek bann lorganizasyon relizye, lafanmir e tou dimoun konsernen pour vwar ki kalite Kad Legal nou kapab bezwen pou nou adres sa san met personn a risk."

Nou pe osi revwar nou Polisi, e revwar bann Polisi kot i annan bann *best practices* si oule pou nou vwar ki mannyer nou kapab anliny pou nou avek sa ankor tout an prenon kont bezwen pei, me osi lafason ki sosyete i vwar sa.

Selman, letan nou pe revwar tou sa, letan nou pe koz lo serten keksoz, nou santi parfwa ki i annan serten konfizyon lo sityasyon larz konsantman ek akse avek servis.

Referans lo konsantman a laz 15 an i baze lo seksyon 130, 3(B), Kod Penal, lo *sexual* ki klarifye ki anba laz 15 an en dimoun pa kapab donn konsantman.

An plis, napa en Lalwa an se moman ki anpes en profesyonnel Lasante ofer nenport lentervansyon medikal, enkli kontrasepsyon konman en entervansyon. E dimoun anba laz 18an.

Konsern se ki konsantman paran i nesese ankor ziska laz 18 an, se

paran ki responsab pou sa zanfman.

Alor, gidans se ki touzour en profesyonnel Lasante i toultan azir dan lentere sa pasyan e dan nou sa ka dan lentere sa adolesan.

Konsantman paran, wi, i toultan dezirab, me dan sikonstans kot i pa posib, sa en profesyonnel Lasante i azir dan fason ki meyer proteksyon e byen-et sa zanfman.

E la ler nou dan medikal konmela dan Lasante, ler nou pe koz lo sa profesyonnel medikal, nou pe souvan refer avek en dokter, sirtou lo sa laz aköz dokter ki fer serten preskripsyon.

Zanfman anba laz i bezwen proteksyon paran e proteksyon lasosyete. E nou merit met nou zefor pou asire ki zanfman pa ganny abize oubien eksplwate dan okenn fason.

Sanzman dan Lalwa lo keksyon laz, i pa nesese manwayen ki nou ki pli efikas, pou protez sa zanfman.

Pou en tel size parey nou bezwen vreman etidye e vwar ki mannyer nou fer li dan en fason ki ed nou protez nou zanfman dan tou sans, pa zis donn li en serten metod kontraseptiv, me pou protez li konman en zanfman menm lo nivo medikal. Donn li sa ki apropiye pou son laz.

Mr Speaker, mon osi ti ava kontan dir ki mon Minister

letan ki nou pe fer tou sa, nou pa pe asize pa fer nanryen, pou nou si oule aranz sityasyon pou protez nou bann zanfan, pou anpes lansentman anba laz e pou nou kapab anpes maladi ki ganny transmet par sex.

Bann mezir ki mon Minister pe pran, pou asire ki sa i arive i *comme* swivan ;

Nou annan program lasante skoler e servis lasante pou adolesan.

Nou pe entansifye ledikasyon lo lasante seksyel ek reproduktiv dan bann lekòl segonder e pos- segonder.

Bann zenn i ganny lenformasyon apropiye dapre zot laz pou ed zot pran desizyon responsab.

An Avril sa lannen, nou'n lans en konpany *Youth Education for Success*, ki met lanfaz lo responsabilite bann zenn ver zot prop lasante seksyel.

Sa kanpanya i pa zis vize fer zanfan, i osi vize fer ver bann paran. Akòz nou krwar ki sa konversasyon dan lakour lo bann size i vreman enportan.

Nou'n realize letan nou koze avek bann dimoun ki paran par fwa i santi en serten mankman ler pou apros sa kalite size.

E pou sa rezon ki nou pe organiz bann diferan rankont partou avek paran, pour nou kapab ed zot kot zot annan

serten mankman lo lapros ki zot pou pran pou kouver sa bann diskisyon avek zot zanfan lo lasante seksyel lasante reproduktiv.

Nou annan en Sant Lasante pou zenn ki baze Rivyer Anglez kot bann zenn i kapab resevwar bann servis enkli servis lasante reproduktiv, dan en lanvironnman konfidansyel e adapte pou zot.

Nou'n osi lans en group *WhatsApp* kot bann zenn pou kapab demann kestyon, en profesyonnel kan zot pe anvi

An plis, nou pe travay an kolaborasyon avek Minister Ledikasyon, pou nou revwar sa *curriculum PSCE* pou entegre ledikasyon seksyel konpreansiv depi *P4 obviously*, pou bann manm sak nivo i ava annan son nivo ki nou pou entrodwir ladan.

Nou kontinyen servi diferan platform medya e nou organiz bann aktivite dan kominote parey legzibisyon pou sansibiliz piblik lo sa size.

Finalman, tou sant kominoter i ofer servis pou bann zenn, enkli akse avek lenformasyon ek konsey dan en lanvironnman respe, dan en lanvironnman profesyonnel, konfidansyalite e san zizman konman par Lasante reproduktiv

i disponib pou sa bann ki bezwen, me dan en fason ki

nou fer li san ki nou koz *any* ditor.

Nou reste determinen pou nou travay kolektivman pou ed tou nou zenn pran bann bon desizyon pou protez zot lasante si zot lavenir dan en fason ki responsab.

E Mr Speaker, mon panse pou ki sa ki nou pe fer i ava arive reponn ou bezwen bann adolesan sirtou lo bezwen lo lasante seksyel e reproduktiv. Mersi.

MR DEPUTY SPEAKER

Loter keston, ou annan siplemanter.

HON EGBERT AGLAE

Minis, mon ava dir ou mersi pou elabor en larepons ase detaye. E mon krwar nou tou nou pou dakor ki nou bezwen annan en konvansyon nasyonal in deza konmanse sa bann konvansyon *ok*.

I zis prezan nou bezwen regarde malgre sa lemonn global i ouver ozordi e tout an respektan osi bann diferan lopinyon, bann diferan sekter dan lasosyete, bann group relizyez, bann *civil societies*.

Mon premye keston Minis, i petet ki mannyer nou bezwen komans sa konvansyon? E lo ki platform ki nou bezwen ki *start* sa.

Plizyer pei ozordi i en size ki zot pe adrese sa i annan ki'n vin ek zot prop kalite Lezislasyon *ok* ?

I annan ki pe met zot bann Polisi.

So konman en pei ki mon santi sa size parfwa i en pa tabou pou aborde sirtou par atraver paran.

E osi kot letan nou koz kontraseptiv plizyer nou dan nou *mindset* nou mazin zis bann fiy ki omit bann garson.

So se ki sa konversasyon mon krwar i ava anmenn e ledikasyon pou nou kapab fer en retablir *the context* san ki nou bezwen en diskriminaz fer okenn diskriminasyon.

Ouswa dimoun pe panse ki nou pe entrodwir serten keksoz ki pa devret ganny entrodwir sa i enn.

E dezyenmman ledikasyon, ou'n koz en pti gin lo *curriculum* e mon santi ozordi ki i merit annan plis ki kapab ganny fer Minis.

Eski petet avek Minister Ledikasyon zot petet fer en pti *stock taking as* sa *quality of programme* ki zot pe donner si i ase relevan sa zour ozordi, avek modernite bann diferan eleman ki'n antre dan kiltir nou lasosyete li menm eski pe pran kont pou anpese ki ou konnen nou statistik *teenage pregnancy* in ogmante pou pran kont en pti gin sa laspe pli riger kot i konsern prevansyon deteksyon osi ? Mersi.

MR DEPUTY SPEAKER

Mon ava envit *panel* pou annan en larepons ?

MINISTER PEGGY VIDOT

Mersi Onorab. Onorab, wi parey ou pe dir i annan en kantite ki nou bezwen pe fer.

Parey mon'n masyonnen nou e revwar nou Polisi.

E nou pe revwar bann diferan *practices* dan diferan landrwa ki mannyer zot fer ki kalite problem ki zot pe rankontre akòz nou pa oule repet fot ki serten pei i kapab fer e pou nou kapab ganny en keksoz ki akseptab pou nou.

Wi sa lenformasyon sa ledikasyon i esansyel.

Pou sa rezon ki enn nou'n konmanse *youth education for success* parey mon'n dir i pa zis vize fer adolesan ou si non zanfankol.

I vize osi ver paran. E nou'n konmanse sa diskisyon avek group paran. I vre ki i annan bokou paran ki santi i mank zot lafason lapros, ki mannyer zot kapab konmans en konversasyon lo lasante reproduktiv ou si non lasante seksyel avek zot zanfankol.

E nou panse ki sa bann rankont sa bann ledikasyon ki nou *staff* pe fer, i ava ed zot pou zot kapab arive sirmont sa bann defi ki zot santi. E apre nou kapab vwar ki mannyer nou kapab anmenn li pli larz dan sosyete.

Ou dir ki mannyer nou pou konmans sa konversasyon ou'n konmanse la. E konversasyon i pou toultan ave diferan group nou pou bezwen pe fer li. E nou ava fer li firanmezir ki sa loportinite i donnen e lafason ki nou kapab planifye li.

I en keksoz ki ou pe dir wi, nou annan en problem, pou mon sak lansentman ki non dezirab i pa'n planifye, i en problem.

E sirtou konman i ariv dan en adolesan kot parey zot in dir dan letan mon ekout zot bann deba ki zot in fer avan sa Mosyon ti ganny pase, i lavi sa zanfankol sa adolesan i afekte.

Me selman s aki nou pe vwar en pe sa bann keksoz ki nou pe dir nou pe fer nou pa pe fek konmans fer nou an viger pandan serten omwen sa ki mon kapab oz lo la se dan sa dernyen 4an.

E sa ki nou pe vwar se ki tou lansentman dan zenn ou sa lannen par egzantp 2024 ki nou fek kite i pli ba, ki 2019 par egzantp, depi 2019 nou lo en *downward trend*.

E alor i vre menm si nou annan zis enn ouswa de i pou en problem. Me sa ki kekfwannandler i annan en pti pe konfizyon se ki sa norm pe ogmante. E sa nou statistik pa pe tro montre sa. I montre nou plito en *base*.

E menm lo kote avortman nou pe vwar poudir

ankor i annan en *base*. Letan nou regarde i desann konpare avek bann lannen presedan.

So i bezwen pe ariv en serten keksoz dan ledikasyon nou bann zenn bann responsabilite nou sosyete ek nou adolesan ki pe ede.

Me nou bezwen parey mon dir menm si enn si de i bokou ,nou bezwen fer nou mye pou nou anpes sa arive.

E nou donn nou kapab dir nou donn zot lasirans ki nou pe fer nou mye pou nou kapab ansanm fer sa ki nou, nou kapab.

Me i en problem en problem lasosyete. I en problem si oule nou tou e nou tou kolektivman ki nou ki zot, ki Ledikasyon, ki Sosyal nou tou nou annan nou bezwen pe travay ansanm

Me nou'n konmanse sa travay nou pe travay tre pre avek Minister Ledikasyon.

Nou kapab asir zot e mon krwar nou'n pran desizyon ki nou bann size koumsa nou pe zwenn regilyerman po nou kapab ansanm fer sa travay. Alor mersi Mr Speaker.

MR DEPUTY SPEAKER

Mersi *Minister*. Napa siplemanter lo sa kestyon. Donk, nou'n ariv a lafen nou *question time* pou ozordi.

Nou ava remersi *panel* ki'n zwenn nou depi bomaten, *panel* sorti kot Minister lasante ki ti pe dirize par Minis

Peggy Vidot e i ti akonpannyen par Sekreter Prensipal pour Lasante Dr Bernard Valentin e osi Dr Danny Louange plito ki Sef Egzekitiv *Health Care Agency*. Mersi pou zwenn nou. Nou ava *adjourn* la.

Nou pe zis rapel bann Manm ki 1 er edmi dan *lobby* i annan en kozri par en madanm sorti en *Peace Ambassador* ki akredite avek Nasyon-z-Ini ki pe vin fer en pti prezantasyon avek Lasanble sa i pou 1 er edmi e alor lasanble pou *adjourn* e nou pou rebran travay 2er edmi.

Donk mersi tou dimoun pou zot partisipasyon. Nou ava revwar 2er edmi.

(BREAK)

MR SPEAKER

Bonn apre midi nou bann Manm nou *staff*, e piblik ki pe swiv nou mersi pou zot partisipasyon pou apre midi.

Alor nou pe pran en *Constitutional Appointment Emoluments (Amendment) Bill*. E avek sa, mon pou demann ou, Madanm Hansard-Raporter pou apel Vis-Prezidan ek son delegasyon, ki pou avek nou.

Bonn apre midi Vis-Prezidan Ahmed afif, bonn apre midi Dr *counsellant* AG's office e Mrs Julia Jean, *Senior Legal Draftsperson*, dan AG's Office.

Mersi pou zwenn nou pou konsider sa *Bill, Constitutional Appointees Emoluments (Amendment) Bill 2025*. Avek sa, nou ava demann Mosyon pou *Second Reading*? Onorab Arissol, wi?

HON SANDY ARISSOL

Mersi Mr Speaker. Bonn apre midi Mr Speaker, bonn apre midi tou dimoun a lekout *VP* avek ou lekip.

Mr Speaker anba *order 69 (2)* mon pe *move* ki *Bill Constitutional Appointees Emoluments (Amendment) Bill, 2025* i ganny lir en Dezyenm Fwa. Mersi.

MR SPEAKER

Mersi. Mon ava ganny segonnman? Onorab Henrie.

HON GERVAIS HENRIE

Mersi Mr Speaker. Bonn apre midi tou dimoun. *Motion for Second Reading* i ganny segonde.

MR SPEAKER

Mersi. Vis-Prezidan nou ava ekout ou lentrodiksyon lo sa *Bill*.

VICE-PRESIDENT AHMED AFIF

Mersi bokou, Mr Speaker. Bonn apre midi. Mr Speaker, *Leader* Biznes Gouvernman, *Leader* Lopozisyon, tou bann Manm Lasanble e tou dimoun a lekout.

Mr Speaker, sa lamannman i apel *Constitutional Appointees Emoluments (Amendment) Bill, 2025* ki devan nou i kourt e i tre senp.

I pe senpleman aplik menm kondisyon pansyon pou bann Anbasader, O Komisyoner ek reprezantan Sesel kan zot kit zot pos Konstitisyonnel. Lekel sa bann pozisyon ?

Anba sa Lalwa parey in ganny amande a plizyer repriz dan lepase me kondisyon kler pou tou sa bann pos konstitisyonnel ki'n ganny liste *comme* swivan ;

Savedir tou bann Manm Konsey de Minis, Prezidan, Vis-Prezidan, *Principal Minister*, bann Minis, tou Manm Lasanble Nasyonal, ki enkli Speaker, Deputy Speaker, bann *Leaders* dan Lasanble, tou bann Manm Komisyon Elektoral, e Oditer Zeneral.

Zot, zot kondisyon pou ganny pansyon, i ganny defini, par egzanp, si zot in bezwen, ki zot in bezwen deservi omwen 48 mwan dan en pos konstitisyonnel, e zot bezwen ariv zot laz pansyon avan zot kapab tous zot pansyon.

Tandis ki pour bann Anbasader, O Komisyoner ki reprezantan Sesel, pou zot sa bout i dir ki zot osi zot bezwen ariv laz pansyon ki'n ganny defini avan zot ganny zot

pansyon. (Pardon), zot, zot pa bezwen ariv sa laz pansyon ki'n ganny defini avan zot kapab tous sa pansyon.

Rezon i pa ladan, ki nou, nou krwar set en lerer kan lamannman ti pase sa letan.

Alors si en Anbasader i zis kite e i annan 40 an, in fer li son 48 mwan dan post, i kapab ganny enterprete ki li i pa bezwen esper laz pansyon ki'n ganny defini, preskri, me i kapab toudswit tous en pansyon byensir sa pa ti zanmen en pansyon.

Ki nou pe demande atraver sa lamannman alors se koriz sa lerer e fer sir ki zot osi sa kategori tou ki Anbasader, O Komisyoner, e lezot reprezantan Sesel, zot pou annan menm kondisyon aplikab avan ki zot kapab ganny en pansyon.

Vwala Mr Speaker, mon espere ki avek sa detrwa mo sa lamannman senp i kler e ki nou kapab, kont lo zot sipor, pou fer li pas avek linanimite e mersi bokou, e mon kont lo zot sipor. Mersi, Mr Speaker.

MR SPEAKER

Mersi, Vis-Prezidan, bon en *Bill* pli kourt ki mon krwar mon'n deza vwar dan Lasanble.

Nou ava ouver deba. Eski i annan entervansyon lo lapar Manm? Onorab Pillay.

HON SEBASTIEN PILLAY

Mersi Mr Speaker. Mr Speaker, Prozedlwa devan nou parey ou'n dir enn bann pli kourt enn bann pli sipoze pli senp ki nou'n deza regarde. Akoz dan lesansyel sa ki pe propoze pou fer.

Me selman sa Prozedlwa i soulev en kestyon ki bezwen ganny adrese, ki pa'n ganny adrese dan lepase, dan nou Konstitisyon, me ki'n ganny mete la.

Nou Konstitisyon si mo pa tronpe lartik 104 i prevwar ki nou pe koz lo lezot reprezantan ki kapab ganny konsidere konman bann apwentman.

Prezan Mr Speaker, problemn avek ki mon annan avek sa, nou fer - dan sa Lalwa, i fer referans avek de kategori avek de group dimoun, bann Anbasader e bann O Komisyoner. I byen, me ziska la, nou pa ankor deza annan en apwentman en lot sa o zofisye ki Konstitisyon i dir nou.

E sa Lalwa li prezan ki i'n fer, i'n pran verbatim sa ki konstitisyon i dir, e in zis met li la. E mwan pou mon sa, i soulev en problemn. Akoz pou Lasanble e pou benefis piblik, nou napa lezot kategori bann dimoun ki ganny aprouve - ki zot lapwentman i ganny aprouve atraver Lasanble Nasyonal pou zot form par bann *Constitutional Appointees* e tonm anba sa Lalwa,

Contitutional Appointees Emoluments.

E ler Vis-Prezidan in fer son prezantasyon, in konsantre lo lesansyel, ki i annan sa koreksyon ki pe ganny fer, me i *still* reste sa anbigite prezan, ki bezwen ganny adrese.

Akoz pou mwan ozordi, mon pa konnen prezan si Gouvernman, ki mannyer nou pou prosede par egzanp avek lapwentman en lot kategori group dimoun ki pa prevwar anba Konstitisyon.

Se sa ki pou mon i vin en problem. E mon ti ava kontan ki sa i ganny klarifye pour nou, aköz in ganny mete dan Lalwa prezan en lot sa lot lapwentman.

Lalwa dan mon lopinyon ti devret konsantre lo Anbasader e O Komisyoner, ki bann apwentman ki nou'n fer ziska la.

Nou pa ankor kree en definisyon pour sa lot group lapwentman. E ziska la, nou annan zis bann Anbasader ek bann O Komisyoner ki'n ganny apwente.

E ler mon lo sa pwen bann Anbasader bann O Komisyoner, i annan rezon aköz nou apwent bann Anbasader ek bann O Komisyoner, aköz zo, t zot reprezant lopinyon Leta Sesel an ver bann Polisi Enternasyonal ki zot annan, e byensir zot travay i fer ki zot

fer bokou travay dan sa konsiderasyon.

I malere nou'n vwar resaman kot in annan Manm Lasanble ki'n al reprezant en lopinyon Lasanble Nasyonal, san ki nou lo sa kote latab nou ganny sans dir nanryen lo e nou menm ganny refize sans pou nou koz lo la.

MR SPEAKER

Onorab, ou *off subject*. Nou'n *deal* avek sa. Mersi.

HON SEBASTIEN PILLAY

Mon al *off subject* sak fwa mon dir ki nou pa'n donn nou lopinyon lo lefe ki lasanble in ganny mete konman form par en group pou *Israel*, mon *off subject* sak fwa mon dir sa ?

San ki nou, nou ganny konsilte ki en Manm pa ganny ni menm *deal* avek ler i fer sa?

MR SPEAKER

Onorab, ou konpran mwan tre byen.

HON SEBASTIEN PILLAY

Mon *off subject*?

MR SPEAKER

Ou konpran mwan tre byen. Silvouple annou evit en lot enteripsyon silvouple zis...

HON SEBASTIEN PILLAY

Konmsi ou pe dir mwan mon pou ganny met deor ankor si mon koz lo la ?

MR SPEAKER

Onorab, mon pe dir ou sa size ki ou'n leve i pa relevan an se moman. Mersi.

HON SEBASTIEN PILLAY

Be sel letan ki mon kapab lev li akòz ou pa oule les mon lev li.

Nou ti ava kontan ou pran en aksyon, akòz i bezwen annan en aksyon ki ganny pran.

Mon'n ganny trennen dan en keksoz ki mon pa'n zanmen

MR SPEAKER

Ale fini ou diskour apre mon ava reponn ou ankòr.

HON SEBASTIEN PILLAY

Be mersi Mr Speaker, pou permet mwan fer mon diskour.

Se sa ki mo lesansyel ki nou pe koz lo la. Sa ki mwan mon oule klarifye avèk ou se ki ou bezwen kapab dir nou ler nou pe koz nou pe donn en dimoun en pansyon pou fer sa.

E nou Lasanble Nasyonal nou osi nou annan nou diplomasi ki nou fer.

Ou pa kapab annan ou en dimoun ki al form par en group san ki nou, nou ganny desizyon lo la.

E se pou sa rezon ki nou, nou pe vot lo en pansyon pou en Anbasader ozordi. Se ki ler zot fer en travay ki konsern Leta.

Me mon apresye lefe ki ou pe konpran akòz *in the first place* ou ti'n devret donn nou lopòrtinite pou *raise en matter of privilege* lo sa size.

E konman en group dan Lasanble pou eksprim nou lopinyon.

Ou ou'n dir nou poudir sa Manm i al donn son *commitment* lo li menm. Ki mannyer nou pou konnen ?

MR SPEAKER

Mersi Onorab. Si ou napa nanryen pou dir lo sa *Bill* nou ava kontinyen avèk en lot Manm. Onorab Arissol. *Ohh* eskiz mwan Onorab Arissol en poz.

Pou benefis Manm e piblik, mon pou ankòr reponn ankòr enn fwa menm ki mon lopinyon in ganny eksprimen byen bomaten par *Deputy Speaker*.

Rezon akòz mon pa pe vwar ki Lasanble i devret enterfer plis dan sa zafer, se akòz sa Manm ti demann permisyon pou al lo en vizit personnel an relasyon avèk en group relizye.

Apre la tou resaman nou'n vwar sa lartik sorti lo medya enternasyonal in ganny sirkile. Me mon ensiste ki sa ki'n ganny rapòte dan sa lartik napa nanryen pou fer ek Lasanble Nasyonal.

Sa Manm pa'n reprezant lopinyon Lasanble Nasyonal. I pa'n *claim* ki i pe reprezant

lopinyon Lasanble Nasyonal i pa en Anbasader Lasanble e in fer son partisipasyon lo baz endividyel, personnel.

Si Lasanble in ganny mansyonnen se sa rapor sa lartik ki'n mansyonnen e si zot, zot annan rezon pou mansyonn Lasanble Nasyonal ladan oubyen non, me in napa nanryen plis ki i konsern Lasanble.

Mon demann ou pou aksepte sa konklizyon *ruling* e koumsa nou ava kapab prosede lo la. In napa okenn nanryen pou fer ek Lasanble. Onorab Sandy Arissol.

HON SANDY ARISSOL

Mersi Mr Speaker. Bonn apre midi VP avek ou lekip.

Mon ti anvi fer zis en pti kontribisyon atraver sa Prozedlwa ki in ganny prezante par VP avek nou apre midi.

Mr Speaker, letan nou koz lo pansyon nou konnen pansyon i en keksoz nou pe koz lo larzan e i en keksoz ki sansib, mon anvi ki letan Gouvernman atraver VP ki la letan nou pe met bann Lalwa azour annord ki pou tou bann *Constitutional Appointees* zot pansyon i azour, mon ti ava kontan ki mon Gouvernman, nou Gouvernman, zot osi zot fer en resers pou nou asire ki tou bann dimoun, bann Seselwa ki'n travay, ki merit ganny en pansyon, dir nou

asire ki zot osi zot in benefisye avek zot pansyon.

Ki letan mon pe get pou mon, mon pe get pou Anbasader, pou Minis, pou lezot, mon anvi ki mon Gouvernman i fer en resansman. Mon ava apel li en resansman pou nou asire ki tou dimoun ki'n travay dan Gouvernman, ki merit ganny en pansyon.

Parske souvandfwa dan sa travay ki nou'n fer konman Manm Lasanble Nasyonal letan nou vizit bann endividi, souvandfwa ou bat avek en dimoun ki dir ek ou, "ou konnen mon *entitle* ganny en pansyon, mon'n bat isi, mon bat laba, ziska prezan mon pa ankor ganny okenn repons."

Kekfwa ti ava bon pou bann dimoun ki'n travay en kantite lannen pase, kekfwa zot santi, zot merit en pansyon oubyen si i annan n serten laranzman ki ti ganny fer oubyen son kondisyon, ti pou ganny met li ganny en pansyon, mon krwar i ava enportan pou nou fer sa travay lo non nou bann dimoun.

Parski si i devret ganny son pansyon, annou dir li fran i devret gannyen. Oubyen si pa devret gannyen, annou osi kominik avek li.

Fer li konnen poudir "get sa ou pa tonm dan sa kategori. Oubyen letan nou'n balanse, nou'n tyeke nou napa pansyon pou ou."

Konmsi Mr Speaker, pou letan nou, nou pe asir en kalite group dimoun, en kategori group dimoun an relasyon avek zot pansyon, e mon kontan ozordi poudir laz pansyon i mars parey pou nou enkli Manm Lasanble Nasyonal konpare avek avan, letan nou ti fer en manda e, otomatikman ou ti ganny pansyon. La, tousala in revize ki mon *happy*.

Me mon ti ava kontan osi ki bann dimoun ki ekout nou, ki swiv nou laba deor, ki zot osi zot ava azour pou asire ki personn pa ganny kit deryer an relasyon avek letan nou pe koz pansyon. Parske nou konnen larzan i sansib.

Tou dimoun i dir ek ou in travay i ti ava kontan ganny son pti benefis, so ki pou tou dimoun zot osi zot benefisye avek pansyon avek travay ki Gouvernman i ava fer.

Mon ti anvi zis fer sa Mr Speaker, pou letan VP pe fer sa travay ek ou lekip pou zot balanse e pou zot vwar poudir tou dimoun osi zot kapab ganny sa ki pou zot si zot merite. Mersi bokou, Mr Speaker.

Mersi, Onorab. Onorab Georges

HON BERNARD GEORGES

Mersi, Mr Speaker. Bonn apre midi Mr Speaker. Bonn apre midi, VP, avek ou delegasyon

tou bann Manm Onorab, tou dimoun ki pe swiv nou.

Mr Speaker, mon ti anvi zis pran laparol apre midi pou koz lo, sa pwen, *Principal Representatives of Seychelles*.

Akoz sa mo konnen in ganny leve dan *Bill Committee*. Mon pa ti dan *Bills Committee* me en pwen ki mon konnen in ganny souleve laba, in ganny debat en pe.

E kekyon aparaman ki devan nou. E mon krwar ki i Onorab Pillay dan son bref kozri apre midi in tous sa en pti pe sa lo la. Kisisa annefe en *Principal Representative*. Akoz lartik 64 efektivman i dir ki annefe lartik 64 pa konstitye okenn lofis. Bann lofis i ganny konstitye parey nou konnen par Prezidan Larepublik ki annan sel pouvwar Egzekitif dan pei.

Me i ganny mansyonnen dan lartik 64 par rapor a lefet ki Lasanble i bezwen aprouv okenn nominasyon par Prezidan Larepublik konman Anbasader, konman O Komiser pou bann pei *Commonwealth*, oubyen *Principal Representatives of Seychelles*.

E me i en lartik ki *obviously* nou tou nou'n lir plizyer fwa, i en lartik ki mon menm mwan mon'n lir plizyer fwa depi ki mon LGB aköz tou bann Mosyon pou apwentman Anbasader avek O Komiser i sorti mon biro. E zanmen

mon'n poz mon lekor sa kestyon ki sa en *Principal Representatives* akòz pou mwan sa ti relativman kler.

Mon vwar li konman en dimoun ki ganny apwente par Sesel par Prezidan, pou reprezant Sesel, pa konman en Anbasader e pleni potansyer, pa konman en O-Komiser, me konman en reprezantan Sesel dan en lorganizasyon ou en lenstitisyon enternasyonal, tel parey par egzantp si nou ti annan en *permanent representative* kot *WHO*, oubyen kot *COMESA*, oubyen kot okenn lorganizasyon enternasyonal ki pa en pei - i pa en pei souvren se sa dimoun pou al laba. I pa bezwen Anbasader ki reprezant Sesel dan en lenstitisyon enternasyonal rezyonal or *whatever*.

I kapab zis senpleman en *Principal Representative* - en dimoun reprezant nou pei san ki i ganny tit Anbasader e san ki i ganny sit O Komiser.

E sa i permet, Mr Speaker, pa zis Sesel, me tou bann dan pei, ki ou pa bezwen apwent en dimoun Anbasader ki kekfwà - mon bezwen *manage* mon bann mo byen - ki pou servi pou deservi zis en pti peryod letan, oubyen en manda.

Akòz en tit Anbasader, enn fwa ki ou'n fer i la pou lavi. *Once you're appointed you're an Ambassador for life.*

E sa ki tou bann pei ki Sesel enkli i devret konsyan e se pou sa rezon ki sa bann lapwentman i vin devan Lasanble Nasyonal, akòz se nou ki, *en quelque chose* gardfou Egzekitif dan sa bann apwentman pou fer sir ki bann dimoun ganny apwente Anbasader O Komiser oubyen *Principal Representatives* se bann dimoun ki *fit* sa pos.

Me ki sa bann lapwentman i ganny fer pou benefis Sesel non pa pou benefis sa dimoun ki pe apwente oubyen sa dimoun ki pe ganny apwente.

E donk, se pou sa rezon ki mon krwar ki Konstitisyon i donn sa trwa s trwa legzanp. Anbasader, nou tou nou konnen en dimoun i ganny apwente Anbasader swa akòz in fer karyer diplomasi dan Minister Zafer Etranzer, ouswa i en swa politik, ki en *Head of State* i annan drwa apwent en dimoun konman a en lot pei en lot souvren.

O Komisyoner parey, me i annan en kantite bann lezot lenstans kot ou anvi annan en reprezantan pou en pei san ki sa reprezantan i neseserman annan grad Anbasader oubyen *High Commissioner*.

Alor mon mazin e mon anvi zis propoz sa pa konman en dimoun ki pli malen ki lezot - mon rekonnet mon febles dan sa domenn me konman en dimoun ki'n reflesir en pe lo sa

pwen depi ler ki *Bills Committee* in soulev sa pwen.

Akoz parey mon'n dir ler mwan mon ti lir sa lartik pou premye fwa se koumsa ki mon ti vwar en *Principal Representatives* - en dimoun ki ganny apwente par en pei pou al dan en enternasyonal san ki i ganny grad Anbasader, me ki kantmenm i bezwen en grad ase o pou li dir mon reprezantan prensipal sa pei avek sa lorganizasyon.

La Mr Speaker, mon remersye ou. Mon ti anvi zis met sa detrwa pwen devan pou ed sa deba. Mersi.

MR SPEAKER

Mersi. Onorab Aglae.

HON EGBERT AGLAE

Mersi Mr Speaker. Bonn apre midi *VP* avek ou *panel*.

Mr Speaker, sa lamannman ki devan nou la i senp, me selman, i amenn en pli gran refleksyon en ti pe pli larz kot i konsern ban *Constitutional Appointees*.

Rezon aköz mon dir sa piblik ki la deor ouswa pep Seselwa li menm li letan nou nonm bann *Constitutional Appointees* tou kou nou pe mazin Minis, nou pe mazin *MNAs*.

I sa de kategori dimoun dan zot profesyon, dan zot laliny profesyon ki souvandfwa dimoun i mazin. E se sa de kategori

ki ganny targete dan fason, politikman *ok* ?

E nou konman bann politisyen, nou apwent serten sa bann *Constitutional Appointees* parey Minis. Nou donn nou *blessing* lo la, bann Anbasader ki *appear* devan Lasanble osi. Nou aprouve pou kapab fer zot bann fonksyonman ki en pei i neser i annan. Parey bann lezot pei.

Me letan ou pe regard osi bann benefis ki atase letan ou dan bann pozisyon parey ki mon krwar i neser aköz letan ou pe *hold* sa bann nivo lofis la, i en travay ki ou bezwen fer li dan en fason transparan, nob, ki en bezwen annan en *high integrity* dan en fason.

E kot respe par ou popilasyon ou bann dimoun i bezwen ganny mete lo en o nivo standar.

Letan nou pe al lo sa lamannman kot i konsern sa de kategori. Bann Anbasader ek bann *High Commissioners*.

Byensir nou anvi normaliz lefe ki bann lezot kad lapwentman Konstitisyonnell ozordi zot pe resewar ki pou mwan i normal sa. Mon napa problem ek sa.

Me lefe i reste ki sa kalite travay ki zot, zot pe fer zot pa fer li zot tousel *ok*? Ou ganny en lapwentman ou ganny poste dizon ou pe ganny poste dan en pei kot non ou pei i

annan en relasyon Bilateral avek pou al fer nou misyon.

E la kot mwan mon pe kestyonn petet a lavenir konman en pei ki direksyon nou pran kot i konsern bann lezot benefis.

Akoz mon'n dir poudir en Lanbasad i pa kapab travay li tousel. Nou annan dan lofis Lanbasad sa ki nou apel en Depite - en Depite *Chief Mission* osi.

Nou annan bann Premye Sekreter, nou annan bann Atase ki pei i anvoye ki zot dan en kad petet en pe spesyalize dan en domenn ki zot antase dan en pei baze lo sa ki nou pei nou pe *request* i al fer aköz bann lyen bann lye ekonomik osi, ki nou poste en dimoun laba.

So having said that Mr Speaker, nou osi bezwen konmans mazin sa travay ki zot, zot ofer zot osi.

Malgre ki zot pa tonm direktman konman en *Constitutional Appointees* - zot pa ganny ankadre ladan. Me a en pwen donnen zot pe fer preski menm kalite reprezantasyon.

Par egzanp si en Anbasader in al i lo en misyon me selman i bezwen bouze al dan en lot - i kapab en lot *state* i kapab en lot *provers* i kapab dan en lot *area* dan en lot pei.

Se sa premye sekreter ouswa sa depite ki pran rol sa

responsabilite sa lofis dan son labsans.

So ki petet i pe desarz preski menm responsabilite, menm si pa tou responsabilite an term direktiv i kapab fer. Me selman i ede osi.

So lo la ki mon pe en refleksyon lo ki mannyer a lavenir konman en pei nou regard bann kad kot i konsern bann pansyon, *ok ?*

Eski zot osi pa pe merit konsidere a en fason menm si i pa lo menm nivo ki kalite pansyon ki ou donn sa kalite dimoun, *ok ?* Sa i lo nivo sa lamannman.

Me selman osi i annan bann lezot kad travayer mon krwar in neselit serten bann refleksyon aköz letan dimoun pe ekout nou la zot pe dir la zot pe rod pansyon pou bann Anbasader pou amande pou fer li vin normalize bann keksoz koumsa - i annan i reflesir be mwan mon kalite travay ki mwan mon pe fer diferan travay son *lifespan* sa travay osi ki i pe fer eski i pa merit petet parey en *special pension?*

Parey nou annan ek Militer nou annan bann kad ki ou ganny bann pansyon spesyal. Mwan mon pe dir sa *without* lo sa size ki devan nou konman en pei mon krwar nou pou bezwen konmans regard en pti gin, *ok ?* Pe enport pozisyon me selman pou

mwan i kontribisyon valab ki ou fer pou pei.

E parey nou dir ki parfwa si napa zot i annan serten fonksyonman serten sèkter serten departman i pa pou bouze.

Wi, nou tou nou pe kontribye anver Fon Pansyon si ou pe travay o ganny ou en pansyon. A laz ki'n ganny pou ou ganny pansyon ki 65an dan bann konteks malad ou kapab fer pran en *early pension*.

Me selman bann serten akter dan lekonomi pei, e la parey mon mazin petet bann maren.

MR SPEAKER

Onorab, nou pa pou kapab antre dan en deba lo pansyon an zeneral.

HON EGBERT AGLAE

Mon pa pe al...

MR SPEAKER

Mon pou zis demann ou kouver ou bann pwen i enteresan byensir me selman ou bezwen konklir lo sa pwen la.

HON EGBERT AGLAE

Mr Speaker, mon ava konklir. Me selman Onorab Arissol in tous detrwa pwen ki an deor sa laliny.

Mwan sa ki mon pe sey dir se i pou ariv en moman letan konman en pei nou

regard en pti gin ki direksyon nou pou ale.

So mon pa pou al pli lwen ki sa Mr Speaker, pangar ou aret mwan.

Me selman sa ki pe arive la ozordi sa ki pe ganny fer dan Lalwa sa lamannman i en keksoz ki mon krwar i pou benefisye pe enport Anbasader ki ti ganny apwente ki pe travay ki swa sa lopinyon politik ki kote i ete i ava fer zistis.

Me selman tout an prenon kont ki pep Seselwa letan nou pe koz *Constitutional Appointees* annou gard li dan son lanpler total. Petet i annan en ledikasyon ki manke. Ki bezwen ganny fer, nou pa mazin zis *MNAs* bann Onorab ouswa Minis, nou regard keksoz dan son lansanm e la fason ki bann benefis i ganny apropiye ki al ver sa bann kad.

So mon ava aret la Mr. Speaker. Mersi.

MR SPEAKER

Mersi Onorab. Onorab Gill.

HON CHURCHILL GILL

Mersi Mr Speaker, bonn apre midi *panel*, bonn apre midi tou dimoun a lekout.

Mr Speaker, sa *Constitutional Appointees Emolument Amendment* i *straight forward*.

Mon'n tann *LGB*, in fer serten komanter lo sa *Principal Representative*.

Annefe mwan mon ti lev sa dan *Bill Committee*. Mon ti anvi en klarifikasyon en pe pli kler ki i ete ozordi aköz ki nou'n fer, nou'n sit Konstitisyon. *Comme* kwa sa i *state the* Konstitisyon.

Me selman dan sa *mother Act* tou landrwa i spesifye sa bann diferan kad. I *clearly spelt out*. Me selman pou sa bout *Principal Representative* menm si nou konnen i en apwentman ki ler i ganny fer.

Me selman i napa en kad pou li. *As it stands now* i napa kad ki nou kapab nou tou tonm dakor poudir zot, zot tonm anba la e zot bann reminerasyon pou vin koumsa i pou vin koumsa parey lezot in *clearly spelt out*.

Mwan mon ti santi ki si sa letan ler nou ti met sa dan Konstitisyon, nou pa ti donn li en kad, petet la ti en loportinite pou nou donn li en kad pou li kler pou tou dimoun.

Me selman, mwan menm mon napa problemm avek sa, zi selman, mon ti santi i en loportinite manke, kekfw nou ti kapab amenn plis klarite lo la.

An menm tan, en klarifikasyon ki mon ti ava kontan gannnen avek *VP* ler i donn son larepons, se nou pe anglob tou dimoun ki'n deza

en Anbasader Sesel ou ava eklersi si mon korek la *VP*.

E, mon kestyon se eski nou'n deza oubyen ler nou ti pe travay lo sa la Lalwa, sa lamannman, eski nou'n kapab fer en *costing* konbyen pou kout pei ?

Sa bann dimoun zot devret gannnen zot konpansasyon sa i *ok* nou napa problemm ek sa, me selman eski pei i konnen ki kantite i pou kout li sa ?

E *moving forward*, eski sa sonm ki sa i *add up to*, i en bann sonm ki deza ganny konmsi deza annan en nide pou dir be *ok* enn fwa ki sa Lalwa i pase, i vin anfers I pou kout pei, tan milyon tou le z-an *or otherwise*? Mon ti ava voudre ganny en klarifikasyon lo la.

An menm tan, pou sa bann kategori dimoun ki tonm anba la, mon krwar zot *deserve*, zot osi zot in travay pou pei, e zot in fer zot in desarz zot responsabilite ki ti ganny konfyè avek zot.

E i normal se ti annan en keksoz ki pa ti anlany, oubyen e benefis ki ti devret a zot laporte ki pa ti'n ganny normalize.

Mon krwar i normal ki sa i devret normalize. Me selman i ti ava bon ki nou konnen la ki nou pe vot sa, ki sonm ki nou pe pey anvizaze *henceforth* pou peye pou ki sa bann dimoun zot zot ganny zot

benefis ki zot *deserve*. Mersi Mr. Speaker.

MR SPEAKER

Mersi Onorab. Vis-Prezidan mon envit ou pou donn ou repons lo deba.

VICE-PRESIDENT AHMED AFIF

Mersi bokou Mr Speaker. Mon ti ava kontan tou dabor remersye tou bann Manm ki'n aport zot kontribisyon e zot in met serten pwen devan pou zot ganny plis klarifikasyon. E mon ava profite pou mwan esey donn klarite lo la.

Mr Speaker, sa ki in evidan san bann entervansyon sete mo *Principal Representative* dan Lalwa.

Mwan osi ler mon'n vwar sa, mon'n demann menm kestyon. I en keksoz ki zot in retir direkteman dan Konstitisyon ki li menm i pa'n defini kler.

E alor, Parey i ete la ozordi parey nou konnen i pa size okenn lamannman ozordi devan nou. Me selman, i en size ki mon dakor avek bann entervenman ki nou pou bezwen port en pe latansyon pou konnen demen si zanmen i annan en ka kot en dimoun i dir, be mwan mon en *Special Representative*, mon'n ariv sa laz pou mon ganny en pansyon e mon merite gannye.

E pou annan en dimoun ki pou bezwen dir si wi oubyen non, pou en *Principal Representative*.

I pa kler pou mwan ozordi, me selman mon mazin, Minister Zafer Etranzer ansanm avek Biro-*Attorney Zeneral*, i a kapab zwenn ansanm pou zot ganny en pti pe plis klarite lo sa size ki mon dakor avek zot poudir, i en size ki bezwen klerman ganny defini.

Onorab Arissol, ti pe demande ki i ti ava kontan vwar ki tou dimoun. Ler nou pe dir nou pe met fer laplenn nivo, menm kondisyon pa aplikab pou bann Anbasader parey tou lezot bann apwente ki dan Konstitisyon zot osi zot ganny menm kondisyon.

Mon krwar ozordi parey Lalwa i été, nou annan po tou dimoun de fason ki zot kapab benefisye ler zot al dan zot retret.

Enn, si zot in kontribye ver Fon Pansyon otomatikman pou annan serten benefis ki zot kapab gannye, depandan lo konbyen letan zot in kontribye ki zot dernye kontribisyon, eksetera.

E byensir si ou pa'n fer kontribisyon osi i pou annan en lenpak, ou riske i pa kapab rekla nanryen avek Fon Pansyon li menm akòz ou pa'n ede pou kontribye.

Me sa set en sous ganny en keksoz ou en retrete.

Ou dezyenm sous, se Sekirite Sosyal. E Sekirite Sosyal parey, sa ki nou dir li an Angle, en *social safety net*. E li i anmas tou bann lezot dimoun, ki en sitwayen Seselwa, me lo diferan kondisyon par egzanp, si i deza annan en pansyon si i pe ganny en pansyon avan en serten dat, ki nivo son pansyon i pe gannye? Eski i pe ganny plis ki R3mil 250, par egzanp?

E baze lo sa bann kondisyon, sa bon kriter, sa sonm ki ou pou gannye konman sekirite sosyal i ganny deside.

Alor, i preski garanti ki nenport ki dimoun ki ariv son laz retret, swa i pou ganny Fon Pansyon e an plis i pou ganny Sekirite Sosyal.

Me Sekirite Sosyal si ou en sitwayen ki garanti ou pou gannye. Sekirite Sosyal ler mon dir garanti ozordi, se la pratik ki tou dimoun pe gannye.

Strikteman si ou al dan Konstitisyon, i pa en garanti, selman par la pratik, parey nou pe nou'n enplimant li pandan tou sa bann lannen in toultan koumsa.

Alor, tou dimoun i konnen ler ou pou ariv ou laz retret, ou pou ganny sekirite sosyal, e si ou'n kontribye ver Fon Pansyon, ou pou ganny baze sa. E sa depann lo kantite ou'n kontribye.

Me mon antyerman dakor avek ou Onorab poudir nou bezwen e lezot Onorab osi ki'n koze Onorab Aglae mon krwar, in fer menm pwen ki nou devret rekonnet zefor tou bann lezot dimoun ki'n travay.

E petet si mon al lo pou Onorab Aglae ki dir nou bezwen rekonnet petet bann lezot dimoun ki'n travay akote bann Anbasader. Akoz zot osi zot in dan Lanbasad, mon antyerman dakor ek ou.

Me selman, nou bezwen fer sa distenksyon dan Lalwa.

Lalwa i rekonnet serten dimoun. Zis parey zot, zot bann Manm Onorab ozordi zot annan zot *clerk* ki travay ek zot. Zot annan plizyer lezot dimoun ki travay ek zot.

Mon mazine i pou parey Minis ki pou annan en sekreter, i pou annan en Konsey Teknik. I pou annan bann dimoun ki ed li en kantite ler i pa la zot fer en bout. Zot kouver en pe, bokou bann responsabilite ki pou annan.

E zot osi si nou poudir demen ki be *ok* sa bann ki pre avek li nou bezwen get zot dan en fason spesyal i pou annan tout en kad dimoun ki egalman nou pou bezwen regarde.

Me solman annou pa oubliye poudir sak o pos i vin avek son kondisyon. E ler ou, ou konnen, ou pe travay avek Anbasader dan en pos

konman en asistan, ou ganny poste aletranze se sa ou kondisyon.

E Anbasader osi konnen, pou dir ler li i ganny poste se sa son kondisyon.

E i pa en keksoz ki zot pe ganny trete dan en fason diferan. I en kestyon ki zot konnen egzakteman zot in al ladan ler zot ti antre dan sa pos.

Me selman, tou dimoun i bezwen ganny rekonnet pou zefor ki zot fer mon dakor

Mon krwar Onorab Gill osi ti pe demann menm, lesplikasyon e ti anvi konn en sonm konbyen nou pou nou pe anvizaze peye.

Onorab o tan ki mon konnen nou pe tyek dan Bidze 2025.

E sa ki mon vwar dan Bidze, pour bann *Former Ambassadors*, nou annan en sonm R1.7 milyon dan Bidze. Se sa ki Bidze 2025 i montre e sa i dan sa gro liv lo sa paz latab i *Constitutional Appointees Emoluments (Amendment) Act, 2013*, i met sa. Selman pou 2000, pou pansyon li menm, zot in met R1. 674884 milyon. Sa, sa sonm ki dan Bidze ozordi.

E avek sa Mr Speaker, mon oule zis fer en rezimen ki sa lamannman ki la devan nou i senpleman met bann Anbasader - O Komisyoner e bann Reprezantan Spesyal, Sesel aletranze lo menm kondisyon, kan zot pou pran

zot retret ki tou lezot apwente Konstitisyonnel ki deza liste anba sa menm Lalwa

Setadir Prezidan, Konsey de Minis, Manm Lasanble Nasyonal, Komisyon Elektoral e Oditer Zeneral.

Ki pou zot tous zot pansyon zot bezwen ariv laz pansyon ki'n ganny preskri dan Lalwa.

Nou pe met Anbasader lo menm nivo avek sa parski zot pa ti'n ganny mete koumsa zot, zot ti kapab tous zot pansyon pli boner. Si zot ti zwenn lezot kriter. Me sa ti en lerer e nou pe koriz li atraver sa lamannman.

Alor ankor enn fwa mon espere sa i kler e ki nou kapab pas sa vot lo merit evantyelman vot lo sa *Bill* avek linanimite. Mersi bokou, Mr Speaker.

MR SPEAKER

Mersi Vis-Prezidan. Avek repons Vis-Prezidan, nou ava demann bann Manm pou vot lo *general merit* sa *Bill* dan *Second Reading* Manm ki an faver lev lanmen ? Mersi, tou Manm in vote, napa Manm ki vot kont. Mersi.

Lo *general merit*, *Constitutional, Appointees, Emoluments (Amendment) Bill, 2025*, 28 Manm in vot pour, zero kont e zero abstansyon. *Bill* in aprouve.

Pou *Second Reading* Madanm Clerk.

MADAM CLERK

Mersi Mr Speaker. *The Bill for an Act to amend the Constitutional Appointees Emoluments Act.* Mersi Mr Speaker.

MR SPEAKER

Mersi. Mon pa vwar okenn lamannman dan sa *Bill*, eski nou pou pran Mosyon pou... ? Onorab Arissol ?

HON SANDY ARISSOL

Mersi, Mr Speaker. Parey ou'n dir tre byen, napa okenn lamannman dan versyon ki nou'n gannnen, so mon pe demann ou anba *Order 97(1)*, pou *move* pou nou ganny ou permisyon, pou ki nou kapab sispann *Order 70(75)*, pou ki nou sot sa Staz Komite pou nou al lo *Third Reading*. Mersi.

MR SPEAKER

Mersi. Mon ava ganny en segonnman? Onorab Henrie.

HON GERVAIS HENRIE

Mersi Mr Speaker. Mosyon pou sot Staz Komite i ganny segonde. Mersi.

MR SPEAKER

Mersi nou ava ganny en vot. Manm ki an faver lev lanmen silvouple? Mersi. Manm ki kont?

Vot pou sot *Committee Stage* lo sa *Bill 20* Manm in vot

pour, 0 kont, 8 abstansyon. Mosyon in ganny aprouve e nou ava kapab prosede pou fer *Third Reading*.

Sorry. Nou bezwen vot lo *Third Reading*. Nou ava pran vot lo *Third Reading* silvouple, Manm ki an faver lev lanmen? Eskiz mon nou bezwen Mosyon pou *Third Reading*. Onorab Arissol.

HON SANDY ARISSOL

Mersi Mr Speaker. Prosedir nou pran Mosyon anba *Order 76 (1)* mon oule *move* ki *Bill Constitutional Appointees (Amendment) Bill, 2025* i ganny lir en Trwazyenm Fwa. Mersi.

MR SPEAKER

En pti moman.

HON GERVAIS HENRIE

Motion for Third Reading i ganny segonde Mr Speaker.

MR SPEAKER

Mersi nou ava vot lo *Bill Third Reading*. Manm ki an faver lev lanmen?

Thank you. Okenn Manm ki vot kont?

Lo *Formal Third Reading* lo *Constitutional Appointees Emoluments (Amendment) Bill, 2025* 24 Manm in vot pour, 0 kont e 4 Manm in *abstain*. *Bill* in aprouve par Lasanble. Madanm Clerk nou ava ganny *Third Reading*?

MADAM CLERK

Mersi Mr Speaker. *This Act may be cited as the Constitutional Appointees Emoluments Amendment Act 2025.* Mersi Mr Speaker.

MR SPEAKER

Mersi. Sa ki'n konfiz mon se ki nou pa'n sorti dan Staz Lasanble nou ti touzour dan Staz Lasanble labitid.

Mersi. E mon remersi Vis-Prezidan e son delegasyon pou zot partisipasyon lo sa *Bill*. Nou a swet zot bon depar e bonn kontinyasyon.

Bon nou prosen *item* lo *Order Paper* i Mosyon e nou annan Mosyon ki'n ganny table pou ozordi e nou annan a la tet Mosyon par Onorab Georges. Onorab, mon ava demann ou pou met ou Mosyon.

HON BERNARD GEORGES

Mersi, Mr Speaker. Mr Speaker mon pe regard letan mon Mosyon i lir koumsa.

Sa Lasanble i konstitye en Komite Lasanble pou antreprann en lanket dan rezon aköz *Maison du Peuple*, in vin propriyete Parti *United Seychelles*, e an partikilye, sours finansman, pou aste later e pour konstrir sa batiman.

Lanrezistremman sa later e sa batiman, lo non predeseser Parti *United Seychelles* aköz ki sa batiman pa devret retourn

parey son non i dir pou Lepep Seselwa e pou fer okenn rekomandasyon nesaser avek Gouvernman, lo fitir sa later e sa batiman.

MR SPEAKER

Mersi. Mon ava ganny segonnman lo Mosyon. Onorab William?

HON WAVEN WILLIAM

Mr Speaker, mersi. Mon segonn sa Mosyon. Mersi.

MR SPEAKER

Mersi. Mon a demann loter sa Mosyon Onorab Georges pou adres ou Mosyon ?

HON BERNARD GEORGES

Mersi Mr Speaker. Mr Speaker, avan ki mon konmanse mon ti ava zis kontan mansyonn *Order* 57 (10) e zis averti ou avek Lasanble ki mon pou koz pou plis ki 30 minit anba sa *Order* en *mover* Mosyon i annan ziska 1erdtan.

Mon pa pou 1erdtan me mon riske al en pti pe an deor 30 minit ki barenm normal. 57 (10).

MR SPEAKER

Onorab Pillay, oule pran laparol lo ki size?

HON SEBASTIEN PILLAY

Wi, mersi Mr Speaker. Be nou *Standing Order* i kler se ou ki ziz final lo letan.

En Manm Onorab pa vin deside pou anba en mosyon kelkonk dir ou i pou koz pou kantite letan ki li i anvi koze.

"The Speaker's decision has to time shall be final." Se sa ki *Standing Order* i dir. Kekfwa ou pa konn ou *Standing Order Deputy Speaker*.

MR SPEAKER

Thank you. Wi, wi, wi. The Speaker's decision is fine.

HON SEBASTIEN PILLAY

Si ou pe dir nou ou pou les li fer 1erdtan, napa problemm...

(comments off-mic)

MR SPEAKER

Order! Order! Wi, Speaker i annan en soz.

E *Speaker* i osi ganny enstri pou li enterfer letan napa en regilasyon *Standing Order* ki egziste. E mon pa anvi ki Onorab Georges i koz plis ki en demi erdtan e - me selman mon rekonnet son drwa ki i *Standing Order* ki'n site 57 (10) i dir, *"the mover of an original motion shall be entitled to not more than one hour for the movers opening speech and thirty minutes for the reply."*

I annan en regilasyon, so nou ava obzerv li. Mon demann tou Manm pou reste osi bref ki posib. Onorab

Georges adres ou Mosyon silvouple.

HON BERNARD GEORGES

Mersi Mr Speaker. Mr Speaker, mon ti ava kontan kontinyen anba 57(10) *"and the Speaker at the Speaker's discretion the Speaker may extend this time."*

Si Onorab Pillay, ti'n lir son *Standing Orders* parey i ti'n devret. I pa ti pou'n fer sa lobzeksyon.

MR SPEAKER

Onorab Georges

HON BERNARD GEORGES

Mon drwa se pou koz pou 1 erdtan - sel keksoz ki mon'n fer e mon'n *polite enough* pou mwan dir mon pou koz pou plis ki 30 minit ki *la norme*.

Me pou egzers mon drwa e mon pou koz pou tan letan ki mon anvi Onorab Pillay.

MR SPEAKER

Nou'n *deal* avek sa pwen Onorab Georges. *Move* silvouple.

(comments off-mic)

MR SPEAKER

Zot nou pa ankor – *please*, nou pa ankor ni menm konmans Mosyon. E nou pe ganny kontrayete lo la. Silvouple annou fer en zefor. Mon konnen sa Mosyon i politik. Me annou fer en zefor pou nou

gard en pe *calm* e reste annord. Mersi Onorab.

Onorab Georges, ou pe al konmanse?

HON BERNARD GEORGES

Mersi Mr Speaker. Mr Speaker, dan lannwit le 4 a le 5 Zen 77 dat parey sanson i dir, “ki zanmen nou pou bliye dan listwar nou pei” - lo sa kote latab nou pa pou bliy sa dat pou bann rezon byen diferan avek zot.

En gro nyaz nwanr ti anvair nou zoli pei. Mon bezwen konmans koumsa aköz sa zafer *Maison du Peuple* in konmans avek koudeta. Me mon pa bezwen repas lo sa levennman, tou Seselwa in swiv deroulman *TRNUC* e tou Seselwa i okouran, sa ki ti swiv dan zoli pei. Ozordi sa Mosyon i konsantre lo enn sa konsekans koudeta.

Enn ki nou tou nou konnen dan nou lespri, me ki pa nou tou ki’n *process* sa lenformasyon.

Sa konsekans ti debat semenn pase dan Mosyon Onorab Henrie lo *NISA*. Sa enn Mosyon i en kontinyasyon sa, lot. E i annan konman son bi retourn *focus* lo labi ki’n pase dan nou pei pandan ki Parti *SPUP*, *SPPF*, ti o pouvwar - en labi ki ti annan konman son lentansyon pran byen leta byen Seselwa e donn sa avek en group dimoun - en parti politik pou en sel benefis.

Atraver sa seri aksyon, nou pou vwar ki mannyer sa parti politik ti an bet son prop siporter, pep Seselwa an antye e travay dan son prop lentere.

Nou pou vwar ki mannyer en parti politik ti anbet Seselwa depi son premye aksyon avek en sel bi pran e gard pouvwar.

Nou pou vwar ki mannyer sa parti politik ki apel *United Seychelles* ozordi, e pandan tou son listwar anbet dimoun, manti e konfiz nou popilasyon.

Nou pou vwar ki mannyer personn pa devret met en sou konfyans dan sa Parti *US* ozordi, aköz a parti pa’n zanmen travay dan lentere okenn dimoun apard li menm e son bann dirizan.

Wi, pa’n donn zot 43an o pouvwar zot in travay. E zot in amelyor lavi bokou dimoun, sa nou pa konteste.

Me sa ki pli byen pase dan tou sa letan se pa Lepep Seselwa se Parti *SPPF*, Lepep, *US*.

Se zot ki’n pli byen gannyen ki okenn lezot Seselwa, konmansman avek zot per fondater ki ti aste 10 arpan laten lo en lans prive pou R40 mil e pas vakans lo zil Remir e fini avek en parti politik ki’n servi son pozisyon pou zis fer larzan lo ledö Seselwa.

Dan sa konteks Mr Speaker, sa size *Maison du*

Peuple i en leson politik pou nou tou.

Byen o komansman permet mwan fer kler ki sa Mosyon pa pe koz lo sa ki Parti US pe dir. E sa se ki zot in devlop later ki anba zot non e ki sa bann byen i pou zot aköz se zot ki'n fer. Non. Sa ki Mosyon pe *target* se ki sa bann byen ki US i annan ozordi se san eksepsyon bann byen ki zot in gannnen atraver en sistenm ki ti zot ti enpoz lo Sesel e ki ti permet zot a kapar sa bann byen dan en seri konfli lentere.

Sa Mosyon set en Mosyon rann kont pou zot aksyon ler ti napa Lopozisyon dan pei aköz zot ti enpoz en sistenm sosyalis Parti Inik lo nou pei.

Sa Mosyon pe rode ki mannyer ki en parti politik in arive ganny sitan later ek batiman ?

Mon'n konmans mon lentervansyon avek koudeta aköz se sa koudeta ki'n permet tou sa ki mon fek dekrir.

Permet mwan konmans avek en komanter zeneral. Sa se mansonz. Bokou pou ganny dir par Lopozisyon dan Lasanble lo sa Mosyon.

Parey nou'n tandé semenn pase lo Mosyon NISA. Nou'n tann Onorab Pillay, Onorab Loze pe sey defann zot aksyon avek de largiman ki sa ti en laranzman komersyal e ki si NISA pa ti kontan sa *deal* zot

ti'n senpleman ale e al lwe en lot landrwa.

Sa i vre Mr Speaker. Me i pa adres pou en fondamantal ki Parti US pa oule nou adrese. Sa se aköz ki se zot Parti US ki'n ganny sa morso later avek Gouvernman lo lekel in kapab fer en batiman pou lwe avek en *unit* Gouvernman e fer profi?.

Aküz ki se zot Parti US ki'n kapab lwe later pou R6 mil avek Leta epi lwe sa menm later avek STC pou R800 mil e fer en profi R40 milyon dan 4an ?

Aküz ki *Maison du Peuple* i anrezistre lo zot ozordi ? Se sa sa Mosyon ki devan nou ozordi.

Se sa bann keştyon ki zot pa anvi reponn aköz zot napa repons. Menm keştyon nou pe kapab ganny demande lo *Horizon Complex* Baie Sainte Anne Praslin, lo Sant Kominoter Larivyer Anglez, lo Bazar Anse Royale, lo *Ex Flamboyant*, lo batiman *Espace* e wi lo *Maison du Peuple*.

Dan tou sa bann legzanp Mr Speaker, nou vwar en sel lide - sa se servi ou pozisyon pou ganny en lavantaz pou ou menm. Dan sakenn sa bann legzanp nou vwar en sel aksyon, servi ou pozisyon konman parti politik ki o pouvwar e olye travay dan lentere Lepep ki ou sipoze pe deservi. Met ou prop lentere an premye. Olye konstri Sant

Kominoter pou en kominote, prefere vann ek en biznesmenn e les sa kominote ater

Zabitan *English River* pa pou bliy zot le 27 Septanm ki pe vini. Olye konstri en batiman pou en Minister ou prefere pran later Leta e konstri ou prop biro. Ouswa en batiman pou ou fondasyon e les sa Minister ki'n ganny elekte pou administre lwe landrwa dan batiman komersyal. Se sa travesti ki mon Mosyon i adrese ozordi.

Bokou largiman pou ganny avanse pou montre ki mon napa rezon. Mon repons i senp. Pa krwar sa bann dimoun. Zot pa koz laverite zot manipil laverite, zot annan diplom dan fer ou krwar ki lannwit i lizour.

Mon pa dir sa aköz mon anvi Mr Speaker. Annefe mon tris ki mon bezwen fer sa deklarasyon. Me mon dir li aköz i vre. Sa parti ki ozordi i apel *United Seychelles* e ki an minorite dan Lopozişyon, in manti avek Lepep Seselwa depi son premye moman. In manti pandan tou son legzistans e i pou kontinyen manti pou esey reganny pouvwar.

Annou vwar legzanp sa ki mon pe dir. Premye parol ki ti sorti dan labous zot per fondater Mr Rene le 5 Zen 1977 ti en mansonz.

I ti dir ki en group dimoun in pran pei e in demann li pou pran sarz.

Mr Speaker, mon lir dan en piblikasyon *L'Histoire des Seychelles* ki'n ganny pibliye pa lot ki Minister Ledikasyon ek Lenformasyon ki sa lepok son Minis ti Mr James Michel ki ti vin Prezidan.

E sa i dir le 5 Zen, "*La radio diffuse à 6 heures du matin des communiqués,*" etc, "*un groupe de Seychellois s'est emparé dans la nuit du 4 au 5 Juin de tous les points stratégiques de l'île*" etc – "*Mr Mancham est renversé et ils es demandé à Mr. René de former un nouveau Gouvernement*".

Sa i sorti dan Proklamasyon nimero 1 ki Mr Rene li menm li ki ti fer le 5 Zen 77.

Mon ti ganny demande pou mon vin Prezidan par en group dimoun ki'n pran pei.

Ozordi nou konnen ki sa msye pa ti pe koz laverite avek Lepep Seselwa.

Ti napa okenn group dimoun ki ti'n demann okenn keksoz. Parey nou konnen se li menm ki ti organiz koudeta. Mon lir dan liv Mr James Michel Prezidan Sesel avan ki zot dir non se pa sa liv ki mon ti al prezante *State House* sa set en lot. Dan a liv Mr Michel la la sa ki i dir, lo paz 85.

"*Rene was the architect of the coup and was always in charge.*"

Mr Speaker, premye parol, premye parol ler zot in sezi pei ti en mansonz.

E mon pou montre taler zot pa'n zanmen aret koz mansonz avek sa pep Seselwa.

Epi zot deside met zot bann oponan dan prizon, fer zot disparet anvoy zot an egzil, ferm tou parti politik e ou konnen ki mannyer zot apel tousala Mr Speaker ? Liberasyon.

Ou liberasyon ou Mr Speaker, ansanm ek sa bann ki zot non i lo sa moniman Union Vale sete al dan prizon san konnen ki zot in fer e kan ki zot pou sorti.

Sa sete ou liberasyon. Liberasyon Gerard Hoareau, Hoffman, Alton Ah-Time, Simon Desnousse, Claude Monnaie, Damendra e bokou ankore zot liberasyon se ganny touye, perdi zot lavi !

Menm zafer avek *Maison du Peuple*. Sa ledifis in ganny konstri lo en mansonz e fodre Lepep Seselwa i konn son vre listwar.

E listwar i la pou nou vwar. Sa koudeta ki Mr Rene ti organize sete pirman e senpleman en lafen pouvwar. Tou sa ki *SPUP*, *SPPF* in dir ki sa sete pou devlop Sesel pou egaliz lavi, pou ranforsi drwa imen, pou kree lozman, tousala Mr Speaker, se *marketing*. Se *marketing* pou kasyet vre rezon ki zot in pran pei.

E legzanp pli kler dan tousala se *Maison du Peuple*. Ozordi parey nou konnen *Maison du Peuple* i *headquarters* Parti *United Seychelles*. Kot Prezidan zot parti i annan son biro, kot Komite Santral sa parti i zwenn, kot tou zot lankadreman politik i trouve ; kot dan zarden, zot stati Zonm Lib in ganny mete, e kot deryer zot siporter i transpire dan *United Square*.

Se la kot sak Eleksyon zot pli gro banner i ganny mete.

Se la kot zot rasanble sak Eleksyon pou ekout rezilta. E se la dan lannwit le 27 a le 28 Septanm 2025 ki zot pou rasanble pou zot asiste seremoni zot lanterman politik.

(APPLAUSE)

HON BERNARD GEORGES

Maison du Peuple Mr Speaker, in vin lakaz *United Seychelles*. In napa okenn lot fonksyon ozordi. Alor ki mannyer ki sa in arive? Se sa ki sa Mosyon pe demande.

E se sa ki sa Komite Lasanble ki pou ganny kree pou demande i ganny demande pou egzaminen e fer rekomandasyon avek Gouvernman.

Ki mannyer ki en batiman ki appel lakaz Lepep in arive vin propriyete - mon

dir byen propriyete akòz mwan mon konn dir sa mo - en sel parti politik - en sel parti politik ki minoriter ozordi.

Zistwar parey mon'n dir i konmans zis apre koudeta. An 1979 2an apre koudeta MR Rene i donn Sesel en nouvo Konstitisyon.

La i la. Ladan i fer plizyer keksoz enteresan ki i annan en lefe direk lo sa Mosyon ki devan nou ozordi.

Premyerman e sa bokou dimoun pa konnen, sa Konstitisyon i efas Prezidan Mancham konpletman dan listwar Sesel.

Dezormen premye Prezidan Sesel i pou sa Prezidan ki ganny elekte anba Konstitisyon 1979 setadir Mr France Albert Rene.

Bliye ki Mr Mancham ti ganny deklare e pran serman konman Prezidan Sesel zour Lendepandans bliye ki li menm li MR Rene ti pret serman konman Premye Minis Mr Mancham, bliye tousala.

Dezormen Sesel pa ti egziste, pa ti ganny drwa egziste avan le 5 Zen 1977.

Mr Rene pou vin premye Prezidan, seksyon 9 dan sa Konstitisyon i dir sa.

Dezyenm kekfw sa ki pou ekoute pou demann zot lekor be ki sa i annan pou fer avek *Maison du Peuple*? Set en tre bon kestyon.

E son larepons ki i annan tou pou fer avek *Maison du*

Peuple listwar politik avan le 5 Zen 1977 ti bezwen ganny efase akòz sa sete en listwar demokratik kot parti politik ti diferan avek Leta.

Prezidan Mancham ti senbol s demokrasi. Alor i ti bezwen dir zis pou aret legalman konman sa senbol dan son plas Mr Rene ti pe refer Sesel e Seselwa a son limaz.

Dezormen Leta e parti Mr Rene ti pou en sel anba son direksyon total.

Dezyenmman dan sa Konstitisyon, Sesel i ganny deklare konman en *one-party state* e tou aktivite politik pou ganny fer anba *SPPF*.

Lartik5 i dir sa tre kler. E avek ou permisyon mon ava lir li.

"Seychelles is a one-party state, and all political activity, other than political activity," eksetera, *"shall be conducted under the auspices of the Seychelles People's Progressive Front."*

Pa mwan ki dir Mr Speaker, zot Konstitisyon ki dir.

Donk zis zot ki ti annan drwa fer politik a parti le 5 Zen 1979. Tou lezot ti swa dan prizon parey ou, swa an egzil, swa anba later, ouswa kot zot avek en bando lo zot labous - napa drwa koz politik parey mon e bokou lezot ankor isi e ayer.

Leta Sesel e Parti *SPPF* ti fer en maryaz. Sa de keksoz ti vin en sel *unit*. Annou mark sa parol tre byen. Akoz se sa ki'n permet bann labi ki nou pe koz lo la ozordi.

Trwazyenmman Konstitisyon *SPPF* pou form en parti integral Konstitisyon Sesel i la, dan *schedule 2*.

Konstitisyon *SPPF* i vin en parti Konstitisyon Sesel. Konstitisyon en parti politik i marye Konstitisyon nou pei.

E anba Konstitisyon *SPPF* ki sel parti politik pou tou Seselwa, kontan pa kontan aköz *one-party state* a ki nou kree se en *socialist state*.

Lartik 3 sou lartik 5. E nou idantifye nou lekor avek mon site, "*The World Socialist Labour and Progressive Movements*." Lartik 3(9)

Alor prezimen an 1979 Sesel i vin en *one-party state* anba *SPPF* e Sesel i vin en parti sosyalis. Sa i la in ekrir nwanr lo blan.

En sel kou nou tou, tou Seselwa kontan pa kontan, nou sosyalis aköz Konstitisyon i dir nou sosyalis e nou viv anba *SPPF* konman sa sel parti politik dan nou pei aköz *SPPF* i dir. Sa i annan en konsekans direk avek *Maison du Peuple*. E sa se finansman me sa taler nou ava vwar li.

Sa Konstitisyon ki mon fek eksplike i vin anfors le 5 Zen 1979 sa se zour kot nou

tou nou vin sosyalis anba en rezim sosyalis Parti Inik dirize par *SPPF* Mr Rene.

Menm zour menm zour le 5 Zen 1979 Mr Rene i met premye pyer pou *Maison du Peuple*. Konpran mwan byen, menm zour ki Sesel i vin en *one-party state* e ki sa parti i *SPPF* kot Leta e parti o pouvwar i vin en sel *unit* sa menm zour ki premye pyer *Maison du Peuple* i ganny depoze.

Pa zis sa - pou montre zot ki mannyer ki sa batiman ti pou Lepep Seselwa e non pa pou *SPPF* sa batiman i ganny konstri lo later Leta.

SPPF pa ti ni transfer sa later lo zot avan fer sa batiman. Annefe sa batiman in ganny konstrir lo later Leta e in reste lo later Leta ziska 1996 3an apre retour miltiparti.

Eski sa sete en kwensidans Mr Speaker? Napa kwensidans. Lakle dan repons sa kestyon i ganny trouve dan sa de term.

'*Socialist Labour and Progressive Movements e Maison du Peuple*.'

Annou konmans avek sa non *Maison du Peuple*. Nou ozordi nou asosye sa avek sa batiman ki *headquarters* Parti *US* e nou pa get pli lwen aköz nou'n fini abitye *Maison du Peuple* sa se kot Parti *US* i asize.

Nou krwar ki sa i zis en non parey *Kingsgate House*, ouswa *Maison Marengo*, ouswa *Maison du football*

Me nou tronpe fer sa fot. Sa non se pa ni SPPF ni Mr Rene ki'n evante, oubyen ki'n swazir. *Maison du Peuple* i en vye term pou dekrir en batiman ki pou abrit parey son non i dir - bann mouvman sosyalis e progresiv apar dan lemond pou donn travayer en sistenm sosyalis en landrwa pou zot rankontre pou zot detann. Set an dot mo - zot lakaz - zot landrwa - zot *lieu de rencontre*. Parey son non i dir set en landrwa renyon pou travayer.

E Mr Speaker, sa nou vwar li partou, mon annan la avek mwan, mon pa pou tarde, mon annan la avek mon e zot kapab al gete - mon sir ki tanto zot pou al fer zot resers lo *Wikipedia* nou annan tou sord lesplikasyon lo *Maison du Peuple* ki ti annan en pe partou dan lemond e ki *Maison du Peuple* li i ti en senbol sosyalis - set en senbol lalit sosyalis.

Nou vwar sa *Bruxelles*, nou vwar sa *Bucharest*, nou vwar sa *Burkina Faso*, nou vwar sa an *Suisse*. Tousala ti annan en *Maison du Peuple*. Pa zis Sesel ki ti annan en *Maison du Peuple*.

Me pli lwen nou al pli lwen. Nou lir dan en piblikasyon. Ankor enn fwa sa

se en piblikasyon ki'n ganny prepare par anba letan Parti Inik par Minis Kiltir ek Lenformasyon se sa, sa lepok sete Minis James Michel ki ti Minis, e nou vwar ladan *Historical Monuments of Seychelles*. Nou vwar ladan lo paz 40 "*Maison du Peuple*" e a la, la sa ki sa piblikasyon ki zot, zot Parti Inik zot ki'n prepare sa, get sa ki i dir,

"Maison du Peuple : if there is one building in Seychelles, that should be adorn with the National moto of Finis Coronat Opus it is the Maison du Peuple."

This major project was completed in three stages. After laying the foundation stone by the President Mr France Albert Rene on 5th June 1979, construction work went ahead - eksetera mon pa pou fatig zot, taler nou ava antan tousala.

In 1993 the Maison du Peuple was officially opened by the President of Republic mon mazine ki sa ki zot anvi dir la se ki 1983 aköz mon pa vwar ki 1993 i ti annan okenn louvertir Maison du Peuple.

E sa ki enteresan *the building Maison du Peuple* - sa Mr Speaker en mon pe koz *Maison du Peuple* - "*the building includes a conference centre, library and a restaurant.*

Several organization has offices in the building including

the Seychelles National Oil Company (SNOC) federation of local unions” eksetera.

1979 *Maison du Peuple* i ganny fer e dapre Minister Lenformasyon ek Kiltir si i annan en batiman ki devret ganny dekrir anba moto Nasyonal *Finis Coronat Opus* se *Maison du Peuple*, gard sa byen an tet.

Zot in remark en keksoz dan sa Mr Speaker? Pa “*Fearless in Dignity*” ki sa moto in ganny swazir pou dekrir *Maison du Peuple*. Sa se moto ki Onorab Pillay tou le semenn i kontan resite isi dan Lasanble. Non, se *Finis Coronat Opus* ki’n ganny swazir pou dekrir *Maison du Peuple*.

Alor sa moto ki nou moto Nasyonal e dan zot lespri aköz se zot ki ti konstri sa, sa lepok sa batiman ti en batiman nasyonal e non pa en batiman parti politik.

I egziste la *National monument* dan sa liv *national monuments* ki zot, zot in pibliye zot dir *Maison du Peuple* i sa enn moniman Nasyonal ki kapab reflekte nou Leta anba nou moto *Finis Coronat Opus*.

So zot ava konpran alor Mr Speaker, sa korespondans ki annan an term mouvman sosyalis e en *Maison du Peuple*.

Sa i eksplik li de deryer sa batiman aköz sete Prezidan

Chadli Bendgedid parey nou konnen e bokou dimoun pou koz lo la ki sorti *Algérie* i vin ouver sa batiman.

Aküz sete en rezim sosyalis *Algérie* sa lepok ki ansanm avek plizyer lezot Gouvernman sosyalis dan lemonn, ki ti ede pou konstri e pou eriz sa batiman.

Alor Mr Speaker, menm zour ki Konstitisyon Parti Inik anba SPPF en rezim sosyalis i vi an fors se menm zour ki premye pyer *Maison du Peuple* ti ganny depoze.

Sa senbol se ki Leta Seselwa e Parti SPPF i vin en sel *unit*. Mon repete aköz i enportan, sa senbol se ki Leta Seselwa i Parti SPPF i vin en sel *unit*.

Dan zot lespri e dan lapratik sa ki pou Leta e sa ki pou Parti SPPF napa okenn diferans.

Dan lannwit le 5 Zen 1977 zot in vol nou pei le 5 Zen 79 zot in legaliz sa vol dan gran kler nwanr e blan dan en Lalwa dan zot Konstitisyon.

Batiman *Maison du Peuple* i ganny konstri e parey deskripsyon i dir zot agrandi li e i annan en ICCS avek restoran *Harbor Light* i vin en landrwa pou Lepep Seselwa pou travayer Seselwa *enjoy*, detann, vin danse, vin vwar spektak aköz sa batiman se zot ledifis.

Kestyon alor dan sa Mosyon, se ki mannyer ki sa ki

ti'n ganny fer pou lepep in ariv vin propriyete - mon repete propriyete en parti politik ozordi ?

Repons Mr Speaker, i senp e i pe regard nou an fas. *SPPF* in servi byen Leta pou donn zot parti en faver. Pwen.

Sa menm fenomenn ki nou'n vwar avek *NISA* semenn pase e menm fenomenn ki nou vwar atraver pei dan sa 40tenn morso later Leta ki enn par *SPPF* in pran ouswa in transfer lo li pou en pri derizwa. Annou regard *Maison du Peuple* dapre dir sa morso later o bor kot *Flamboyant* ti ete ti pe ganny vann pou R70milyon lotrozour nou fek tann sa.

Zot konbyen lavant *Maison du Peuple* an 1996 konbyen zot in mete ? R500 mil. 150 fwa mwens 150 fwa mwens ler zot aste ki zot anvi vann en bout *next door* avek li, ki napa menm groser batiman lo la. Ou konpran Mr Speaker, aköz Lepep Seselwa i demann sa bann keston?

SPPF, Parti Lepep *US* i annan en sel fason travay, donn zot lekor lavantaz e sezi sa lavantaz pou zot prop benefis. Sa koudeta le 5 Zen sete sa son lobzektif.

Sezi pouvwar e pran sa ki pou lepep pou zot menm. Later, lavwa en pep, laliberte en pep, menm lavi dimoun zot in pran pou zot prop benefis.

Se koumsa ki Lepep Seselwa in ganny anbete.

Alor mon dir avek Lepep Seselwa letan pou nou asize e les se zans pran gato, pran lakrenm lo gato e pran labouzi lo gato pou zot menm e zis kit lasyet vis pou nou, in fini.

Atraver sa Mosyon, mon pe demann avek nou bann reprezantan Lepep ki asiz isi dan sa Lasanble azir lo non Lepep e rebran sa ki pou Lepep.

Lot kote latab zot pou akiz mwan ki mon oule pran sa ki zot in transpire pou konstri.

Zot pou dir se larzan Parti *SPPF* ki'n konstri sa batiman.

Ki se zot bann militan ki'n travay pou konstri *Maison du Peuple* ; ki zot in ganny kado avek bann Pei Zanmi - tousala zot pou dir.

Mon repons Mr Speaker, i la. Premyerman zot in fer Lepep Seselwa vin sosyalis ; zot in fer Lepep Seselwa vin anba en Parti Inik, zot in fer *Maison du Peuple* pou Lepep Seselwa. Zot in pran later Leta. Ozordi zot in pran sa batiman pou zot. Ki mannyer ki nou si dan sa Lasanble nou kapab aksepte sa ?

Dezyenmman annou regarde ki *SPPF* ti annan ler zot in pran pouvwar le 5 Zen. Sa parti ti preski napa larzan e nou tou nou konn sa.

Zot bann transpor sete OAU ki ti donn zot. Zot ti napa ni en biro zot ti ankor pe lwe biro avek Hassan Ally. Zot ti napa larzan ki mannyer zot in arive vin parti milyonner ozordi?

(APPLAUSE)

HON BERNARD GEORGES

Annou retourn lo sa Konstitisyon SPPF, pou nou vwar en bout sa larepons. Ki mannyer sa parti ki'n pran kontrol lo nou lavi pou ganny son resours ek son finansman ?

Dan lartik 5 sa konstitisyon Mr Speaker, zot pou ganny zot larzan anba ot pou ganny zot larzan atraver plizyer sours, enkli *allocation by the Central Government*. *Allocation by the Central Government*.

Non selman satisfè avek pran pei, zot servi larzan Gouvernman pou fer marse zot parti politik.

Akoz ? Akoz parti politik ek Leta in vin en sel. In vin en sel *unit*. Sa ki pou Leta i pou SPPF, sa ki pou SPPF i pou Leta.

Lemoman ki nou'n vin pli en Parti Inik pli gran parti finansman Parti SPPF in vin atraver Gouvernman.

In sorti dan kof Leta nou *taxpayers* menm si nou pa ti siport SPPF, se nou larzan ki ti ganny servi pou sa bann

akizisyon later enkli konstriksyon *Maison du Peuple*. Pa mon ki dir Mr Speaker. Zot prop Konstitisyon ki dir.

Alor Seselwa i annan drwa konnen konbyen larzan *taxpayers* ki'n antre dan sa batiman ki pou zot.

Finalman se koumsa ki SPPF in kapab vin propriyeter tou sa bann later dan milye lavil e dan distrik e fer batiman komersyal lo la pou zot ganny ankor plis larzan.

Me pa zis sa Mr Speaker, dan bokou sa bann batiman se bann lantrepriz Gouvernman ki'n lwe sa bann biro. *Licensing*, Labank *Savings*, Fon Pansyon, *Maison du Peuple* parey nou'n vwar ki ti propriyeter SEYPEC.

Zot pran larzan avek Gouvernman pou fer en batiman, zot met lo zot non epi zot fer departman Gouvernman lwe sa menm batiman pou fer plis larzan ankor.

Se koumsa ki zot in fer avek STC parey nou fek tande bomaten, kot san depans en sel sou zot in fer zero ariv 40 milyon dan 4an.

Antretan sa bann travayer Seselwa ki'n ede dan konstriksyon *Maison du Peuple*, ki ti pou vin en lakaz pou zot lwazir oli zot Mr Speaker, oli zot mon bann zanmi ki siport US ?

Mon bann zanmi dan *US* regard otour zot. Anmezir ki zot pe debout e transpire dan *United Square* kot batiman *Maison du Peuple* se bann sef ki pe asiz ladan, dan bann gro biro *aircon*, avek dapre dir mon pa konnen mon pa'n zanmen antre laba - menm *double bed* pou zot repoze lo la i annan.

(comments off-mic)

HON BERNARD GEORGES

La, la kot zot bann dirizan in anmenn zot pandan 43an.

Mon ti dir Mr Speaker, *Maison du Peuple* i en mansonz. I pa pou Lepep. I pou en parti politik. Parey zot koudeta zot ledifis in konstri lo en mansonz e Lepep Seselwa in ganny anbeta.

Me nou annan lespwar e lespwar pou Sesel i asiz lo sa kote latat. Se pou sa rezon mon'n anmenn sa Mosyon. Me Onorab Loze i dir ki nou an retar, ki nou ti'n devret pe fer sa depi lontan.

Sa Onorab pa ankor konpran nou kalandriye Mr Speaker. Mon ti'n kapab anmenn sa Mosyon byen lontan.

Tou mannyer mon ti'n *warning* zot ki mon pou fer li.

Enn bann rezon ki mon pa'n anmenn sa Mosyon avan e ki mon fer li la, lo en baz fer en Komite Lasanble pou repas lo sa size *Maison du Peuple*, se

ki mon ti pe esper zot fer premye pa.

Ler miltiparti ti retourn Sesel an 1993 zot devwar sete pou rann *Maison du Peuple* avek Lepep aköz sistenm Parti Inik anba lekel zot in ganny sa later ek sa batiman ti'n fini.

Sa ki zot tin gannyen anba Parti Inik ti pou Leta pa pou zot, e i ti'n devret pe retourn pou leta pou Sesel.

Lavantaz ki zot ti'n pran ler zot ti sel parti politik ki ti'n *link* avek Leta e ti zot devwar pou *de-link* e rann avek Lepep, zot pa'n fer li e o kontrer zot in prefere *subdivide* sa batiman transfer sa bout kot *ICCS* ek *Habor Light* ti ete avek Gouvernman e an 1996 parey mon'n dir transfer *Maison du Peuple* lo zot parti politik.

Zot ki ti ansarz pei e zot ki ti siny tou papye. Zot pou vin dir nou ki sa ki zot in gannyen avek Alzeri ek lezot pei sete zot parti ki'n gannyen. Alor sa i pou zot.

Mon annan de repons pou zot. Premye se vin dir sa devan sa Komite Lasanble, pou nou etidye sa zafer. Pa vin dir li la dan sa Lasanble, vin devan sa Komite anmenn zot laprev.

Anmezir ki zot vini pa bliy sa fraz "*Don au peuple Seychellois par Le Peuple Algérien.*" Pa bliy sa fraz aköz nou nou pa'n bliye.

Dezyenm se zot ki ti met sat ansarz dile, pa nou. Zot

sistenm Parti Inik ki zot in mete dan Konstitisyon, pa in fer Leta ek Parti *SPPF* vin en sel ?

La prezan ler miltiparti i retournen zot ki pou swazir ki si sa ki zot pou rann avek Leta e ki si sa ki zot pou gard pou zot. Me silvouple serye zot en pe. Seselwa pe regard zot dan tou son splander.

En lot rezon ki mon annan, en lot rezon mon atann ase pou donn zot en lot rezon ki mon'n antann ki mon'n atann avan mon anmenn sa Mosyon, se pou donn zot loportinite parey mon ti demann zot pou fer dan Mosyon *TRNUC* 2an pase, pou vin devan e ofer bann viktim zot sistenm sosyalis Parti Inik konpansasyon pou tou sa bann move keksoz ki zot predeser in fer.

En zes inik e for ti pou arive si zot ti'n dir nou ava ofer *Maison du Peuple*, en batiman ki ti'n ganny konstri pou Lepep konman en senbol nou regre pou sa ki nou parti in fer ler nou ti o pouvwar. Me zot pa'n ankouraz pou fer sa.

Trwazyenm rezon ki Mosyon i vin la, midi mwen 5 avan Eleksyon parey zot menm zot in dir, se prezizeman pou ki Seselwa ki zot pe demann fer zot konfyans aköz zot sel opsyon pou Sesel i konpran tre byen ki zot bi e aköz Seselwa pa

kapab zanmen met zot ansarz a pei ankor !

(APPLAUSE)

HON BERNARD GEORGES

Zot pou vin bat latet Seselwa ankor. Zot pou vin fer krwar zot vin travay pou Lepep e apre zot pou travay dan zot prop lentere parey nou ti vwar bomaten.

Zot fer krwar ki zot pe vin rod *bonus* travayer *SPTC*, epi bliye ki profi ki zot in fer lo latet sa menm *STC* avek zot bann sistenm lwe pou R6 mil ere lwe pou R800 mil ti kapab pey *bonus* pou plizyer lannen.

Zot pou fer parey zot in fer avek *Maison du Peuple*. Fer dimoun travay donn zot lespwar ki zot pe fer batiman pou Lepep donn li en no ki fer dimoun krwar ki sa i pou zot apre pran li pou zot menm.

Se sa Mr Speaker, *SPUP*, *SPPF* Parti Lepep e *US*.

Mon pe anmenn sa Mosyon la Mr Speaker, pou met en lafen avek sa levennman le 5 Zen 1977.

Lavenir le 5 Zen in ale. Zournen Liberasyon in ale, Zonm Lib in retourn lo berkay, *Liberation Road*, *Revolution Avenue*, *Francis Rachel Street*, *Freedom Square* tousala in ale. I reste zis de pou ale. Enn pou arive le 27 Septanm 2025, lot se *Maison du Peuple* ki pou retourn pou Lepep.

Annefe apre sa defet ki pe esper zot le 27 Septanm mon bann zanmi zot pou nepli bezwen *Maison du Peuple* konman zot biro aköz zot pou nepli egziste konman en parti politik.

(APPLAUSE)

HON BERNARD GEORGES

Me parey zot in konstate mon Mosyon pa pe demann Gouvernman sezi ouswa rebran *Maison du Peuple*, sa pa ti pou byen, i pa ti pou byen pou de rezon prensipal. Enn se ki sa pa en Mosyon revanz, set en Mosyon ki kondann labi pouvwar. Konpran sa tre byen.

Bi sa Mosyon se pou fer nou nasyon konpran ki Parti US atraver son bann predeseser ti sezi pouvwar an malapropo, ti servi zot lotorite pou pran bann meyer morso later ki annan ki in fer batiman avek larzan Leta e ki'n gard tousala konman zot byen.

Sa batiman pa devret vin en *reward* pou tou sa labi ki zot in fer anba sistenm Parti Inik. I devret o kontrè vin en *reward* pou sa pep ki'n sibir zot aksyon. E mwan mon lo kote Lepep dan sa demars.

Se pou sa rezon ki se mwan ki'n anmenn sa Mosyon ozordi.

Wi, zot in mal fer e zot annan en kantite lesplikasyon pou donner.

Nou pa parey zot, kot nou enpoz en sistenm lo zot non, nou lo sa kote latab nou en group demokrat.

Pa aköz zot in azir gro lebra ki nou, nou bezwen fer parey. Sa pa ti pou onnet.

Alor mon'n deside ki zot merit en loportinite pou eksplik zot aksyon. Parey Bondye dan liv Zenez pa ti pous Adam ek Eve dan zarden, me i ti demann zot pou donn li en bon rezon, aköz i pa ti devret pous zot, nou osi nou krwar ki zot bezwen ganny en sans pou eksplik zot pozisyon e fer zot defans.

Pa aköz zot pa'n konsilte personn avan ki zot n pran sa batiman, ki nou, nou bezwen fer parey.

Pa aköz zot pa'n konsilte personn ler zot ti vol pei le 5 Zen 1977 ki nou, nou bezwen fer parey.

Pa aköz zot in pran later dimoun san konsilte ki nou osi nou bezwen fer parey.

Si zot in ekout nou depi 1991 ler nou mouvman ti konmanse zot ti pou konpran ki nou *agenda* sete pa pou fer parey zot me pou sanz sa pei e fer li vin en pei ki pou tou son zanfan.

Zot in taye pou pran pouvwar koudeta apre zis 11 mwan. Nou nou'n travay pou ariv o pouvwar dan en fason

demokratik a pepre preski ki 30an.

Se pou sa rezon ki nou pa' taye avek sa Mosyon. Labib i dir nou ki i annan en tan pou tou. Letan pou koz lo *Maison du Peuple* prezan ki'n arive.

Maison du Peuple parey onn dir Mr Speaker i en senbol. Parey son non i dir i en batiman kot Lepep an antye pou kapab epanouir ; kot Seselwa i annan en par ladan, kot direksyon pei pou ganny diskite, kot legzibisyon nou legzistans pou ganny *showcase*, kot sakenn parmi nou Seselwa pou santi ki nou *belong*.

I pa en senbol en sel moman politik. I en senbol pou tou Lepep Seselwa parey zot liv i dir i en senbol *Finis Coronat Opus*.

Dezyenm rezon ki mon'n prefere ki sete en Komite Lasanble ki etidye sa size e fer propozisyon avek Gouvernman se ki sa zistwar *Mason du Peuple* i bezwen ganny met o kler pou tou Seselwa konnen e konpran sa ki'n arive. I nou devwar konman en Lasanble ki'n ganny Elekte par Lepep pou egzamin en batiman ki swadizan ti pou lepep me in vin propriyete en parti politik.

An premye se zot siporter ki bezwen kon sa zistwar. Alor meyer fason pou fer sa se pou en Komite lo lekel zot pou annan Manm ki pou partisipe

pou met tou sa size devan Lepep Seselwa.

Sa i ava ganny fer an piblik e tou dimoun a kapab swiv deliberasyon.

Lo sa pwen mon mazine ki zot pou dir mwan ki nou pa pou ganny letan avan Lasanble i recess pou etabli en Komite e pou sa Komite travay, sa i posib. E si nou pa fer li la Mr Speaker nou ava fer li an Oktob ouswa nou ava fer li an Novanm.

Akoz mwan Mr Speaker, mon pou retorn dan Lasanble mwan.

(APPLAUSE)

HON BERNARD GEORGES

Mon pa konn zot. Me mwan mon garanti ki le 27 Septanm bann rezidan Les Mamelles pou anvoy mon ankor enn fwa vin isi pou kontinyen sa travay ki nou'n konmanse.

Sa ki nou pa kapab aksepte, e ki Lepep Seselwa pa pou zanmen pardonn nou si nou fer, se les labi e konfli lentere trankil e fer krwar ki nou pa vwar.

Mon napa gro ker Mr Speaker. Nou napa gro ker lo sa kote latap. Si en parti politik in travay byen annord e in fer larzan sa se son bon sans. Sa se son bonn sans. Sa ki mon pa kapab aksepte se ki en parti politik i servi son pozisyon, sirtou ler i sel parti politik annan drwa egzers en

fonksyon politik akòz toulezour zot in apes fer pou ganny en lavantaz e tir en benefis, akòz sa i mal.

I en konfli lentere. I pa bon pou nou demokrasi e i pa bon pou lavenir nou pei. I pa en bon legzanp pou donn bann zenn ki pe grandi.

Fodre ki nou ki pli vye nou donn legzanp sa ki pli zenn e asire ki zot pa grandi an krwayan ki sa fason fer i akseptab.

An konklizyon Mr Speaker, sa Komite Lasanble ki mon pe demann aprouve atraver sa Mosyon, pou annan latas egzamin e troune repons pou sa bann keston swivan,

Premye kote finansman *Maison du Peuple* ti sorti ?

Dezyenm, konbyen larzan ki parti *SPPF* ti gannyen avek Gouvènmman depi 1979 ziska 1993 ?

Konbyen ki'n al dan *Maison du Peuple* ?

Trwazyenm, si donasyon ti ganny donner sa ti donn pou *SPPF* ouswa ti donn pou Sesel ?

Konbyen – katriyenm, konbyen lokasyon ki *SPPF US* in anmase atraver bann biro ki zot in lwe dan sa bann lannen?

Senkyenm, akòz ler miltiparti ti retourn Sesel, *SPPF* pa ti rann sa batiman avek Leta olye gard li pou zot ?

Sizyenm, akòz ki se selman an 1996 3an apre miltiparti ki sa later kot

Maison du Peuple i ete in ganny transfere sorti lo Gouvènmman pou vin lo *SPPF* ?

Si sa batiman ti ganny konstri lo later Leta – setyenm, avek larzan Leta akòz ki Gouvènmman Mr Rene ti transfer li lo Parti *SPPF* e non pa kit li lo non Leta Sesel ?

Tousala i plis ankor Mr Speaker, se bann keston ki Lepep Seselwa i annan drwa pou konn sa larepons.

Mon asir tou Seselwa ki nou lo sa kote latab dan sa Lasanble ouswa dan a enn ki pe vini zot pou ganny repons lo tou sa bann keston enn fwa poutou.

En mo final pou bann *United Seychelles* dan Lasanble. Zot pa'n kontan sa ki mon dir e mon konpran zot.

Mon mazin ki zot pou atak mon parey zot labitid ler zot napa largiman valab zot fer latak personnel.

Mon konpran zot. Akòz depi ler ki zot in deside parti pou adopte prensip Mr Rene refiz-e disosye zot avek bann labi ki'n arive anba son *watch* e gard li konman zot per fondater – “*Fearless in Dignity*” ler zot in pran sa desizyon ki olye demann en leskiz ki sa ki zot parti in fer zot pa pou retour bann byen parey *Maison du Peuple* avek Leta zot in anbark lo en semen ki pou anmenn zot fer latak personnel, *walk out* akòz

minis ek zofisye servis piblik tou sord keksoz.

Zot in anbark an dot mo, lo en semen perdisyon.

Me i pa tro tar pou nou fer dibyen. Sezi sa lokasyon, siport sa Mosyon, vin lo sa Komite e aksepte ki *Maison du Peuple* i retourn pou sa group sitwayen Sesel ki zot non i enkli dan sa mo "*peuple*."

Sa bann dimoun pou lekel nou travay e anver lekel nou dedye nou servis konman Manm Onorab Lasanble Sesel.

Mr Speaker, *I beg to move*. Mersi.

(APPLAUSE)

MR SPEAKER

Mon oule fer konsiderasyon si nou pran poz la pou en demi erdtan ler nou tournen nou ou annan kantmenm en demi erdtan pou kontinyen, alor sa ki mon deside nou pou prolonz la deba pou en demi erdtan apre nou pou fer en sel *adjournment* ziska demen bomaten.

Donk nou pou kontinyen pou le moman e nou Onorab William segonder Mosyon oule pran laparol la ?

HON WAVEN WILLIAM

Mr Speaker, mon ti ava kontan *reserve the right to speak later on*. *Thank you*.

MR SPEAKER

Ok, i ava vin en lot moman apropiye. Onorab Labrosse ou annan laparol. Ok Onorab Roucou.

HON RICHARD LABROSSE

Mersi Mr Speaker. Mr Speaker, Mosyon ki devan Lasanble ozordi.

MR SPEAKER

Eskiz mwan mon'n ganny en konfizyon la, ler mon'n dir Onorab Labrosse Onorab Roucou in lev son lanmen ou pa ti pe dir mon poudir ou ki ti'n lev lanmen. Oule lev lanmen la ? Ok. So Onorab Labrosse i ava kontinyen e mon ava azout Onorab Roucou.

HON RICHARD LABROSSE

Ok, Mr Speaker, mon kontinyen.

Mosyon ki devan nou Mr Speaker, parey in ganny ben detaye la avan mon pran laparol i byensir pe koz lo rezon aköz ki *Maison du Peuple* ozordi in vin en propriyete Parti *SPPF*, Lepep e ozordi *US*.

Mr Speaker, tou bann Manm isi nou annan en responsabilite pou nou defann a ki byen pou Sesel.

Mosyon pe demann Lasanble sitye en Komite pou fer en lanket lo ki rezon aköz *Maison du Peuple* in vin en propriyete Parti *US* ?

E nou osi Mr Speaker, e sa parey nou dir an Angle in vin en *asset* ki ti sipoze dan lanmen Lepep Seselwa zis parey non sa batiman i dir.

Dan listwar ki mon'n tann rakonte dan distrik menm ler mon ti pe grandi, dan bann letan en pti pe avan menm, menm avan ki mon ti'n ne, pei li menm a bann letan Mr Speaker kot nou ti napa bokou resours sa letan, nou ti napa bokou masin parey nou annan ozordi, me nou ti annan nou enn a ki ti vreman travay for en Nasyon ki ti solider e en Nasyon ki ler nou ti dir mobilize pou nou fer en keksoz pou benefisye nou e vwala kot tou Seselwa ti zwenn ansanm pu zot konstri sa batiman.

Ankor enn fwa Mr Speaker, parey mon'n dir dan menm lespri a ki mon tande ki mon'n tann rakonte Mr Speaker, mwan mon pa ti la Mr speaker mon pa ti ankor ne, sa batiman li men ti ganny konstri dan en lespri se pou fer tou Seselwa zwenn ansanm, kot zot ti pou annan en letan pou zot detant e osi pou bann lezot fonksyon ki sa bann letan parey mon'n dir ki pa ti vreman popiler ouswa nou ti napa bokou sa bann fasilite sa bann letan.

Mr Speaker, me an grandisan an gran alan nou pa vreman kwa ki'n arive ki fer ki sa batiman li menm i pa'n swiv

son rezondet parey i ti sipoze ganny konstri.

Mr Speaker, ozordi ler nou pe koze nou pe koz lo sa Mosyon lo *Maison du Peuple* en landrwa ki ti'n ganny konstri par Lepep Seselwa e parey loter Mosyon in dir en batiman ki ti'n ganny en don par en lot pei pou zouir nou pep pou nou kapab koste inifye, e sa dan li menm Mr Speaker i montre ou poudir avan menm koudeta dan sa pei li menm nou ti annan sa linite solidarite konman en pep.

Nou bezwen aksepte ozordi byensir apre tou sa ki'n pase. Listwar in pase nou pa pou retourn ankor lo la, nou'n vwar ki nou Nasyon li menm li in annan sa bann defayans ler nou pe koz lo solidarite me i ankor annan en group dimoun ki ankor annan.

Me selman ler i ariv lo sa bout politik Mr Speaker, nou vwar ki sa li menm li i fer bokou nou pep soufer ziska ozordi ki nou pe vwar.

Mr Speaker, mon pe get Mosyon dan en fason ozordi se en mo ozordi ki mon pou ki mon'n tir dan sa Mosyon ler mon ti pe gete sa se *accountability*, bon gouvernans dan li menm e osi nou pe rod sa mo lazistis pou konplet sa vre listwar nou pei

Mr Speaker, parey mon'n dir boner sa batiman i ti vin parey en zefor mobilizasyon

kot la mon ti ava osi ler nou pe koze felisit tou bann dimoun ki pou rezon en lot zot in partisipe pou fer ki nou annan en batiman parey ozordi me selman parey ou vwar ozordi nou'n vwar ki zot in pli zou mwen ganny anbete me i pa'n in sa ki zot, zot ti pe konstri i pa'n vin sa ki zot lespri li menm ti ladan e nou'n vwar li vin en biro en parti politik.

Mr Speaker, ler nou pe koz lo tousala i fer mon mazin osi sa later *Ex Flamboyant* ozordi ki mon'n koz ek bokou zenn dimoun ki ti pe okip en bout morso sa landrwa tou dernyerman apre sa diskotek li menm ti'n aret fonksyonnen sa landrwa li menm tin antre dan en pe labandon parey nou dir.

E mon'n aprann avek serten bann dimoun ki ti pe okip sa landrwa laba, ki zot in ganny dir pou evakye pou rezon ou en lot - mon pe mazine ki i annan e *process* lavant ki pe ganny fer ladan.

E la Mr Speaker, ler mon lo sa topik la mon ti a kontan osi ki Gouvernman ouswa bann parti ... konsernen ki pe ekout nou ozordi, pe koz lo sa Mosyon, nou pa pe koz zis aköz nou pe koz lo en parti politik ozordi. Nou pe koz bann propriyete Lepep Seselwa ki nou pe koz lo la, la.

Nou bezwen osi demann nou lekor, ozordi bann parti politik ki egziste, la ozordi nou

annan enn ki o pouvwar *LDS* ki mon reprezante ladan, eski ozordi ler nou koze, Mr Speaker, i annan bann travay ki pe ganny fer, pou fer sir ki Lepep Seselwa sirtou bann endividi ki anvi travay, ki anvi en biznes - nou konnen i annan zenn la deor pe rod later pou fer biznes, Mr Speaker, eski bann dimoun ki pe ekout mon ozordi, Mr Speaker, mon pe fer pledwari avek zot silvouple, annou pa met parti politik dan lavantaz avan tou, Lepep Seselwa ki pe rod en bout later.

Nou ankor annan later ozordi ki pa ankor vann. I annan en ta zenn ozordi ki pe demann en bout kare later pou fer en biznes Mr Speaker.

E la nou vwar ler zot pe met sa bann lavant pou al vann ozordi. Eski sa i fer lazistis? Ki bor sa bann dimoun in ganny larzan pou zot aste sa bann later ki zot pe vann ozordi ler zot pe koz bann parti politik.

Mr Speaker, mwan mon krwar ki Gouvernman ouswa bann dimoun ki pe ekoute ozordi, nou merit rebran sa bann later, diviz zot ek bann zenn antreprenner ozordi ki pe espere. Ki en bon pe zot ki lo lalis pe espere pou sepa konbyen letan, ouswa menm bann ki pe espere aköz viktim politik ozordi ki zot ankor lo lalis.

Mr Speaker, semenn pase nou'n tande ler Mosyon ti lo *NISA* kot zot in menm zot in dir *à haute voix* ki *NISA* i bezwen pey zot, zot larzan se si se la.

Mr Speaker, mon retourn ankor lo sa ki mon pe dir ozordi. Eski Gouvernman pa kapab pran sa later pou pas lo *NISA* ozordi, pour fer son travay ki pe fer, ouswa menm fer en lot konversasyon - mon pa konnen si sa parti politik in aste sa later, fer en konversasyon ki nou pa kapab vwar later pe vin dan lanmen parti politik. Mwan mon kont sa Mr Speaker.

Later i limite dan en pti pei, parey Sesel ozordi ki nou annan. E mwan mon krwar, ki bann biznesmenn lazenes ek bann dimoun ki pe espere ozordi, i sipoze pas avan tou parey nou dir avan parti politik Mr Speaker.

Ozordi *LDS* i dan Gouvernman, si anvi konstrir en landrwa, i pou bezwen aste son later dan son pos, Mr Speaker. I bezwen revwar sa. I pa pou kapab ozordi, zis ozordi anvi pran en keksoz ale sezi sa landrwa ouswa fer gro lebra aköz ozordi i o pouvwar ki i pou bezwen fer sa, i pa sipoze koumsa.

Se pou sa rezon ki ozordi mwan mon pa pe atak personn, nou pa pe fer politik, mon pe demann en keksoz lazistis ozordi Mr Speaker.

Vi ki *Maison du Peuple* parey nou'n ganny dir i ti en propriyete Lepep Seselwa ki'n ganny batir pou mobiliz se pa Seselwa parey nou dir ki ti travay in transpire sa letan, e la ozordi i ankor annan bann propriyete ki pa ankor menm annan bann konstriksyon lo la ki a parti politik, ki bann lanket i ganny fer i annan menm rapor ki'n ganny fer ki devan nou ozordi nou pa ankor kapab get lo la ler nou ti lo *FPAC*, sa i rezon aköz i dir en *case* ki devan Lakour. E mon krwar la i moman apropiye pou nou asize pou nou fer sa konversasyon Mr Speaker.

Mr Speaker, ler mon osi lo sa Mosyon ki nou pe koz lo ozordi, Sesel parey nou konnen i annan son bann listwar politik ki vin avek li.

Me sa ki nou pe koz lo la ozordi i pa zis in ariv zis Sesel mon bezwen donn kredi lo sa osi. Pa zis Sesel ozordi. I annan bann lezot pei ki ti annan bann lopresyon politik dan lepase.

La parey ki bann mon'n fer resers ler mon ti pe ekrir sa mon'n vwar parey *Sud Afrique* nou konnen dan lepase ti annan en ta lo presyon politik laba. *Chile* osi ti enn parey nou konnen.

E ti annan bann propriyete, osi laba ki zot ti ganny kado pou zot pep e sa ki mon'n aprann i annan bann

travay ki'n ganny fer laba, e i annan bann keksoz ki'n ganny fer ki sa bann propriyete pe retourn dan lanmen lepep sa bann pei.

So alors Mr Speaker, an *terminant* lo sa Mosyon, mwan mon ti ava kontan dir avek Gouvernman ki pe ekout nou ozordi pou silvouple reakte, sirtou bann propriyete ki pa ankore ganny fer nanryen lo la i annan en ta zenn dimoun deor ki pe rod landrwa pou fer biznes, alors nou pa pou kapab kontinyen donn parti politik privez. Mersi Mr Speaker.

(APPLAUSE)

MR SPEAKER

Laparol pou Onorab Philip Arissol.

HON PHILIP ARISSOL

Mersi Mr Speaker. Bonn apre midi tou dimoun.

Mr Speaker, nou Lasanble i zwenn ozordi pou diskit enn parmi bann size pli fondamantal ki konsern nou kominote. Sa se propriyete e lavenir *Maison du Peuple*.

Sa batiman ti ganny kree pou reprezant linite Nasyonal ki'n travers plizyer faz politik SPPF, Parti Lepep, US e ozordi *A New United Seychelles*. Me son valer i depas tou sa bann zistwar parti.

Maison du Peuple i en senbol Nasyonal en leritaz

vivan nou listwar. En patrimwann ki nou pep in batir ansanm.

E ki merit reste dan son lanmen pou gard lafyerte Nasyonal vivan. I bezwen retourn kot i toultan devret reste dan lanmen Lepep Seselwa

Dapre dokiman istorik en deklarasyon ansyen Prezidan France Albert Rene sa batiman ti en vizyon pou etabli en pon solid ant Gouvernman ek lepep.

Son konstriksyon ti reflekte linite e devouman kontribisyon volonter, bann sitwayen ek teknisyen lokal servis teknik gratwit evalye a valer R150 mil par *Associated Consulting Engineering* ASCON ek en bann donasyon etranze ki ti transparan e dokimante.

Gouvernman *Algérien* ti kontribye R7 milyon, *L'Union Soviétique* 13 mil tonn siman bal siman, *Corée du Nord* 2 mil tonn siman, *Belgique* 59 tonn feray.

Zabitan Praslin ti donn granit rouz, Komite le Fon prezide par Minis Philibert Loizeau sa letan e i ti depas son espektasyon R3 milyon.

Ziska an Avril 1981 plis ki R8.1 milyon ti'n fini ganny depanse.

Nou pa kapab oubliy legzanp kot Prezidan Rene ti prepar manze li menm pou en repa lev fon dan *State House*.

En zefor kolektiv ki ti ranforsi sans pou sa proze vin patrimwann Lepep Seselwa. Sa ti en kado en kontribisyon partaze. Ki ti vivan lo sa menm batiman.

Me an Fevriye 1996 *Maison du Peuple* ti transfer dan lanmen Parti Lepep. Enkli *parcel* - sa morso later *parcel* V8013 pou en sonm R900 mil en pri ki pa ti reflekte son vre valer istorik, moral e materyel.

Nou merit poz kestyon esansyel. Eski sa tranzaksyon ti ganny fer an bonnfwa ? Eski larzan ti vreman ganny peye ?

Eski i pa en fon pou transfer patrimwann Nasyonal dan lanmen en parti politik ?

Zot merit osi rapel ki ti annan en plak lo sa batiman ki ti dir, "*Don du peuple Algérien au Peuple Seychellois.* "

Sa ti en senbol kler ki sa batiman ti'n ganny kontribye pou pep Seselwa pa pou okenn parti politik. Me sa plak ti disparet. Eski i ti ganny retire pou efas laverite?

Nou bezwen met latransparans o sant nou deba. Nou bezwen analiz kler lo vadilite sa tranzaksyon.

En Komite endepandan pou etidye tou dokiman e si i nesaser nou merit adopte mezir legal pou asir okenn patrimwann kontribye par Lepep pa vin propriyete prive.

Nou pa kapab nou kapab osi kree en fon Nasyonal pou revaloriz batiman dan en fason

ki respekte son lorizin e rekiper li anba nouvo Lalwa si sa ti ganny transfer san latransparans.

Ler *Maison du Peuple* i retourn kot Lepep nou devret osi ouver en dyalog Nasyonal lo son itilizasyon. I kapab vin en sant devlopman kominoter en platform edikasyonnel en lenvestisman sosyo kiltirel.

I devret vin en landrwa pou bann aktivite nasyonal ganny organize dan en fason ekitab e enn en *panel* piblik i merit ganny etabli pou ki Lepep Seselwa li menm li i desid son vale e son lavenir.

Maison du Peuple pa zis en batiman, i en laprev vivan nou listwar. Sak sitwayen Seselwa i annan en drwa moral lo li. I devret reste ouver pou tou Seselwa.

E son lenportans istorik ek kiltirel i bezwen ganny proteze avek respe e responsabilite.

Ozordi nou pe ekrir en nouvo paz dan listwar nu pei, nou merit fer sir ki okenn lenzistis pa ganny perpetyete e okenn move parti dan transparan propriyete piblik pa ariv ankore.

Sa batiman i reste en senbol kontribisyon nou pep. I pou Lepep Seselwa desid son desten e pou sa nou dir mersi. Mersi Mr Speaker.

(APPLAUSE)

MR SPEAKER

Onorab Samynadin, ou annan laparol.

HON KELLY SAMYNADIN

Mersi Mr Speaker. Bonn apre midi tou dimoun ki a lekout.

Mr Speaker, Mosyon ki pe demann ver letablisman en Komite Parlmanter, ki pou dedwir anver lenvestigasyon ek rapor lo listwar ek legalite lapartenans lo propriyete ne konn li konman *Maison du Peuple* i enn ki vremen valab e *long overdue*.

Sa Mosyon i pa konsern revanz politik. I pa konsern reglaz bann vye kont. Me i konsern reponn en kestyon fondamantal ki i annan pou fer avek lazistis, latransparans, en si ki propriyete lezitim.

I osi konsern restorasyon sa ki'n ganny pran avek Lepep Seselwa san zot konnesans konsantman.

Mr Speaker, *Maison du Peuple* pa zis en nenport batiman dan lavil Victoria. I en batiman senbolik, en lanblenm istorik ki'n dan plizyer deseni asosye avek lavi politik e sivik nou Nasyon.

In akey plizyer levennman piblik. Bann selebrasyon Nasyonal, bann *forum* Gouvernman e in servi konman en sant santral pou bann aktivite etaik.

Le 5 Avril 1981 batiman *Maison du Peuple* ti ouver son

laport ofisyelman dan en seremoni asiste par ansyen Prezidan defen France Albert Rene avek prezidan *Algérie* *Chadli Bendjedid*.

Lo son plak in ekri, "*Don du peuple Algérie au peuple Seychellois*."

I dan sa ka inadmisib ki en tel senbol nasyonal in kapab diskretman e inilateralman transform en propriyete prive. En *asset* anrezistre anba en parti politik ki ti oparavan *SPUP*, *SPPF*, Parti Lepep e aktyelman mye koni li konman *United Seychelles*. Sa i pa en size partizan. Me i enn ki dan lentere piblik.

Si sa propriyete in ganny konstri lo later piblik, avek fon piblik oubyen in ganny transfer anba sirkonstans legal ou etik kestyonnan dan sa ka Lepep Seselwa i annan drwa konnen.

Mr Speaker, Lepep ki reprezante dan sa Lasanble i regard nou konman bann gardyen latransparans.

Kestyon ki merit ganny demande se, ki mannyer en propriyete avek en tel lenportans Nasyonal in reisi tom dan lanmen e sel antite politik? Eski i ti annan okenn tranzaksyon formel? Lekel ki ti otoriz sa tranzaksyon ?

Ki ti bann sours finansman pou konstriksyon sa batiman en si ki lakizisyon sa later ?

Eski se larzan piblik ki ti ganny servi ? Eski later Leta ti ganny re klasifye oubyen transfer dan bann en mannyer inapropriye?

Sa pa bann alegasyon Mr Speaker. Se bann kestyon ki merit ganny reponn. E se zis en Komite Parlmanter ki ava ganny pouvwar atraver sa Lasanble e gide par Konsey Legal ki kapab delivre sa bann larepons avek kredibilite e dan en mannyer enparsyal.

Mr Speaker, si sa Komite i trouve ki *Maison du Peuple* ti ganny aste malonnetman, alors i nou devwar moral e Konstitisyonnèl pou rekomande ki i ganny en retournen a Lepep Seselwa.

En tel rekomandasyon pa pou konsern pinisyon en parti politik. Me plito konsern restorasyon lazistis Nasyonal avek koreksyon bann malfe istorik.

Sa pou osi kree en presedans an ver latransparans dan zesyon nou bann *assets* nasyonal e anvoy en mesaz for ki okenn lorganizasyon, okenn antite politik pe enport zot pouvwar ek lenfliyans lepase i par lao Lalwa ou par lao Lepep.

Mr Speaker, a okenn evantyalite ki sa later ek *Maison du Peuple* i ganny retournen avek Lepep Seselwa sa Komite i merit al pli lwen ki sa.

I devret propoz en en plan soutenab e enklisiv anver lizaz *Maison du Peuple*. Ki swa konman en sant konferans parey en parti sa batiman pe deza ganny servi, en mize nasyonal oubyen pou okenn fonksyon ki servi lentere kolektiv tou Seselwa non pa zis en parti politik ou lorganizasyon.

En tel vizyon ava transform sa lespas sorti konman en senbol partizan an en moniman linite nasyonal. En lespas kot tou lavwa i ganny akerir e kot lavenir nou pei i ganny diskite avek fransiz e respe mityel.

Sa Mosyon i en tes p zis lo regularite li tousel me lo nou matirite konman en nasyon demokratik. Eski nou annan kouraz pou reviz lepase ? Demann kestyon difisil e rod lazistis restorativ ? Oubyen eski nou pou kontinyen permet lenkonvenyan politik pou permet sa ki kapab en labi pouvwar ek privez ?

Mr Speaker, mwan mon swazir semen laverite. Mon swazir semen responsabilite en enstitisyonnèl. E mon demann avek tou mon bann koleg pou siport sa Mosyon. Non pa konman bann partizan me konman bann patriyot.

An konklizyon, annou pa bliye ki okenn parti okenn politisyen e okenn lenstitisyon i pli gran ki Lepep Seselwa. Si *Maison du Peuple* i appartenir a

Lepep Seselwa alors ki i ganny retournen kot Lepep Seselwa, pa demen pa lannen prosenn me ozordi.

Ki sa Komite i konmans sn travay san okenn retar e les li anmenn laklerte kot in annan lonbraz pandan lontan, dan nou latransparans lazistis ek dinyite nasyonal, mon fyerman siport sa Mosyon. Mersi Mr Speaker.

MR SPEAKER

Onorab Roucou, ou annan laparol.

HON MICHEL ROUCOU

Mersi Mr Speaker, avek plezir pou mon koz lo sa Mosyon. Mr Speaker, Mosyon anmenn par Onorab Georges ozordi en Mosyon vremen enportan.

I en Mosyon ki Lepep Seselwa li menm li avek letan zot pe demande ki en Mosyon parey i ganny anmenn dan nou Lasanble, aköz mon panse poudir Seselwa i annan en drwa pou li konnen egzakteman ki mannyer *Maison du Peuple* in *end up* konman en propriyete pou Parti Lepep.

Mr Speaker, oparavan dan mon gran disan mon'n tann souvandfwa bann granmoun dir ki mannyer *Maison du Peuple* li menm li ti ganny bati, ti ganny konstri e kote li menm li kote sa don ti sorti.

Me ek letan apre ek bann listwar ki nou'n tande ek bokou kestyon ek leklersisman ki bann zenn parey mon ki'n ne dan lannen 80, nou'n anvi konn en pti a profon aköz ki nou'n vwar batiman ki i ti en don ki ozordi in *end up* dan lanmen en parti politik.

Mr Speaker, ozordi konman en zenn ki pe grandi e ki'n antre dan politik mon vwar poudir nou bezwen fer sir ki napa favori sa pou bann parti politik, aköz sel parti politik ozordi ki li i pe etabli son lekor dan en lenfrastriktir se Parti *United Seychelles*.

E pa fini la Mr Speaker, ozordi sa lenfrastriktir ti kapab ganny servi pou nou batir bokou nou bann departman Gouvernman li menm li, e parey Onorab Labrosse in dir e ede pou nou ankadre bann pti biznes ki ozordi napa en landrwa.

Mr Speaker, pa fini la. E bokou sa bann labi i pa'n zis pas atraver biro - par atraver *Maison du Peuple*. Nou'n vwar kot *Flamboyant* i ete Mr Speaker.

Ozordi i en later ki la ki ozordi nou ti kapab benefisye bokou nou bann zenn ki ozordi pe rod en propriyete n bout later pou li kapab batir son biznes.

Mr Speaker, mon distrik i enn parmi ban distrik ki ozordi ki'n perdi bokou anba

ladministrasyon *US* Mr Speaker akòz laplipar bann bout later in ganny pran, ki'n benefisye bann serten Manm ki lo dan sa parti.

Zis mon ava dir ou enn Mr Speaker, dan mon pe asize en fwa mon pe koze avek Mrs Vivienne Durup ki en zabitan en fiy ki'n grandi Kan Tobrouk en madanm ki tou son lavi in grandi Kan Tobrouk i ti fer mon ganny en konpran poudir li i ti apros en Minis ki ti dan Gouvernman *SPPF* sa letan, pou li ganny en bout later e sa Minis ti dir li koumsa poudir non i pa pou kapab donn li.

Apré ki nou ti vwar Mr Speaker ? Li menm li sa Minis ti ale ti pran pli gro bout pou son lekor. Pa zis pli gro bout plizyer bout Mr Speaker.

E ozordi ler nou get lalis later bann zenn, bann dimoun ki pe espere sitan bokou letan Mr Speaker, pa ti ava benefisye zot?

E an plis Mr Speaker, dan bann kare later ki ti arive apré nou ti vwar poudir bann kandida *US* sakenn ti ganny en bout, Mr Speaker. E bann later i ankor la pa ankor devlope.

Pa fini sa Mr Speaker, anba kot nou dir kot *Ex Militèr* ti été - *Ex Military* Mr Speaker, sa later en bout i ganny transfer lo Parti Lepep.

Kot la ti abité serten bann zabitan Mr Speaker, zot ti ganny dir sorti akòz apré ki

United Seychelles ti pran sa bout later kot *International School* ti donn pou fer *parking* zot, zot ti pran sa batiman konman pou zot Mr Speaker.

E ozordi tousala i bann propriyete ki mon panse ti devret retourn a zabitan Mont Fleuri ki sa ti ava benefisye zot Mr Speaker.

Mr Speaker, ozordi Larivyer Anglez Mr Speaker, Larivyer Anglez ozordi in perdi enn son landrwa kot ti kapab abrit son bann zenn, ti kapab abrit son bann biznes dan sa distrik Mr Speaker.

E mwan mon krwar pouse ki an i ankor boner la Mr Speaker, mon pa pou dir poudir i boner akòz later i ankor la sa bout later retourn a Lepep Seselwa.

Ozordi Mr Speaker, bokou zenn zenn pe demande kote zot pou al defoule Mr Speaker.

Espace; Espace ti ganny fer ekspreseman pou sa li. Pou bann zenn kapab ganny en landrwa pou zot vini detann Mr Speaker. Ozordi *Espace* ki'n arive Mr Speaker, mon vwar poudir en ansyen Prezidan ti *move* ladan apré ki ler in kit pei in ale Mr Speaker, sanmenm sa Prezidan ki ozordi zot pa oule zot pe dir poudir i dalon avek nou Prezidan, kan sa ler zot Prezidan sa. Ki zot fer Mr Speaker? Dan plas pran sa

propriyete retourn a Lepep Seselwa pou benefisye nou bann zenn ozordi, sa zenn ki ozordi zot pe kriye pou dr vin zot *rally* la en Mr speaker zot in pran sa bann zenn zot in four laba zot in plito pran sa batiman vin avek en prive Mr Speaker.

Ozordi pa ti ava gou ozordi ler nou bann departman Gouvernman - ozordi nou vwar *SIA* i bezwen *move* en lot landrwa son biro pa ti ava ganny en landrwa pou nou bann travayer lo bann profesyonnel Mr Speaker?

Mr Speaker, mon krwar pou dir sa lenzistis ki'n arive dan lepase avek sa Komite ki pou ganny formen Lepep Seselwa bann zenn ki'n ne an 80 Mr Speaker, 1980 nou ava kapab ganny en larepons ki'n arive, ki mannyer sa batiman in *end up* dan lanmen *United Seychelles*. E si fodre Mr Speaker, parey tou Onorab ki'n koz avan mon i ava vin en lazistis Mr speaker, kot sa i ava retourn Lepep Seselwa kot la nou ava kapab fer nou pep benefisye anba la Mr Speaker.

Mr Speaker, mwan sa Mosyon mon pou donn mon sipor aköz sa Mosyon ki la on krwar in ariv en serten ler Mr Speaker, e mon kontan ozordi Mr Speaker, ki mon lo sa kote latap pe donn lanmen lager pou nou fer sir poudir Lepep

Seselwa ki pou zot i retourn pou zot Mr Speaker.

Akoz nou pa pou kapab ozordi nou annan dan lepase nou'n vwar poudir bann ki benefisye avek bann byen malaki Mr Speaker, ki ozordi zot pe asize zot menm zot ki asize ozordi zot pe dir poudir nou Gouvernman pe mal travay, kan saler dan lepase zot menm zot ki'n donn bal dan bann later ki pou Lepep Seselwa Mr Speaker.

Mr Speaker, lo non zabitan Mont Fleuri mon pou donn mon sipor sa Mosyon ; lo non Lepep Seselwa, mon pou donn mon sipor Mr Speaker, aköz mwan osi tou mon santi poudir si vremen sa batiman *Maison du peuple* i devret retourn a Lepep Seselwa, i ava retournen Mr Speaker. Mersi.

MR SPEAKER

Nou'n asiz pou plis ki 2erdtan e mon krwar aepre sa plis ki mon kapab demann zot alor nou ava *adjourn* la e nou ava rebran deba demen matin. *Adjourn.*

(ADJOURNMENT)

